

MESYUARAT PERTAMA, PENGKAL KELIMA
PARLIMEN KEEMPAT BELAS
2022

HARI RABU : 23 MAC 2022

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 11 HINGGA NO. 82)**

NOTA : [RUJUK PENYATA RASMI HARIAN (HANSARD)]

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB TUAN JUGAH ANAK MUYANG @ TAMBAT
(LUBOK ANTU)**

TARIKH : 23 MAC 2022 (RABU)

SOALAN

TUAN JUGAH ANAK MUYANG @ TAMBAT (LUBOK ANTU) minta **MENTERI DALAM NEGERI** menyatakan bila Kementerian akan menganjurkan program 'outreach' kad pengenalan di Parlimen Lubok Antu serta merujuk semula semua permohonan yang tertangguh.

JAWAPAN

Tuan Yang Di Pertua,

Jabatan Pendaftaran Negara (JPN) melalui Program Menyemai Kasih Rakyat (MEKAR) sentiasa bersedia memberikan pelbagai perkhidmatan termasuklah khidmat nasihat berkaitan pendaftaran Kad Pengenalan, Kelahiran dan Kematian bagi memudahkan urusan rakyat. Sepanjang tahun 2021 cabaran utama yang dihadapi oleh Pasukan Mekar JPN adalah penularan pandemik wabak Covid-19 di seluruh negara. Walau bagaimanapun, penularan wabak ini bukan menjadi penghalang kepada pasukan Mekar JPN untuk terus memberikan perkhidmatan terbaik kepada mereka yang memerlukan.

Justeru itu, bagi tahun 2022, program bagi Parlimen Lubok Antu telah dijadualkan pada bulan September 2022 tertakluk kepada perubahan dari semasa ke semasa. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

**DARIPADA : DATUK HAJI AHMAD JAZLAN BIN YAAKUB
[MACHANG]**

TARIKH : 23 MAC 2022 (RABU)

SOALAN

DATUK HAJI AHMAD JAZLAN BIN YAAKUB [MACHANG] minta **MENTERI SUMBER MANUSIA** menyatakan apakah tindakan Kementerian bagi memastikan pekerja p-hailing mendapat pengiktirafan sebagai pekerja dan menikmati hak yang setaraf seperti pekerja lain dalam pasaran buruh seperti yang termaktub dalam Akta Kerja 1955, Akta Keselamatan Sosial Pekerja 1969 serta Akta Keselamatan dan Kesihatan Pekerjaan 1994.

JAWAPAN

Tuan Yang di-Pertua,

Untuk menjaga kebajikan semua pekerja ekonomi gig dalam negara ini perundangan sedia ada khusus melindungi pekerja ekonomi gig termasuk pekerja *p-hailing* adalah melalui Akta Keselamatan Sosial Pekerjaan Sendiri 2017 [Akta 789]. Pekerja p-hailing diwajibkan berdaftar dan mencarum dengan Pertubuhan Keselamatan Sosial di bawah perlindungan Skim Keselamatan Sosial Pekerjaan Sendiri, berkuat kuasa 1 Oktober 2021.

Selain itu, seksyen 15, Akta Keselamatan dan Kesihatan Pekerjaan 1994 [Akta 514] juga menekankan kewajipan majikan dan orang yang bekerja sendiri untuk memastikan, setakat yang praktik, keselamatan, kesihatan dan kebajikan semasa bekerja semua pekerjanya. Peruntukan ini juga terpakai pada pekerja p-hailing.

Manakala Akta Kerja 1955 [Akta 265] adalah khusus untuk melindungi pekerja-pekerja yang digajikan di bawah suatu kontrak perkhidmatan dan pekerja ekonomi gig termasuk pekerja *p-hailing* merupakan kontraktor bebas yang **tidak** mempunyai hubungan sebagai majikan dan pekerja

Kerajaan mengambil berat terhadap kebajikan pekerja ekonomi gig, buat masa sekarang, Kerajaan sedang meneliti dan mengkaji keperluan untuk menggubal satu undang-undang khusus dalam menjaga kebajikan dan melindungi hak-hak pekerja ekonomi gig ini.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN NOOR AMIN BIN AHMAD
[KANGAR]**

TARIKH : 23 MAC 2022 (RABU)

SOALAN

Minta **MENTERI PEMBANGUNAN USAHAWAN DAN KOPERASI** menyatakan bilakah baki permohonan Skim Pembiayaan Informal dan Mikro (SPIM) akan disambung semula dan dijangka selesai diberi kepada semua lebih 23,000 pemohon.

JAWAPAN

Tuan Yang di-Pertua,

Skim Pembiayaan Informal dan Mikro (SPIM) dilaksanakan bagi membantu usahawan informal dan perusahaan mikro yang terjejas akibat pandemik COVID-19 dan bencana banjir.

Bagi memudahkan usahawan mendapatkan bantuan skim SPIM ini, permohonan boleh dibuat secara dalam talian di mana syarat permohonan pembiayaan telah dipermudahkan iaitu daripada 17 dokumen dan maklumat tambahan kepada hanya perlu mengemukakan 4 dokumen asas sahaja iaitu:

- i. Salinan Kad Pengenalan;
- ii. Salinan Pendaftaran Perniagaan;
- iii. Salinan Penyata Bank; dan
- iv. Gambar premis perniagaan

Semenjak dilancarkan secara rasmi pada 1 Januari 2022, Skim Pembiayaan Informal dan Mikro (SPIM) menerima sambutan yang amat tinggi di mana TEKUN Nasional telah menerima sebanyak 31,993 permohonan berjumlah RM291,364,400 iaitu melebihi peruntukan yang disediakan sebanyak RM200 juta. Oleh kerana sambutan yang luar biasa, permohonan pembiayaan bagi skim SPIM ini telah ditutup pada 15 Januari 2022.

Sehingga 21 Mac 2022, TEKUN Nasional telah meluluskan pembiayaan SPIM kepada seramai 25,302 usahawan. Daripada jumlah tersebut, sebanyak 24,152 adalah usahawan yang terkesan akibat pandemik COVID-19 dan baki sebanyak 1,150 pula merupakan usahawan yang terjejas akibat bencana banjir.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN LUKANISMAN BIN AWANG SAUNI
[SIBUTI]**

TARIKH : 23 MAC 2022 (RABU)

SOALAN

TUAN LUKANISMAN BIN AWANG SAUNI [SIBUTI] minta **MENTERI PEMBANGUNAN LUAR BANDAR** menyatakan apakah langkah Kementerian untuk memastikan tawaran kursus TVET di Giat MARA akan memenuhi keperluan industri hari ini dan masa hadapan seperti pembaikan kereta hybrid atau kereta elektrik dan adakah Kementerian mempunyai perancangan membina kompleks Giat MARA di Parlimen Sibuti bagi tujuan tersebut.

JAWAPAN

Tuan Yang di-Pertua,

GIATMARA adalah Institusi Latihan Kemahiran yang diwujudkan di setiap parlimen seluruh Malaysia. Sehingga kini, terdapat sebanyak 232 pusat GIATMARA yang sedang beroperasi dan menawarkan kursus yang memenuhi keperluan serta permintaan industri dan masyarakat setempat.

GIATMARA melaksanakan kajian pasaran dan pembangunan kursus dari semasa ke semasa bagi memastikan setiap kursus yang ditawarkan bertepatan dengan kehendak industri serta permintaan semasa dan masa hadapan. Sehingga kini, terdapat 108 jenis kursus di bawah 12 kluster yang ditawarkan oleh GIATMARA.

SOALAN NO : 15

Kerajaan turut memperuntukkan sebanyak RM11 juta bagi peningkatan dan pengkhususan (specialized) kursus GIATMARA di bawah Rancangan Malaysia Kedua Belas (RMK-12). Antaranya dalam bidang Jentera Pertanian (Agriculture Machinery), Sistem Bangunan dan Rumah Pintar (Smart Building and Home System), Teknologi Animasi, Pengurusan Minuman (Beverage Management), Servis Penjagaan Keluarga dan Terapi Estetik.

Selain itu, jaringan kerjasama dengan pihak industri juga dilaksanakan untuk memperkukuh dan memastikan GIATMARA kekal relevan sebagai Institusi Latihan Kemahiran yang membekalkan pekerja mahir (skills workforce) bagi industri dan pasaran buruh negara. Antaranya peneraju industri yang terlibat adalah seperti PROTON, UMW, KAWASAKI dan MODENAS.

Untuk makluman Yang Berhormat, GIATMARA Sibuti sedang beroperasi di Jalan Bekenu Asli, Bekenu, Sibuti, Sarawak dan menawarkan kursus Pendawaian Elektrik, Senggaraan Elektronik Semburan Bahan Api dan Teknologi Motosikal. GIATMARA Sibuti merupakan Pusat GIATMARA yang menyokong kepada industri Minyak dan Gas (Oil and Gas) di Miri, Sarawak.

Pada tahun 2022 ini, GIATMARA Sibuti akan memberi penekanan kepada penawaran kursus-kursus jangka pendek yang bersesuaian dengan keperluan masyarakat serta industri setempat bagi meningkatkan lagi potensi kebolehpasaran di kawasan tersebut. Buat masa sekarang, premis GIATMARA Sibuti sedia ada mencukupi untuk menampung keperluan pelaksanaan kursus-kursus yang ditawarkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TENGKU ZULPURI BIN RAJA PUJI [RAUB]

TARIKH : 23 MAC 2022 (RABU)

SOALAN

TENGKU ZULPURI BIN RAJA PUJI [RAUB] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan langkah yang diambil dalam kestabilan harga barangan harian yang kononnya akibat kos pengangkutan import naik secara mendadak dalam jangka masa panjang dan pendek, supaya tidak menjejaskan kesejahteraan rakyat.

JAWAPAN:

Yang di-Pertua,

Kementerian sentiasa membuat pemeriksaan dan pemantauan di semua peringkat perniagaan termasuk di kawasan bandar dan luar bandar. Pemeriksaan oleh Bahagian Penguatkuasa Kementerian bagi memastikan pematuhan terhadap undang-undang kepenggunaan di jalankan di seluruh negara termasuk di luar bandar. Pegawai Pemantau Harga (PPH) di bawah Bahagian Harga Barangan Negara (BHBN) Walaubagaimanapun, sekiranya terdapat sebarang aduan diterima berkaitan kenaikan harga jualan apa-apa barangan yang terlalu melampau, notis bertulis akan dikeluarkan kepada peniaga untuk melihat sekiranya wujud kesalahan pencatutan iaitu mengambil keuntungan tinggi yang tidak munasabah oleh peniaga.

Kerajaan juga mengadakan Skim Harga Maksimum Musim Perayaan dan Skim Harga Maksimum Keluarga Malaysia bagi menetapkan harga maksimum untuk barangan tertentu pada tempoh tertentu. Kerajaan turut melaksanakan Penentuan Harga Maksimum bagi Ayam dan Telur Ayam sehingga 5 Jun 2022 ini bagi memberikan kestabilan harga kepada kedua-dua item penyumbang sumber protein utama penduduk Negara ini.

Kementerian bekerjasama rapat dengan kementerian lain terutama sekali MAFI dalam memastikan pengeluaran makanan dan barang keperluan lain dijamin bekalan dan stabil harganya. Libat urus berterusan dengan industri, pengeluar, pengimport, pemborong, peruncit, persatuan pengguna dan lain-lain pihak berkaitan, tetap dijalankan dari semasa ke semasa tanpa gagal.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : DATO' SRI AZALINA OTHMAN SAID
[Pengerang]**

TARIKH : 23 MAC 2022 (RABU)

SOALAN

DATO' SRI AZALINA OTHMAN SAID [Pengerang] minta **MENTERI SUMBER MANUSIA** menyatakan perkembangan terkini Kementerian dalam penelitian cadangan dasar membenarkan pelarian yang telah diiktiraf oleh UNHCR dan memegang kad rasmi UNHCR untuk bekerja secara sah di Malaysia.

JAWAPAN

Tuan Yang di-Pertua,

Pengurusan pelarian dan pemohon suaka dalam negara sehingga kini tertakluk kepada Arahan Majlis Keselamatan Negara No. 23 di bawah Majlis Keselamatan Negara. Arahan ini sedang dalam proses penambahbaikan dan akan dibentangkan dalam Sidang Majlis Keselamatan Negara untuk kelulusan.

Pada masa ini, pelarian yang memegang kad Pesuruhjaya Tinggi Bangsa-Bangsa Bersatu untuk Pelarian hanya dibenarkan untuk bekerja dalam sektor tidak formal seperti bekerja sendiri bagi tujuan sara hidup. Melalui penambahbaikan Arahan Majlis Keselamatan Negara No. 23, satu Garis Panduan Kebenaran Bekerja bagi Pelarian akan diperkenalkan.

Kementerian Sumber Manusia telah dilantik untuk mengetuai Jawatankuasa Pemberian Kebenaran Bekerja ini bagi meneliti isu kebenaran bekerja, termasuklah sektor-sektor yang bersesuaian. Dalam masa yang sama, pemberian kebenaran bekerja ini perlulah dipastikan agar tidak menjadi suatu bentuk persaingan terhadap pekerja tempatan serta menjadi faktor penarik kepada kemasukan lebih ramai warganegara asing yang berselindung di sebalik status pelarian dan pemohon suaka daripada pihak Pesuruhjaya Tinggi Bangsa-Bangsa Bersatu untuk Pelarian.

Melalui mekanisme pemberian kebenaran bekerja ini juga, Kerajaan akan dapat memastikan golongan pelarian ini dapat diambil kira dalam pangkalan data negara dan maklumat keberadaan mereka akan dapat dikemas kini dari semasa ke semasa.

Kerajaan bersedia untuk bekerjasama dengan Pesuruhjaya Tinggi Bangsa-Bangsa Bersatu untuk Pelarian dan lain-lain pemegang taruh dalam usaha memastikan pemberian kebenaran bekerja ini dilaksanakan dengan efektif.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI HASANUDDIN BIN
MOHD YUNUS [HULU LANGAT]**

TARIKH : 23 MAC 2022 (RABU)

SOALAN

DATUK HAJI HASANUDDIN BIN MOHD YUNUS minta **MENTERI KESIHATAN** menyatakan usaha Kementerian untuk melaksana dan menguatkuasakan larangan jualan rokok dan semua jenis produk tembakau termasuk vape, kepada semua individu yang lahir selepas 2005.

JAWAPAN

Tuan Yang di-Pertua,

1. Kawalan hasil tembakau dan produk merokok pada masa kini adalah tertakluk di bawah Peraturan-peraturan Kawalan Hasil Tembakau (PPKHT) 2004.
2. Bagi menambah baik kawalan sedia ada, KKM sedang dalam proses gubalan Rang Undang-undang baharu bagi mengawal hasil tembakau dan semua jenis produk merokok dan juga termasuk peruntukan khusus mengenai larangan penjualan kepada generasi yang lahir pada tahun 2005 dan seterusnya.
3. Antara usaha-usaha yang telah dijalankan untuk melaksanakan undang-undang tersebut adalah seperti berikut:
 - a) Mengkaji pelaksanaan berkaitan cadangan melarang penjualan

SOALAN NO : 18

dan pemilikan produk tembakau dan produk merokok yang lain termasuk rokok elektronik atau vape kepada generasi yang lahir selepas 1 Januari 2005 dengan mengambil contoh pendekatan pelaksanaan di New Zealand, Amerika Syarikat dan Filipina;

- b) Menjalankan beberapa sesi libat urus bersama pihak industri, badan bukan kerajaan, badan profesional dan pemegang taruh yang lain yang terlibat dengan pelaksanaan larangan penjualan dan pemilikan produk tembakau dan produk merokok yang lain termasuk rokok elektronik atau vape kepada generasi yang lahir selepas 1 Januari 2005;
- c) Memperkukuhkan aktiviti penguatkuasaan berkaitan larangan merokok dengan penglibatan pelbagai agensi termasuk penurunan kuasa kepada pegawai-pegawai awam yang berkecuali; dan
- d) Khusus bagi golongan perokok, pihak KKM sedang memperkukuhkan perkhidmatan rawatan berhenti merokok melalui kerjasama pintar antara sektor awam dan swasta melalui Perkhidmatan Berhenti Merokok mQuit dan meningkatkan kebolehdapatan perkhidmatan rawatan ini secara dalam talian melalui laman sesawang **www.jomquit.com**.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB TUAN RAMLI BIN MOHD NOR (CAMERON
HIGHLANDS)**

TARIKH : 23 MAC 2022 (RABU)

SOALAN

DATO' RAMLI BIN DATO' MOHD NOR (CAMERON HIGHLANDS) minta **MENTERI DALAM NEGERI** menyatakan apakah status aset-aset Polis Diraja Malaysia (PDRM) khusus dalam berdepan operasi menyelamatkan dan menghadapi bencana alam dan adakah aset-aset tersebut masih relevan untuk digunakan pada tahun ini.

JAWAPAN

Tuan Yang Di Pertua,

Peranan Polis Diraja Malaysia (PDRM) di bawah Arahan No.20 Majlis Keselamatan Negara – Dasar dan Mekanisme Pengurusan Bencana Negara adalah sebagai Komander Operasi Bencana berdasarkan Tahap Pengurusan Bencana. Tanggungjawab Komender Operasi adalah bagi menyelaraskan operasi menyelamatkan di lapangan dengan mengatur gerak aset-aset yang turut dimiliki oleh agensi penyelamat lain seperti Jabatan Bomba dan Penyelamat Malaysia (JPBM), Angkatan Tentera Malaysia (ATM), Pasukan Mencari dan Menyelamat Khas Malaysia (SMART) dan Angkatan Pertahanan Awam Malaysia (APM) secara kolektif.

Dalam pada itu, Kementerian Dalam Negeri komited untuk memastikan aset-aset yang dimiliki sendiri oleh PDRM adalah kekal relevan dalam menghadapi situasi bencana alam yang kian berubah. Bencana banjir yang berlaku di Selangor dan Kuala Lumpur baru-baru ini adalah di kawasan bandar iaitu di kawasan perumahan yang berpendudukan padat dan ia memerlukan aset-aset yang lebih bersesuaian.

Sehubungan itu, bagi mengukuhkan dan memperkasakan mekanisme koordinasi bantuan dan respon dalam menghadapi operasi bencana tersebut, PDRM telah memperoleh sebanyak 50 buah bot jenis *Whaly* berserta enjin dengan kos berjumlah RM 3.05 juta. Aset-aset ini akan ditempatkan di kawasan-kawasan strategik yang berisiko tinggi untuk banjir. Pada masa yang sama, PDRM juga sentiasa memastikan aset-aset berada dalam keadaan siapsiaga untuk berdepan situasi luar jangka pada bila-bila masa. Sehingga kini PDRM memiliki aset-aset bot dan enjin (378 unit), lori (481 unit), kenderaan pacuan 4 roda (1,571 unit), jaket keselamatan (5,639 unit), jet ski (36 unit), kapal terbang (5 unit) dan helikopter (4 unit).

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 23.3.2022 (RABU)

SOALAN

TUAN KESAVAN A/L SUBRAMANIAM [SUNGAI SIPUT] minta **MENTERI PEMBANGUNAN LUAR BANDAR** menyatakan kos dan cadangan bagi pembinaan jalan dari Kampung Bawong ke Pos Poi dan Pos Piah serta bilakah akan dilaksanakan bagi menyelesaikan isu jalan yang tiada melibatkan laluan masyarakat Orang Asli.

JAWAPAN

Tuan Yang di-Pertua,

Untuk makluman Yang Berhormat, Kerajaan telah meluluskan peruntukan berjumlah RM90.0juta bagi pelaksanaan Projek Membina Jalan Perhubungan Desa Dari Kampung Orang Asli (KOA) Bawong, Kuala Kangsar Ke Rancangan Penempatan Semula (RPS) Kemar, Hulu Perak di bawah Rancangan Malaysia Ke-12 bermula pada tahun 2021. Sehingga kini, lawatan tapak jajaran jalan telah dibuat bagi mengenalpasti keperluan kos sebenar projek dan bagi penyediaan rekabentuk.

Jajaran jalan tersebut akan menghubungkan Kampung Orang Asli Bawong – Kampung Orang Asli Terhem – PoS Poi – Kampung Orang Asli Gerol – Kampung Orang Asli Chat – Kampung Orang Asli Piah – Kampung Orang Asli Teras – KOA Gentes – RPS Kemar sepanjang 60 kilometer. Pelaksanaan projek ini akan dapat memberi manfaat meliputi aspek ekonomi, infrastruktur, sosial, pendidikan dan kesihatan kepada 7,680 orang masyarakat Orang Asli di kawasan tersebut.

Kementerian melalui Jabatan Kemajuan Orang Asli (JAKOA) telah melantik Jabatan Kerja Raya (JKR) sebagai Agensi Pelaksana dan Agensi Pembayar bagi projek ini. Projek ini dijangka akan dilaksanakan pada September 2022 selepas melalui proses Pengurusan Nilai bagi memastikan perbelanjaan pelaksanaan projek mencapai nilai untuk wang (*value for money*).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' SRI HAJAH ROHANI BINTI HAJI
ABDUL KARIM
[BATANG LUPAR - GPS]**

TARIKH : 23 MAC 2022 (RABU)

SOALAN

DATO' SRI HAJAH ROHANI BINTI HAJI ABDUL KARIM [BATANG LUPAR] minta **MENTERI BELIA DAN SUKAN** menyatakan sejauh manakah kementerian bertindak terhadap dakwaan gangguan seksual kepada atlet-atlet dan bagaimana bentuk latihan serta program atlet-atlet dapat dipantau bagi mengelakkan salah laku ini terjadi.

JAWAPAN

Tan Sri Yang di-Pertua,

Saya ingin menegaskan di sini bahawa, Kementerian Belia dan Sukan (KBS) sentiasa peka dan memandang serius isu gangguan seksual yang berlaku terutamanya dalam ekosistem sukan negara. Keselamatan atlet merupakan keutamaan yang tertinggi agar atlet-atlet berasa yakin dan selamat sepanjang mengikuti Program Latihan yang disediakan.

Kementerian melihat bahawa terdapat keperluan untuk menguruskan dan mengambil tindakan terhadap kes-kes berkaitan gangguan seksual dalam sukan secara lebih efektif dengan mengadakan beberapa tindakan seperti berikut :

- i. membangunkan akta sukan selamat (*safe sport act*) yang khusus dalam menguruskan dan menangani kes gangguan seksual dalam sukan. Pihak Kementerian akan menyediakan draf akta ini selewatnya pada bulan Disember tahun ini. Melalui akta ini, ia dapat membantu dan menjadi panduan kepada semua pemegang taruh dalam menangani isu gangguan seksual. Perkara ini juga adalah untuk memastikan mekanisme dari perspektif undang-undang berupaya untuk melindungi semua pihak yang terlibat dalam sukan;
- ii. mewujudkan Unit Aduan Sukan Selamat yang turut dianggotai oleh wakil NGO. Unit ini berfungsi untuk menerima dan menguruskan aduan dengan serta-merta dan mengadakan program advokasi serta libat urus berkaitan gangguan seksual bersama atlet dan penggiat sukan; dan
- iii. membuat pindaan kepada Jadual Kedua dan Ketiga, Akta Pembangunan Sukan 1997 (Akta 576) dengan memasukkan elemen sukan selamat dalam perlembagaan semua badan sukan yang akan

memastikan perkara berkaitan gangguan seksual ditangani dan diuruskan secara berkesan oleh setiap badan sukan. Pindaan ini dijangka berkuatkuasa selewatnya pada Julai tahun ini.

Selain itu, Kementerian melalui Majlis Sukan Negara (MSN) telah menubuhkan **Jawatankuasa Salah laku dan Perlindungan Dalam Sukan** pada tahun 2020 bagi memastikan pengurusan aduan berkaitan sukan prestasi tinggi negara dikendalikan dengan cekap, teratur dan berkesan. Dengan kewujudan Jawatankuasa ini, Kementerian memberi ruang kepada semua atlet termasuklah jurulatih, pegawai dan persatuan sukan untuk tampil ke hadapan bagi menyuarakan aduan, masalah dan pandangan kepada pihak Kementerian pada bila-bila masa sahaja.

Bagi atlet di bawah Program Latihan MSN, pelbagai kaedah pemantauan dilaksanakan antaranya adalah:

- a) **Pemeriksaan mengejut** oleh pengurus sukan semasa sesi latihan bagi memastikan latihan dijalankan berdasarkan prosedur dan modul yang sepatutnya mengikut sukan masing-masing;
- b) **Penggunaan teknologi** seperti CCTV;
- c) **Kawalan keselamatan** di semua premis MSN;
- d) **Prosedur / peraturan** untuk masuk dan keluar asrama, kafeteria dan tempat latihan;
- e) **Kaunseling** bersama atlet dan jurulatih;
- f) **Sesi Dialog** bersama atlet, jurulatih dan pemegang taruh;
- g) **MACE Careline** di mana talian telefon yang berfungsi 24 jam;
- h) **Peti Aduan** di tempat-tempat latihan dan penginapan atlet.

Pihak Kementerian juga mengalu-alukan kerjasama dari pelbagai pihak yang berkaitan untuk memberikan pandangan dalam usaha KBS menangani isu gangguan seksual dalam sukan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' WIRA HAJI AMIRUDDIN BIN HAJI
HAMZAH (KUBANG PASU)**

TARIKH : 23 MAC 2022 (RABU)

SOALAN

DATO' WIRA HAJI AMIRUDDIN BIN HAJI HAMZAH (KUBANG PASU) minta **MENTERI PERUMAHAN DAN KERAJAAN TEMPATAN** menyatakan kawasan-kawasan yang dahulunya dikenalpasti sebagai kawasan kolam takungan tetapi telah dibenar untuk dimajukan sebagai kawasan perumahan. Kenapa ini boleh berlaku dan perancangan dan tindakan Kementerian untuk mengelakkan kejadian banjir yang sering berlaku di kawasan ini.

JAWAPAN

Tuan Yang di-Pertua,

Untuk makluman Ahli Yang Berhormat, berdasarkan maklumat yang diterima daripada Bahagian Kerajaan Tempatan, Pejabat Setiausaha Kerajaan Negeri daripada sembilan (9) negeri, sehingga 15 Februari 2022, terdapat 13 kawasan yang dikenal pasti sebagai kawasan kolam takungan yang telah dibenarkan untuk dimajukan sebagai kawasan perumahan seperti berikut:

- (i) satu (1) kawasan di Negeri Sembilan;
- (ii) sembilan (9) kawasan di Perak; dan
- (iii) tiga (3) kawasan di Selangor.

Sebanyak lima (5) negeri pula iaitu Perlis, Melaka, Johor, Sabah dan Sarawak tidak mengemukakan maklumat berhubung perkara ini.

Kebenaran untuk memajukan kawasan kolam takungan kepada kawasan perumahan di 13 kawasan tersebut telah dipertimbangkan menurut justifikasi-justifikasi berikut:

- (i) kebenaran adalah berdasarkan laporan/ ulasan teknikal Jabatan seperti Jabatan Alam Sekitar (JAS), Jabatan Pengairan dan Saliran (JPS) dan Jabatan Kerja Raya (JKR) yang diterima semasa memproses Kebenaran Merancang (KM) untuk tujuan pembangunan;
- (ii) kolam tersebut tidak diwartakan sebagai kolam takungan dalam Rancangan Tempatan Daerah (RTD);
- (iii) kebanyakan kolam ini merupakan bekas lombong berstatus tanah Kerajaan;
- (iv) terdapat pemilikan lot lama ke atas kolam takungan tersebut; dan
- (v) bagi mana-mana tanah milik yang mempunyai badan air, sebarang pembangunan perlu mendapatkan ulasan dan

SOALAN NO : 22

sokongan daripada Jabatan Teknikal terutamanya Lembaga Urus Air Selangor dan JPS.

Untuk makluman Ahli Yang Berhormat juga, Kementerian Perumahan dan Kerajaan Tempatan (KPKT) telah mengambil inisiatif dengan mewujudkan satu Jawatankuasa *Task Force* Bagi Mengatasi Masalah Banjir Kilat yang diterajui oleh Jabatan Kerajaan Tempatan (JKT) dan dianggotai oleh pelbagai agensi seperti JPS, JKR dan Pejabat Setiausaha Kerajaan Negeri pada 17 Jun 2021.

Jawatankuasa ini ditubuhkan bagi membincangkan dan mencari penyelesaian antara agensi bagi mengatasi masalah banjir kilat di kawasan PBT. Jawatankuasa ini telah mengambil kira masalah-masalah banjir kilat seperti sistem perparitan yang telah uzur, rosak dan tidak sistematik. Jawatankuasa ini juga telah menyediakan draf pelan tindakan bagi mengatasi masalah banjir di kawasan PBT bagi tempoh lima (5) tahun (2021 – 2025) untuk dilaksanakan oleh JKT, JPS, JKR, SUK Negeri dan PBT.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN RUSNAH BINTI ALUAI
(TANGGA BATU)**

TARIKH : 23 MAC 2022 (RABU)

SOALAN

PUAN RUSNAH BINTI ALUAI (TANGGA BATU) minta **MENTERI PERUMAHAN DAN KERAJAAN TEMPATAN** menyatakan bilakah Kementerian akan melaksanakan dan membina insinerator atau 'waste to energy' di negeri Melaka bagi menampung peningkatan sisa pepejal yang telah penuh dan melebihi kapasiti yang sebenarnya di pusat pelupusan sampah di Sungai Udang, Melaka.

JAWAPAN

Tuan Yang di-Pertua,

Untuk makluman Ahli Yang Berhormat, projek loji *Waste to Energy* (WtE) di Sungai Udang, Melaka telah ditender dan melalui proses perolehan pada tahun 2021. Jemaah Menteri pada 19 Januari 2022 telah bersetuju secara prinsip bagi pelantikan pembida berjaya dan *Letter of Intent* (LOI) telah dikeluarkan oleh Unit Kerjasama Awam Swasta (UKAS) pada 4 Februari 2022. Kerajaan akan memuktamadkan rundingan terma dan syarat utama perjanjian konsesi bersama pembida berjaya.

Dalam hal ini, Kementerian menjangkakan perjanjian konsesi ini akan dimuktamadkan dan ditandatangani pada tahun 2022. Setelah itu, pihak syarikat perlu memenuhi syarat duluan (*condition precedent*) dalam tempoh satu (1) tahun sebelum perjanjian tersebut boleh berkuat kuasa. Antara syarat duluan yang perlu dipenuhi adalah seperti Kajian Impak Alam Sekitar (*Environmental Impact Assessment*, EIA), Kajian Impak Sosial (*Social Impact Assessment*, SIA), Kajian Sistem Kuasa dan rekabentuk. Pembinaan loji WtE di Sungai Udang, Melaka akan dimulakan setelah syarat duluan tersebut dipenuhi dan Kementerian ini menjangkakan pembinaan loji ini akan bermula pada tahun 2024 dan mula beroperasi pada tahun 2026.

Selain itu, tapak pelupusan sedia ada di Sungai Udang masih mampu menampung jumlah sisa pepejal yang diterima dan dijangka akan penuh pada tahun 2024. Kementerian ini merancang untuk membina sel tambahan baharu di tapak pelupusan sedia ada dan kini ianya dalam proses pengambilan tanah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN AHMAD FAHMI BIN MOHAMED
FADZIL (LEMBAH PANTAI)**

TARIKH JAWAB : 23 MAC 2022 (RABU)

SOALAN

TUAN AHMAD FAHMI BIN MOHAMED FADZIL (LEMBAH PANTAI) minta **MENTERI PERUMAHAN DAN KERAJAAN TEMPATAN** menyatakan bilakah Kerajaan akan melaksana pilihan raya Kerajaan Tempatan, serta apakah cabaran atau halangan pelaksanaan pilihan raya tersebut.

JAWAPAN

Tuan Yang di-Pertua,

Untuk makluman Ahli Yang Berhormat, cadangan untuk mengadakan semula Pilihan Raya Kerajaan Tempatan (PRKT) bagi memilih wakil-wakil Kerajaan Tempatan (Ahli Majlis PBT) merupakan antara perkara yang dijanjikan dalam manifesto Pakatan Harapan (PH). Jemaah Menteri pada 17 Julai 2020 telah bersetuju supaya cadangan ini tidak diteruskan. Sehubungan dengan itu, Kerajaan hari ini tidak bercadang untuk melaksanakan PRKT kerana sistem pelantikan Ahli Majlis PBT yang sedia ada telah berjalan dengan baik.

Untuk makluman Ahli Yang Berhormat juga, perbelanjaan bagi mengadakan PRKT akan melibatkan peruntukan yang besar kerana kos pelaksanaannya yang sangat tinggi. Kos mengadakan PRKT dianggarkan berjumlah RM2 juta bagi setiap PBT dan RM302 juta bagi kesemua 151 PBT di seluruh negara. Anggaran kos ini adalah sangat minimum kerana ia tidak termasuk kos tersembunyi yang perlu ditanggung oleh agensi-agensi lain yang berkaitan seperti Polis Diraja Malaysia (PDRM) untuk mengawal keselamatan pilihan raya atau siap siaga anggota RELA mengawal keadaan di tempat membuang undi.

Selain itu, sekiranya PRKT dilaksanakan contohnya setiap 2 tahun, ini akan menyebabkan fokus memberi perkhidmatan kepada rakyat terjejas memandangkan terlalu banyak masa dan tenaga ditumpukan kepada proses kempen pilihan raya.

Selama ini juga, PBT masih boleh memberikan perkhidmatan terbaik kepada rakyat tanpa PRKT dan pelaksanaan semula PRKT bukanlah jaminan untuk memastikan perkara tersebut. Melalui sistem sedia ada, Ahli Majlis PBT yang tidak menunjukkan prestasi yang baik boleh digugurkan atau tidak dilantik semula selepas tamat tempoh pelantikan. Mereka yang kurang berprestasi ini digugurkan demi memastikan perkhidmatan kerajaan tempatan khususnya Ahli Majlis PBT tidak terjejas.

Untuk makluman Ahli Yang Berhormat juga, Kementerian Perumahan dan Kerajaan Tempatan (KPKT) sentiasa menggalakkan semua PBT untuk mengadakan mesyuarat penuh secara *live streaming* yang mana ia bertujuan untuk memberi peluang kepada rakyat untuk bersama-sama terlibat dalam mentadbir urus PBT dan meningkatkan keyakinan mereka terhadap ketelusan dan profesionalisme pegawai PBT dan Ahli Majlisnya. Sehingga kini, sebanyak 16 PBT telah mengadakan Mesyuarat Penuh Majlis PBT secara *live streaming*.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIM CHEE KEONG
[BUKIT MERTA JAM]**

TARIKH : 23 MAC 2022 (RABU)

SOALAN

TUAN SIM CHEE KEONG minta **MENTERI KESIHATAN** menyatakan statistik kematian akibat kesan sampingan vaksin, mengikut umur, jantina, kaum, negeri dan komorbiditi jika ada.

JAWAPAN

Tuan Yang di-Pertua,

1. Sepanjang Program Imunisasi COVID-19 Kebangsaan (PICK) ini, Bahagian Regulatori Farmasi Negara (NPRA) telah menerima sebanyak 607 laporan melibatkan kematian (dengan kadar 9 bagi setiap 1 juta dos) di kalangan penerima vaksin telah diterima. Daripada jumlah itu, 82% (498 laporan) adalah melibatkan penerima vaksin berusia 41 tahun dan ke atas manakala 18% (109 laporan) melibatkan penerima vaksin berusia 40 tahun dan ke bawah.
2. Laporan yang diterima ini akan melalui proses penyiasatan oleh pakar perubatan secara klinikal atau makmal bagi menentukan sekiranya terdapat hubung kait dengan vaksin yang telah diterima. Sehingga 11 Mac 2022, tiada laporan kematian yang dapat dikaitkan secara langsung dengan vaksin COVID-19 yang diterima. Sebagai makluman Yang Berhormat.

SOALAN NO : 25

3. Majoriti laporan yang melibatkan kematian di kalangan penerima vaksin (61.8%, 375 laporan) telah mempunyai penyakit kronik seperti *hypertension, diabetes mellitus, heart disease* dan sebagainya.
4. Untuk makluman, Bahagian Regulatori Farmasi Negara (NPRA) menerima semua jenis laporan AEFI yang disyaki atau berkemungkinan disebabkan vaksin.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' RAMLI BIN DATO' MOHD NOR
(CAMERON HIGHLAND)**

TARIKH : 23 MAC 2022 (RABU)

SOALAN

DATO' RAMLI BIN DATO' MOHD NOR (CAMERON HIGHLAND) minta **MENTERI PEMBANGUNAN LUAR BANDAR** menyatakan apakah langkah yang dilakukan oleh Kerajaan dalam memberikan kesedaran kepada ibu bapa pelajar Orang Asli di negeri ini untuk memantau kehadiran anak-anak mereka ke sekolah selepas Perintah Kawalan Pergerakan (PKP) berakhir pada tahun lepas.

JAWAPAN

Tuan Yang di-Pertua,

Kementerian Pembangunan Luar Bandar (KPLB) melalui Jabatan Kemajuan Orang Asli (JAKOA) komited dalam memastikan pendidikan kepada anak-anak Orang Asli terus menjadi agenda utama.

Di antara langkah yang dilakukan oleh Kerajaan dalam memberi kesedaran kepada ibu bapa murid Orang Asli untuk memantau kehadiran anak-anak ke sekolah terutama selepas PKP adalah dengan mengekalkan kerjasama strategik dan pemantauan murid mengikut kohort antara pihak JAKOA dan Kementerian Pendidikan Malaysia (KPM) bagi memastikan peningkatan kehadiran murid Orang Asli ke sekolah. Di antara program yang dilaksanakan adalah Program Intervensi Khas Murid Orang Asli melibatkan pihak sekolah, JAKOA, KPM, Tok Batin, Jawatankuasa Pembangunan dan Keselamatan Kampung Orang Asli (JPPKOA) serta ibu bapa. Program Intervensi Khas Murid Orang Asli ini dilaksanakan bagi mewujudkan sikap keprihatian dan peka pendidikan oleh ibu bapa terhadap anak-anak Orang Asli dan komuniti setempat khususnya.

Kerajaan melalui kerjasama JAKOA dan KPM turut melaksanakan aktiviti turun padang berskala kecil dan berkala iaitu Program Cakna Pendidikan dan Program Jaringan Kasih. Dalam masa yang sama, proses pembelajaran tidak terikat di dalam kelas (*fleksibel classroom*) juga dilaksanakan bagi memastikan pendidikan kepada anak-anak Orang Asli terus dapat disampaikan dengan jayanya.

Bermula pada tahun 2022, peningkatan bayaran insentif wang saku dari RM2.00 kepada RM4.00 dijangka dapat menarik minat murid-murid Orang Asli untuk hadir ke sekolah. Laluan perkhidmatan pengangkutan murid Orang Asli ke sekolah juga telah beroperasi semula seperti biasa mengikut jadual sesi persekolah yang dikeluarkan oleh pihak KPM. Pemakluman dan peringatan kepada ibu bapa untuk memantau persekolahan anak-anak juga disampaikan melalui bengkel yang diadakan kepada Institusi Pengurusan kampung iaitu Batin dan JPPKOA.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

DARIPADA : TUAN CHAN FOONG HIN [KOTA KINABALU]

TARIKH : 23 MAC 2022 (RABU)

SOALAN

TUAN CHAN FOONG HIN [KOTA KINABALU] minta **MENTERI SUMBER MANUSIA** menyatakan apakah sebab-sebab projek perintis Malaysia “One Maid One House” untuk merekrut 10,000 pembantu rumah dari Indonesia mengalami masalah apabila pemeteraian memorandum persefahaman (MOU) antara kedua-dua negara yang sebelum ini dijadualkan pada 7 dan 8 Februari 2022 telah ditangguhkan.

JAWAPAN

Tuan Yang di-Pertua,

Pada peringkat permulaan, pihak Indonesia telah mencadangkan konsep “*One Maid One Task*” kepada Pekhidmat Domestik Indonesia yang akan bekerja di Malaysia dengan menjalankan satu tugas yang telah dilatih. Antara kategori tugas yang dicadangkan adalah tukang masak, penjagaan bayi, penjagaan warga emas dan mengemas rumah bagi satu Pekhidmat Domestik Indonesia sahaja.

Namun begitu, Malaysia telah menyatakan bahawa konsep ini tidak dapat dilaksanakan di Malaysia dan sebagai alternatif konsep “*One Maid One Task*” digantikan dengan konsep “*One Maid One House*” dengan mengambil kira seorang Pekhidmat Domestik Indonesia untuk berkhidmat

SOALAN NO: 27

dengan maksimum 6 orang isi rumah dewasa dan tidak termasuk penjagaan bayi atau warga emas.

Ini adalah asas yang telah dipersetujui bersama oleh kedua belah pihak bagi pengambilan Pekhidmat Domestik Indonesia ke negara ini. Perincian mengenai tugas sebenar Pekhidmat Domestik Indonesia tersebut akan dinyatakan secara jelas di dalam kontrak pekerjaan di antara majikan dengan Pekhidmat Domestik Indonesia.

Pelaksanaan projek rintis kemasukan 10,000 Pekhidmat Domestik Indonesia ini adalah signifikan bagi menilai keberkesanan *One Channel System* iaitu sebagai saluran tunggal untuk kemasukan Pekhidmat Domestik Indonesia ke Malaysia dan sama ada perlunya sebarang penambahbaikan dibuat kepada mekanisme tersebut.

Projek rintis ini juga akan dapat menilai pasaran gaji untuk Pekhidmat Domestik Indonesia di Malaysia khususnya dari aspek kesediaan majikan tempatan untuk membayar gaji permulaan serta pelbagai isu yang perlu dititikberatkan seperti isu kebajikan, perlindungan sosial Pekhidmat Domestik Indonesia, kos-kos perekrutan serta kesihatan lebih-lebih lagi negara kita yang masih lagi berada dalam situasi pandemik Covid-19.

Perkara ini perlu dikaji terlebih dahulu agar ianya tidak menimbulkan sebarang komplikasi kepada majikan serta Pekhidmat Domestik Indonesia yang akan bekerja di negara ini kelak.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB DATO' SRI ROHANI BT. ABDUL KARIM
(BATANG LUPAR)**

TARIKH : 23 MAC 2022 (RABU)

SOALAN

DATO' SRI HAJAH ROHANI BINTI HAJI ABDUL KARIM (BATANG LUPAR) minta **MENTERI DALAM NEGERI** menyatakan tentang apakah justifikasi kepada anak tanpa warganegara, anak terdampar yang ditinggalkan ibu bapa dan anak tak sah taraf yang lahir tanpa perkahwinan sah dengan tidak membenarkan mereka belajar, berkahwin dan bekerja seterusnya diterima berkhidmat untuk negara.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan Akta Pendaftaran Kelahiran dan Kematian 1957 (Akta 299), Ordinan Pendaftaran kelahiran dan Kematian Sabah (CAP123) dan Ordinan Pendaftaran Kelahiran dan Kematian Sarawak (CAP 11), semua kelahiran yang berlaku di Malaysia wajib didaftarkan. Oleh yang demikian, Jabatan Pendaftaran Negara (JPN) tetap akan mendaftarkan kelahiran tersebut tanpa mengira status dokumen pengenalan diri pemohon selagi cukup bukti bahawa kelahiran tersebut berlaku di Malaysia.

Namun demikian, kelahiran seseorang individu di negara ini tidak menjamin kewarganegaraan Malaysia secara automatik bagi individu tersebut. Kaedah pemerolehan kewarganegaraan Malaysia adalah ditetapkan di bawah Bahagian III, Perlembagaan Persekutuan. Penentuan taraf kewarganegaraan seorang kanak-kanak adalah tertakluk kepada taraf kewarganegaraan serta status perkahwinan ibu bapa beliau sewaktu kelahiran kanak-kanak tersebut.

Berhubung kebenaran berkahwin bagi anak tanpa warganegara, anak terdampar yang ditinggalkan ibu bapa dan anak tak sah taraf yang lahir tanpa perkahwinan sah, JPN hanya mendaftarkan perkahwinan dan perceraian bagi pasangan bukan beragama Islam selaras dengan peruntukan di bawah Akta Membaharui Undang-Undang (Perkahwinan dan Perceraian) 1976 [Akta 164] mengikut syarat-syarat yang telah ditetapkan di bawah akta ini.

Manakala bagi isu kebenaran belajar, bekerja dan seterusnya diterima berkhidmat untuk negara adalah tertakluk kepada dasar dan polisi yang ditetapkan Kerajaan melalui Kementerian / Agensi lain yang berkaitan.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN LIM GUAN ENG [BAGAN]

TARIKH : 23 MAC 2022 (RABU)

SOALAN

TUAN LIM GUAN ENG minta **MENTERI KESIHATAN** menyatakan sama ada laporan harian mengenai jangkitan Omicron boleh dipinda dengan menumpu hanya pada kes yang serius kerana varian COVID-19 bergejala ringan dan apakah pandangan KKM terhadap langkah negara barat melonggarkan sekatan selepas dos vaksin ketiga atau keempat serta pelaksanaan SOP tanpa *double-standard*, agar menyelamatkan nyawa dan mata pencarian.

JAWAPAN

Tuan Yang di-Pertua,

1. Bermula pada 16 Februari 2022, Kenyataan Akhbar Ketua Pengarah Kesihatan lebih menumpukan kepada pelaporan data kes-kes yang dimasukkan ke hospital dan kadar penggunaan kapasiti katil COVID-19 di hospital serta Pusat Kuarantin dan Rawatan COVID-19 Berisiko Rendah (PKRC). Pelaporan kes COVID-19 yang serius perlu diteruskan bagi menggambarkan situasi semasa negara dalam berdepan pandemik.
2. Berkenaan perlonggaran sekatan pula, seperti mana yang telah diumumkan oleh YAB Perdana Menteri pada 8 Mac 2022, Malaysia akan memasuki ke fasa 'Peralihan ke Endemik' bermula 1 April 2022 dengan pembukaan lebih banyak aktiviti ekonomi dan sosial termasuklah

SOALAN NO : 29

pembukaan sempadan negara. Namun begitu, KKM berpendapat bahawa amalan pemakaian pelitup muka, penjarakan fizikal, amalan kawalan sendiri serta lain-lain tindakan kawalan dan pencegahan kesihatan awam masih perlu diteruskan bagi membendung penularan atau peningkatan mendadak kes COVID-19 di Malaysia. Pasti nya pelaksanaan SOP tanpa *double-standard* adalah sangat kritikal dan perlu dilakukan ketika ini kerana Malaysia masih berhadapan dengan pandemik COVID-19.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB TUAN SABRI B. AZIT (JERAI)

TARIKH : 23 MAC 2022 (RABU)

SOALAN

TUAN SABRI BIN AZIT (JERAI) minta **MENTERI DALAM NEGERI** menyatakan rancangan Kementerian untuk mengkaji semula jumlah anggota AADK di kawasan Parlimen Jerai memandangkan dua daerah besar iaitu Yan dan Kuala Muda hanya mempunyai 34 anggota dan satu sahaja pejabat AADK di Sungai Petani.

JAWAPAN

Tuan Yang Di Pertua,

Pengukuhan perjawatan bagi pejabat AADK Daerah di seluruh negara sememangnya diberi keutamaan bagi memastikan perkhidmatan AADK dapat disampaikan secara lebih efisien dan sistematik. Pejabat AADK Daerah adalah tunjang perkhidmatan dan penghubung antara agensi dan masyarakat keseluruhannya.

Penugasan AADK Daerah mencakupi skop pendidikan pencegahan, rawatan dan pemulihan terhadap klien dalam komuniti, dan penguatkuasaan. Pada masa kini, Kementerian Dalam Negeri dalam proses mengkaji semula keperluan perjawatan AADK secara menyeluruh termasuk bagi Daerah Kuala Muda dan Daerah Yan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' SRI AZALINA OTHMAN SAID
[Pengerang]**

TARIKH : 23 MAC 2022 (RABU)

SOALAN

**DATO' SRI AZALINA OTHMAN SAID [Pengerang] minta MENTERI
BELIA DAN SUKAN menyatakan :-**

- a) Projek Reben Kuning (*Yellow Ribbon Project*) sedang diteruskan oleh Kementerian; dan
- b) Jika ada, adakah Kementerian merancang untuk melibatkan dan memberi peranan kepada Ahli-ahli Parlimen di dalam pelaksanaan program tersebut di setiap kawasan Parlimen.

JAWAPAN

Tan Sri Yang Di Pertua,

(a)

Untuk makluman Ahli Yang Berhormat, Kementerian melalui Jabatan Belia dan Sukan Negara pada tahun 2018 telah melancarkan *pilot project* bagi pelaksanaan Projek Riben Kuning yang bertujuan untuk memberi peluang kedua kepada belia berisiko seperti bekas pelatih Sekolah Henry Gurney dan bekas banduan muda melalui program kemahiran, sukan, keusahawanan, dan kebolehpasaran.

Pelaksanaan projek ini telah digerakkan secara bersama oleh Kementerian Belia dan Sukan bersama Kementerian Dalam Negeri, Jabatan Penjara Malaysia, Pertubuhan-Pertubuhan Belia, Badan Bukan Kerajaan (NGO) dan badan-badan korporat yang berkaitan.

Pada tahun 2019, seramai 12 orang bekas pelatih Sekolah Henry Gurney telah diberi latihan kemahiran Scaffolding di IKTBN Chembong, Negeri Sembilan seterusnya berjaya mendapat penempatan di Syarikat MKRS Sdn. Bhd. Selain itu, program PEKA@MRCB juga telah menawarkan penempatan pekerjaan kepada 90 Orang Diselia (ODS) bersama MRCB.

Dalam waktu yang sama juga, Program Latihan Sukan Tinju, Angkat Berat dan Muay Thai di Sekolah Henry Gurney Telok Mas Melaka telah melahirkan seramai 80 orang atlet bertaraf kebangsaan yang berjaya merangkul 21 emas, 12 perak dan 15 gangsa di 9 buah kejohanan. Melalui Projek Reben Kuning juga, Kementerian telah berjaya melaksanakan Bengkel Keusahawanan Wanita yang memberi manfaat kepada 40 orang banduan muda wanita dan Program Job Coaching kepada 530 orang bekas banduan, penagih dan pelatih Sekolah Henry Gurney bertujuan untuk meningkatkan kebolehpasaran serta memberi peluang pekerjaan.

SOALAN NO : 31

Pada tahun 2020 inisiatif Projek Reben Kuning dengan kerjasama NGO Belia Mahir dan Pertubuhan Kebangsaan Pekerja Berkemahiran (PKPB) diteruskan dengan program Core Skill Programme - Terminal Tractor Operator (TTO) yang berjaya menempatkan seramai 20 orang belia berisiko di Westport serta program program Peer Volunteer yang bertujuan memberi latihan kepada sukarelawan dalam memberikan bimbingan dan sokongan kepada belia berisiko di lapangan sebenar.

Pada tahun 2021, melalui inisiatif Program Skim Perantisan Nasional (SPN) bersama dengan Belia Mahir dan PKPB telah bekerjasama dengan majikan-majikan seperti Westport, Pelabuhan Tanjung Pelepas dan Ceramtec untuk menyediakan peluang pekerjaan kepada belia berisiko.

Bagi tahun 2022, Kementerian telah merancang untuk melaksanakan 15 program Reben Kuning di peringkat akar umbi dengan mensasarkan penyertaan seramai 150 peserta.

(b)

Berhubung dengan perancangan Kementerian ini untuk melibatkan Ahli-Ahli Parlimen dalam melaksanakan Projek Riben Kuning, Kementerian Belia dan Sukan amat mengalu-alukan Ahli Parlimen untuk turut serta dalam pelaksanaan Program Reben Kuning bagi mengenalpasti belia-belia bermasalah atau bekas-bekas banduan yang terdedah dengan risiko di kawasan masing-masing. Dengan adanya penglibatan daripada Ahli Parlimen sudah pasti mampu memberikan impak yang lebih baik di dalam perlaksanaan program ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

**DARIPADA : DATUK SERI HAJI SALAHUDDIN BIN
AYUB [PULAI]**

TARIKH : 23 MAC 2022 (RABU)

SOALAN

DATUK SERI HAJI SALAHUDDIN BIN AYUB [PULAI] minta **MENTERI SUMBER MANUSIA** menyatakan mengenai kenaikan paras gaji minima kepada RM1,500 serta kenyataan Persekutuan Majikan-Majikan Malaysia (MEF) yang dikeluarkan baru-baru ini.

JAWAPAN

Tuan Yang di-Pertua,

Kerajaan mengambil maklum terhadap kebimbangan pihak majikan berhubung kenaikan gaji minimum yang berpotensi menjejaskan proses pemulihan perniagaan. Namun, terdapat kewajaran untuk kenaikan kadar gaji minimum kepada kadar baharu yang lebih tinggi. Ini adalah berdasarkan perkembangan semasa dengan mengambil kira bantuan kewangan Kerajaan yang telah disalurkan kepada pihak majikan dalam menangani kesan pandemik COVID-19.

Kerajaan telah menyediakan pelbagai bantuan bagi membantu perniagaan melalui lapan pakej rangsangan dan bantuan ekonomi berjumlah RM273.30 bilion antaranya Program Subsidi Upah di bawah Pakej Rangsangan Ekonomi Prihatin Rakyat. Dalam Program ini, majikan menerima antara RM800 hingga RM1,200 subsidi upah sebulan bagi setiap pekerja supaya operasi perniagaan dapat diteruskan dan pekerja dapat dikekalkan.

Kerajaan juga telah memperkenalkan Program JaminKerja untuk menggalakkan penggajian pekerja tempatan dikalangan perantis, graduan dan golongan mudah terjejas serta penganggur. Insentif gaji permulaan di bawah program ini adalah bagi majikan-majikan yang menawarkan gaji pemula pada kadar RM1,500 sebulan selama 6 hingga 12 bulan bergantung kepada kategori.

Melalui pelbagai insentif yang telah disediakan oleh Kerajaan kepada majikan, maka adalah wajar majikan menerima cadangan kenaikan kadar gaji minimum yang baharu.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN ABDUL LATIFF BIN ABDUL
RAHMAN [KUALA KRAI]**

TARIKH : 23 MAC 2022 (RABU)

SOALAN

TUAN ABDUL LATIFF BIN ABDUL RAHMAN [KUALA KRAI] minta **MENTERI KESIHATAN** menyatakan apakah keberkesanan dos penggalak (*booster*) sedangkan kes COVID-19 semakin meningkat dan kesediaan negara mencukupi untuk menerima pelancong kembali ke Malaysia.

JAWAPAN

Tuan Yang di-Pertua,

1. Kementerian Kesihatan Malaysia telah memulakan inisiatif untuk mengelakkan peningkatan semula kes COVID-19 di negara ini terutama di kalangan kumpulan berisiko tinggi dengan pelaksanaan pemberian vaksin dos penggalak dan dos tambahan bermula pada 13 Oktober 2021. Tujuan pemberian dos penggalak adalah untuk memastikan imuniti yang diperolehi selepas menerima dos lengkap dapat dikekalkan untuk tempoh yang optimum khususnya terhadap jangkitan varian-varian yang ada iaitu alpha, beta dan delta.

2. Satu kajian keberkesanan pemberian vaksin dos penggalak di bawah Program Imunisasi COVID-19 Kebangsaan (PICK) di Malaysia telah dilaksanakan oleh Institut Penyelidikan Klinikal (ICR) di bawah Institut Kesihatan Negara (NIH) dan Badan Bertindak Imunisasi COVID-19 (CITF) dan dijalankan dari 1 Oktober hingga 31 Disember 2021 menunjukkan individu yang mengambil dos penggalak mempunyai kadar insiden jangkitan COVID-19, 4 kali lebih rendah daripada yang hanya mengambil dos primer.

3. Analisa data terkini juga telah dijalankan menunjukkan data terkini dari 26 Januari hingga 22 Februari 2022 seperti di dalam Rajah 1-3 , yang menunjukkan bahawa:

- a. Kumpulan individu yang tidak divaksinasi adalah paling berisiko untuk dijangkiti COVID-19 yang serius (terutama pada kategori 4 dan 5) dan juga paling berisiko untuk kematian akibat jangkitan COVID-19.
- b. Kumpulan individu yang telah menerima vaksin COVID-19 dos penggalak (booster) adalah paling terlindung, di mana dapat dilihat jumlah kes yang lebih rendah dijangkiti COVID-19 yang serius (kategori 3, 4, dan 5) dan juga kematian akibat COVID-19 di kalangan penerima dos penggalak berbanding kumpulan yang tidak divaksinasi (*non-vaccinated*) dan kumpulan yang lengkap

divaksinasi tetapi belum menerima dos penggalak (*vaccinated but unboosted*)

4. Secara kesimpulannya, keberkesanan vaksin kurang berkesan bagi mengurangkan jangkitan SARs-CoV-2 selepas 3 bulan terutama varian baru yang lebih tinggi kadar jangkitan seperti varian Delta dan Omicron, yang menyebabkan bilangan kes positif adalah tinggi , iaitu berkadar dengan kepantasan transmisi sesuatu jenis varians. Walau bagaimanapun vaksin dos penggalak dapat memberi perlindungan yang terbaik daripada kematian dan gejala serius COVID-19 dan ini dapat memastikan kapasiti penjagaan kesihatan awam adalah sentiasa berada di dalam tahap optimum.

5. Bagi memastikan Malaysia kembali menerima pelancong, peratus liputan vaksinasi *primary series* bagi individu berumur 12 tahun dan ke atas, hendaklah melebihi 90%, manakala 70% individu yang layak telah menerima dos penggalak bagi memastikan kadar rangsangan imun individu yang telah menerima vaksin dapat menahan jangkitan serius dan seterusnya yang menyebabkan kematian. Selain daripada itu, ibu bapa atau penjaga juga disarankan untuk membenarkan anak-anak berumur 5 hingga bawah 12 tahun untuk segera mendapatkan vaksinasi COVID-19 menerusi Program Imunisasi COVID-19 Kebangsaan Kanak-kanak (PICKids).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. HAJI DZULKEFLY
BIN AHMAD [KUALA SELANGOR]**

TARIKH : 23 MAC 2022 (RABU)

SOALAN

DATUK SERI DR. HAJI DZULKEFLY BIN AHMAD [KUALA SELANGOR] minta **MENTERI KESIHATAN** menyatakan apakah perancangan terkait pemantapan struktur kesihatan awam bagi jangkamasa panjang memadai.

JAWAPAN

Tuan Yang di-Pertua,

1. Program Kesihatan Awam mempunyai pelbagai perancangan bagi memantapkan struktur kesihatan awam bagi jangkamasa panjang. Perkhidmatan penjagaan kesihatan sedang diperkemaskan dan salah satu strategi adalah untuk memperkukuhkan dasar, tadbir urus dan pengawasan dalam kesihatan. Strategi-strategi yang dirancang adalah seperti berikut :

- a) Mencegah dan Mengawal Penyakit Berjangkit dan tidak berjangkit;
- b) Memperkukuh Program Penjagaan Kesihatan untuk Warga Emas;
- c) Meningkatkan Kesiapsiagaan untuk Mengendali Krisis Kesihatan; dan
- d) Memastikan Kualiti dan Kebolehcapaian kepada Perkhidmatan Penjagaan Kesihatan.

2. Selain dari itu, program kesihatan awam merancang untuk memperkukuhkan kesedaran kesihatan dan pemeraksanaan masyarakat. Ini termasuk strategi untuk meningkatkan literasi dan kesedaran kesihatan. Pandemik ini telah memampankan penggunaan teknologi dan inovasi dalam penjagaan kesihatan. Program kesihatan awam juga merancang untuk meningkatkan pendigitalan perkhidmatan penjagaan kesihatan selaras dengan perubahan masa.

3. Antara inisiatif-inisiatif yang sedang dilaksanakan adalah seperti berikut:

- a) Memperkukuhkan Penguatkuasaan Peraturan;
- b) Memperkukuhkan Dasar dan Program Pemakanan Kebangsaan Malaysia;
- c) Memperkukuhkan Penjagaan dan Perkhidmatan Kesihatan Mental di peringkat Komuniti;
- d) Meningkatkan Program Kesedaran Penuaan dan Penjagaan Kesihatan;
- e) Meningkatkan Uberisasi Perkhidmatan Kesihatan;
- f) Mempergiatkan Pemeraksanaan Individu, Keluarga dan Komuniti menerusi Agenda Nasional Malaysia Sihat (ANMS);
- g) Melaksanakan inisiatif *Electronic Medical Record* (EMR) kebangsaan ke arah pembangunan *Lifetime Health Record* (LHR) untuk mencapai Sistem Maklumat Kesihatan Bersepadu;
- h) Membangunkan Ekosistem Analitik Data Raya Kesihatan (*Big Data Analytics*); dan
- i) Memperkukuhkan Keupayaan Penyelidikan dan Inovasi Kesihatan Digital.

4. Selain itu, Kementerian Kesihatan juga ketika ini sedang membangunkan Kertas Putih Kesihatan sebagai suatu usaha mengukuhkan sistem kesihatan negara secara menyeluruh agar perkhidmatan kesihatan lebih saksama (*equitable*), berkualiti tinggi, mudah diakses dengan kos berpatutan dan mampan untuk jangka masa panjang. Kertas Putih Kesihatan ini dijangka akan dibentangkan di Parlimen pada November 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB TUAN SANISVARA NETHAJI RAYER A/L
RAJAJI (JELUTONG)**

TARIKH : 23 MAC 2022 (RABU)

SOALAN

TUAN SANISVARA NETHAJI RAYER A/L RAJAJI (JELUTONG) minta **MENTERI DALAM NEGERI** menyatakan bagaimanakah Long Tiger (Abd Hamim Abd Hamid) dapat meloloskan diri dari tempat tahanan (lokap) mahkamah tangkap di Johor pada bulan Disember 2021.

JAWAPAN

Tuan Yang Di Pertua,

Pada 15/12/2021, Abdul Hamim Bin Ab Hamid iaitu suspek telah dibawa oleh anggota pengiring ke Lokap Mahkamah Majistret Tangkak, Johor untuk perbicaraan kes di bawah seksyen 388 Kanun Keseksaan (Pemerasan) bersama-sama dengan pesalah-pesalah lain.

Pada 10.00 pagi, dua anggota pengiring telah meninggalkan Mahkamah untuk membawa balik pesalah lain ke IPD Tangkak. Semasa kejadian, dua (2) anggota Polis Mahkamah berada di hadapan pintu belakang mahkamah bersama Timbalan Pendakwa Raya untuk perbincangan mengenai kehadiran saksi kes perbicaraan suspek tersebut.

Pada jam 11.15 pagi, anggota pengiring telah membawa balik kesemua pesalah balik ke Lokap Balai kecuali suspek memandangkan perbicaraan

kesnya masih belum dimulakan. Suspek kemudiannya telah ditinggalkan oleh dua (2) orang anggota pengiring di dalam lokap Mahkamah Majistret dengan hanya menggunakan selak dan tidak mengunci dengan mangga.

Sekitar 11.55 pagi mereka terdengar jurubahasa mahkamah, Encik Muhammad Azuan bin Yusof menjerit menyatakan bahawa suspek telah keluar melalui pintu depan Mahkamah dan menghala ke pintu pagar utama Mahkamah. Seorang anggota polis bersama seorang pengawal keselamatan telah mengejar suspek sehingga lebih kurang 300 meter tetapi suspek berjaya melarikan diri dengan masuk ke dalam kawasan semak berdekatan Sekolah Rendah Jenis Kebangsaan Tamil Tangkak.

Ekoran insiden ini, pada 20/01/2022 suspek telah dituduh dibawah seksyen 224 Kanun Keseksaan di Mahkamah Majistret Tangkak dan dijatuhkan hukuman penjara 12 bulan. Manakala, dua orang (2) anggota polis telah dituduh di bawah seksyen 223 Kanun Keseksaan di Mahkamah Majistret Tangkak dan dua (2) orang anggota polis lagi dikenakan tindakan tatatertib.

Kes disiasat di bawah seksyen 223/224 Kanun Keseksaan (penjawat awam dengan cuai membiarkan seseorang lari dari pengurungan atau tentangan terhadap penangkapan yang sah dari segi undang-undang).

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' ABDULLAH SANI BIN ABDUL
HAMID [KAPAR]**

TARIKH : 23 MAC 2022 (RABU)

SOALAN

DATO' ABDULLAH SANI BIN ABDUL HAMID [KAPAR] minta **MENTERI KESIHATAN** menyatakan apakah tindakan wajar yang akan atau telah diambil terhadap orang yang mendapat kesan sampingan yang teruk kepada kesihatan setelah menerima suntikan dos vaksin penggalak.

JAWAPAN

Tuan Yang di-Pertua,

1. Penerima vaksin yang mengalami kesan sampingan yang serius perlu mendapatkan nasihat dan rawatan segera dari fasiliti kesihatan yang berdekatan. Rawatan segera adalah penting agar kesan mudarat dapat dikurangkan dan laporan yang lengkap dapat diperolehi untuk siasatan lanjut. Dalam situasi ini, laporan Kesan Advers Susulan Imunisasi (AEFI) akan dibuat melalui anggota kesihatan yang merawat kes tersebut melalui laman sesawang NPRA atau *Pharmacy Information System* (PhIS) bagi fasiliti Kementerian Kesihatan Malaysia (KKM).
2. Semua AEFI serius termasuk kes kematian yang dilaporkan akan disiasat dengan teliti dan menyeluruh oleh pasukan penyiasat yang ditubuhkan berdasarkan laporan perubatan pesakit dan laporan bedah siasat sekiranya ada. Seterusnya penilaian hubungkait antara kesan dan vaksin yang diambil akan dijalankan oleh Jawatankuasa Farmakovigilans

Khas Vaksin COVID-19 (JFK). Ahli-ahli JFK terdiri daripada pakar-pakar dari pelbagai bidang termasuk kardiologi, imunologi, hematologi, neurologi, perubatan dalaman, patologi, penyakit berjangkit, geriatrik dan forensik dari fasiliti KKM, universiti dan swasta. *Literature review* juga akan dijalankan bagi melihat laporan yang berkaitan di peringkat global. Hasil penilaian pihak JFK akan dimaklumkan kepada fasiliti kesihatan.

3. Semua laporan seterusnya akan dibentangkan kepada Jawatankuasa Penasihat Kesan Advers Ubat Kebangsaan (MADRAC) sebelum dihantar kepada pangkalan data global *World Health Organisation* (WHO). Cadangan untuk melaksanakan tindakan regulatori terhadap penggunaan vaksin akan dikemukakan kepada Pihak Berkuasa Kawalan Dadah (PBKD), jika perlu.

4. Namun, daripada pemantauan KKM, kesan serius jarang berlaku. Setakat ini berdasarkan hasil penilaian JFK, hanya sebilangan kecil sahaja iaitu sekitar 8% daripada AEFI serius yang dilaporkan, mempunyai hubungkait secara langsung dengan vaksin COVID-19 yang diberikan.

5. Warganegara Malaysia yang menerima vaksin COVID-19 di bawah Program Imunisasi COVID-19 Kebangsaan (PICK) dan mendapat kesan sampingan yang serius selepas menerima vaksin COVID-19 layak memohon Bantuan Khas Kewangan Kesan Mudarat Vaksin COVID-19 oleh Kerajaan. Borang permohonan dan kaedah memohon boleh dimuat turun daripada laman sesawang <https://covid-19.moh.gov.my/garis-panduan/garis-panduan-kewangan-kkm>.

6. Bantuan Khas Kewangan Kesan Mudarat Vaksin COVID-19 ini akan dipertimbangkan berdasarkan kriteria yang perlu dipenuhi iaitu *Adverse Events Following Immunisation* (AEFI) yang berlaku dalam tempoh tiga (3) bulan daripada menerima vaksin mesti dikategorikan sebagai serius berdasarkan laporan penilaian oleh Jawatankuasa Farmakovigilans Khas Vaksin COVID-19 (JFK) dan laporan AEFI hendaklah dihantar kepada Bahagian Regulatori Farmasi Negara (NPRA) oleh anggota kesihatan yang merawat pesakit.

7. Amaun Bantuan Khas Kewangan Kesan Mudarat Vaksin COVID-19 yang telah ditetapkan adalah tidak melebihi RM50,000 jika berlaku kesan advers yang serius kepada penerima vaksin COVID-19 yang memerlukan rawatan berpanjangan di hospital dan tidak melebihi RM500,000 jika berlaku hilang upaya kekal atau kematian disebabkan vaksin COVID-19. Amaun bantuan sebenar kepada individu yang terkesan oleh AEFI akan ditentukan berdasarkan perakuan oleh Jawatankuasa Teknikal Perubatan (JTP) dan diputuskan oleh Jawatankuasa Induk Bantuan Khas Kewangan Kesan Mudarat Vaksin COVID-19.

8. Hingga 28 Februari 2022, sebanyak seratus sembilan puluh tiga (193) permohonan Bantuan Khas Kewangan Kesan Mudarat Vaksin COVID-19 telah diterima oleh Kementerian Kesihatan. Daripada jumlah tersebut, sebanyak tujuh belas (17) permohonan telah diluluskan oleh Jawatankuasa Induk Bantuan Khas Kewangan Kesan Mudarat Vaksin melibatkan jumlah sebanyak RM195,000.

9. Sebanyak seratus lima puluh tiga (153) permohonan masih dalam penilaian manakala dua puluh tiga (23) permohonan telah ditolak. Daripada seratus lima puluh tiga (153) permohonan tersebut, sembilan puluh enam (92) permohonan dalam penilaian Jawatankuasa Farmakovigilans Khas Vaksin COVID-19 (JFK) manakala enam puluh satu (61) permohonan dalam penilaian Jawatankuasa Teknikal Perubatan (JTP).

10. Bagi individu yang mendapat kesan sampingan (AEFI) yang berlarutan, individu ini akan dipantau dan diberikan rawatan susulan berdasarkan simptom dan diagnosis.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN
DARIPADA : PUAN RUSNAH BINTI ALUAI [TANGGA BATU]
TARIKH : 23 MAC 2022 (RABU)

SOALAN

PUAN RUSNAH BINTI ALUAI [TANGGA BATU] minta **MENTERI SUMBER MANUSIA** menyatakan adakah Kementerian bercadang memudahkan prosedur kelulusan permit kepada warga asing yang telah berada di Malaysia dan memberi pilihan bidang kemahiran kepada mereka dengan tidak menjejaskan peluang rakyat tempatan.

JAWAPAN

Tuan Yang di-Pertua,

Pengeluaran permit kepada warga asing seperti Pas Residen, Kad Burung-Burung, IIM13, dan sebagainya termasuklah Pas Lawatan Kerja Sementara adalah tertakluk di bawah kelulusan Kementerian Dalam Negeri.

Berhubung pilihan bidang kemahiran, sebarang permohonan daripada syarikat untuk menggajikan warga asing berkemahiran adalah menerusi permohonan penggajian pegawai dagang (ekspatriat) dan permohonan ini juga perlu melalui proses 30 hari pengiklanan di portal MYFutureJobs bagi memberi peluang bakat tempatan untuk mengisi kekosongan.

Setelah itu, semua permohonan penggajian ekspatriat akan dibawa ke Mesyuarat Jawatankuasa Penggajian Pegawai Dagang di peringkat Kementerian Sumber Manusia bagi proses tapisan awal sama ada ia akan dipertimbangkan untuk penggajian ekspatriat atau ianya boleh diisi oleh bakat tempatan. Seterusnya, kelulusan akhir adalah di peringkat Jawatankuasa Ekspatriat di Kementerian Dalam Negeri.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : DATUK ZAKARIA BIN MOHD. EDRIS @
TUBAU [LIBARAN]**

TARIKH : 23 MAC 2022 (RABU)

SOALAN

DATUK ZAKARIA BIN MOHD. EDRIS @ TUBAU [LIBARAN] minta **MENTERI SUMBER MANUSIA** menyatakan adakah kenaikan gaji minimum dalam keadaan semasa pandemik dan banyak perniagaan masih kekal rapuh akan memberi kesan yang tidak diingini kepada ekonomi negara.

JAWAPAN

Tuan Yang di-Pertua,

- (a) Kerajaan mengambil maklum respon pihak industri/majikan yang telah disuarakan melalui beberapa kenyataan media berhubung cadangan pelaksanaan gaji minimum baharu. Pihak majikan bersuara bahawa ini bukan masa yang terbaik untuk mengkaji semula Perintah Gaji Minimum. Namun dalam masa yang sama, Kerajaan juga perlu menimbangkan kedudukan pekerja yang turut terjejas dengan COVID-19 dan peningkatan kos sara hidup.

Dalam hal ini, penetapan kadar gaji minimum ini dilaksanakan dengan menggunakan pendekatan seimbang (*balanced approach*) iaitu mengambil kira kepentingan pihak majikan, pekerja dan kerajaan bagi menjamin kelangsungan operasi syarikat serta memastikan pekerjaan pekerja dapat dikekalkan. Peningkatan kadar gaji minimum yang terlalu tinggi dan drastik boleh menjejaskan daya saing negara menyebabkan pasaran buruh negara akan berdepan dengan cabaran untuk mencipta pekerjaan baharu yang berkualiti dan berkemahiran tinggi.

YAB Perdana Menteri pada 19 Mac 2022 telah mengumumkan bahawa Perintah Gaji Minimum 2022 dengan kadar RM1,500.00 akan dikuatkuasakan mulai 1 Mei 2022. Pada ketika ini satu penelitian sedang dibuat berkaitan kaedah pelaksanaan Perintah Gaji Minimum 2022 ini.

Tuan Yang di-Pertua,

- (b) Selaras dengan keperluan Akta Majlis Perundangan Gaji Negara 2011 [Akta 732], Perintah Gaji Minimum hendaklah dikaji semula sekurang-kurangnya sekali dalam setiap dua tahun. Kajian semula Perintah Gaji Minimum dilaksanakan bagi mengemukakan syor kadar gaji minimum baharu kepada Kerajaan.

SOALAN NO : 38

Kerajaan yakin pembukaan semula sektor ekonomi secara berperingkat melalui fasa dalam Pelan Pemulihan Negara akan memberikan kesan positif. Pada masa ini kebanyakan perniagaan dilihat menunjukkan trend peningkatan. Keluaran Dalam Negara Kasar Malaysia mencatatkan peningkatan 3.6 peratus pada suku keempat 2021.

Peningkatan ini dapat dicapai dengan bantuan kewangan Kerajaan kepada pihak majikan bagi meneruskan operasi perniagaan serta mengekalkan pekerjaan pekerja. Berdasarkan unjuran dalam dokumen Bajet 2022, prestasi ekonomi dijangka akan berkembang pada kadar 5.5 hingga 6.5 peratus pada tahun 2022.

Kenaikan gaji minimum ini dijangka akan dapat menyumbang kepada pendapatan isi rumah yang lebih tinggi, meningkatkan sumbangan pampasan pekerja terhadap Keluaran Dalam Negara Kasar sebanyak 40 peratus serta mencapai sasaran gaji dan upah penengah bulanan sebanyak RM2,900 menjelang tahun 2025 sebagaimana dihasratkan dalam Rancangan Malaysia Kedua Belas. Kerajaan berharap pelaksanaan kadar gaji minimum baharu dapat memberi impak yang positif kepada negara.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN CHARLES ANTHONY
SANTIAGO [KLANG]**

TARIKH : 23 MAC 2022 (RABU)

SOALAN

TUAN CHARLES ANTHONY SANTIAGO [KLANG] minta **MENTERI KESIHATAN** menyatakan berapa bilangan kanak-kanak di bawah umur persekolahan yang menghidap kanser. Mengapakah kanak-kanak ini dikenakan bayaran apabila menjalani rawatan kanser di hospital awam, sedangkan kanak-kanak yang masih bersekolah tidak dikenakan bayaran.

JAWAPAN

Tuan Yang di-Pertua,

1. Semenjak tahun 2007 sehingga kini, kumulatif bilangan kes kanser kanak-kanak yang berlaku dalam kalangan kanak-kanak berumur 6 tahun dan ke bawah yang dilaporkan ke Jabatan Registri Kanser Kebangsaan adalah berjumlah 4,408.

2. Lima (5) jenis kanser utama di kalangan kanak-kanak ini adalah leukemia, kanser otak dan sistem saraf, limfoma, kanser tulang dan kanser mata. Kadar insiden untuk kanser kanak-kanak bawah 6 tahun adalah 10 kes baru bagi 100,000 populasi dan dianggarkan 200 hingga 250 kes baru setiap tahun untuk kanak-kanak bawah 6 tahun. Tiada perbezaan nyata untuk jenis-jenis kanser jika dibandingkan antara jantina lelaki dan perempuan di mana leukemia, kanser otak dan sistem saraf, limfoma merupakan 3 jenis kanser yang biasa didapati untuk kedua-dua

kategori jantina ini.

3. Walau bagaimanapun, jantina lelaki mendominasi kadar insiden sebanyak 2.5 per 100,000 populasi (56.4%) dan jantina perempuan 2.0 per 100,000 populasi (43.6%). Dari segi etnik, kanak-kanak berketurunan Melayu menunjukkan kadar insiden tertinggi diikuti Cina dan India untuk kedua-dua jantina.

4. Untuk makluman Ahli-Ahli Yang Berhormat, selaras dengan peruntukan di bawah Perintah Fi (Perubatan) 1982, semua kanak-kanak sekolah berstatus warganegara yang berumur tidak melebihi 21 tahun serta mempunyai surat pengesahan persekolahan diberikan pengecualian caj rawatan pesakit luar dan wad kelas 2 di fasiliti Kementerian Kesihatan. Ini juga termasuklah caj rawatan kanser di hospital-hospital Kerajaan yang memberi rawatan kanser kepada kanak-kanak tersebut di atas.

5. Untuk makluman Ahli-Ahli Yang Berhormat juga, kanak-kanak warganegara yang tidak bersekolah turut menikmati kemudahan perubatan dengan caj perubatan yang rendah iaitu caj RM1 untuk rawatan pesakit luar dan caj maksimum RM500 untuk caj wad kelas 3 bagi pesakit dalam.

6. Selain itu, pengecualian bayaran turut diberikan di bawah Perintah Fi (Perubatan) 1982 kepada kanak-kanak berstatus warganegara yang tidak bersekolah dan berumur 12 tahun ke bawah untuk semua bayaran hospital serta wad kelas 3 bagi golongan miskin dan tidak berkemampuan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB PUAN MARIA CHIN ABDULLAH (PETALING
JAYA)**

TARIKH : 23 MAC 2022 (RABU)

SOALAN

PUAN MARIA CHIN BINTI ABDULLAH (PETALING JAYA) minta **MENTERI DALAM NEGERI** menyatakan berapa MyTravelPass telah diluluskan untuk warga asing mengikut warganegara dan jantina untuk tempoh April 2020 – Disember 2021 dan adakah MyTravelPass masih diguna pakai untuk warga asing masuk Malaysia.

JAWAPAN

Tuan Yang Di Pertua,

Jabatan Imigresen Malaysia melancarkan MyTravelPass bermula 7 Oktober 2022 bagi menguruskan permohonan kebenaran masuk dan ke luar negara secara dalam talian untuk warganegara Malaysia dan warganegara asing. Sistem ini boleh diakses oleh orang ramai melalui laman web rasmi Jabatan Imigresen Malaysia iaitu www.imi.gov.my atau mtp.imi.gov.my. Pewujudan sistem tersebut adalah selaras dengan usaha Kerajaan untuk menambah baik sistem penyampaian perkhidmatan Kerajaan melalui pendigitalan.

Melalui MyTravelPass, warga asing yang ingin memasuki negara bagi tujuan yang dibenarkan perlu mengemukakan permohonan dan lampiran dokumen sokongan berkaitan.

Dari 7 Oktober 2020 hingga 31 Disember 2021 sebanyak 183,518 permohonan warga asing dan penduduk tetap telah diluluskan untuk masuk ke negara menggunakan MyTravelPass. Kewarganegaraan tertinggi yang diluluskan masuk adalah warganegara China iaitu seramai 27,310 orang. Ini diikuti oleh warganegara India seramai 24,884 orang dan warganegara Indonesia seramai 16,875 orang.

Penggunaan MyTravelPass akan diteruskan sehingga Kerajaan memutuskan pembukaan sepenuhnya sempadan negara.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : PUAN VIVIAN WONG SHIR YEE [SANDAKAN]

TARIKH : 23 MAC 2022 (RABU)

SOALAN

PUAN VIVIAN WONG SHIR YEE [SANDAKAN] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah rancangan jangka pendek dan jangka panjang pihak Kementerian untuk membendung kenaikan harga yang sangat mendadak bagi barangan makanan asas di negara ini, khususnya di Sabah.

JAWAPAN:

Yang di-Pertua,

Rancangan Jangka Pendek yang diambil adalah mengadakan Skim Harga Maksimum Musim Perayaan dan Skim Harga Maksimum Keluarga Malaysia bagi menetapkan harga maksimum untuk barangan tertentu pada tempoh tertentu. Kerajaan turut melaksanakan Penentuan Harga Maksimum bagi Ayam dan Telur Ayam sehingga 5 Jun 2022 ini bagi memberikan kestabilan harga kepada kedua-dua item penyumbang sumber protein utama penduduk Negara ini. Kerajaan juga melaksanakan Program Jualan Keluarga Malaysia (PJKM) di seluruh negara di lokasi tertentu yang menawarkan jualan harga yang berpatutan bagi barang keperluan pengguna. Harga yang ditetapkan adalah lebih rendah dan

munasabah berbanding harga di luar tempoh kawalan.

Skim Harga Malaysia Musim Perayaan Tahun Baru Cina 2022 berlangsung dari 29 Januari 2022 hingga 4 Februari 2022 telah melibatkan 8,150 pemeriksaan premis di seluruh negara. Manakala Skim Harga Maksimum Keluarga Malaysia dilaksanakan pada 1 Januari 2022 hingga 4 Februari 2022 yang melibatkan 43,348 jumlah pemeriksaan premis. Penentuan Harga Maksimum bagi Ayam dan Telur Ayam pula melibatkan 13,623 premis telah diperiksa sehingga 21 Februari 2022

Pelan Jangka Panjang adalah Kementerian sentiasa memantau secara berterusan isu kenaikan harga mendadak yang berlaku melalui pemantauan dan pemeriksaan secara langsung ke atas premis yang mengalami isu tersebut. Mana-mana peniaga yang didapati menaikkan harga barangan secara melampau, notis bertulis akan dikeluarkan kepada peniaga dan sekiranya selepas dianalisa didapati mencatut, kesalahan dibawah Sek. 14 AKHAP boleh diambil ke atas mereka.

Kementerian juga sentiasa bekerjasama rapat dengan MAFI dalam memastikan bekalan makanan mencukupi dan stabil serta berada pada paras harga yang stabil dan munasabah. Libat urus berterusan dengan industri, pengeluar, pengimport, pemborong, peruncit, persatuan pengguna dan lain-lain pihak berkaitan, tetap dijalankan dari masa ke semasa tanpa gagal.

Penduduk Sabah dan luar bandar yang dikenal pasti telah menikmati harga barangan murah kesan Program *Community Drumming*. Kerajaan telah menampung kos pengangkutan barang ke pedalaman Sabah bagi menjamin harga barang tersebut hampir sama harga Semenanjung Malaysia. Perbelanjaan sebanyak RM60 juta telah dikeluarkan bagi pelaksanaan progam ini untuk tahun 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB TUAN SYED IBRAHIM BIN SYED NOH
(LEDANG)**

TARIKH : 23 MAC 2022 (RABU)

SOALAN

TUAN SYED IBRAHIM BIN SYED NOH (LEDANG) minta **MENTERI
DALAM NEGERI** menyatakan perkembangan usaha penilaian dan
penstrukturan semula gaji pegawai serta anggota polis berpandukan Had
Pendapatan Garis Kemiskinan (PGK) terkini.

JAWAPAN

Tuan Yang Di Pertua,

Polis Diraja Malaysia (PDRM) pernah mengemukakan cadangan kajian gaji Pegawai dan anggota polis kepada pihak Jabatan Perkhidmatan Awam (JPA) pada tahun 2019. Maklumbalas pihak JPA melalui surat bertarikh 10 Februari 2020 berpandangan permohonan semakan gaji perlu diperhalusi dan dikaji secara menyeluruh meliputi semua skim perkhidmatan dengan mengambilkira keharmonian dalam perkhidmatan awam. Lazimnya, pemberian kenaikan atau pelarasan gaji akan melibatkan keseluruhan perkhidmatan awam. Semua cadangan yang dikemukakan oleh PDRM akan dilihat bersekali dengan kajian saraan perkhidmatan awam untuk dibawa kepada pertimbangan Kerajaan dengan mengambil kira kedudukan semasa kewangan Kerajaan.

Pada 17 Oktober 2021 YAB Perdana Menteri, Datuk Seri Ismail Sabri Yaakob semasa sidang akhbar Majlis Perasmian naik taraf IPD Bera telah memaklumkan bahawa Kementerian Dalam Negeri (KDN) akan membincangkan isu gaji pegawai dan anggota polis dengan kementerian dan agensi berkaitan kerana ia memerlukan kajian lebih menyeluruh. Beliau berkata, perbincangan itu antara lain melibatkan Kementerian Kewangan (MOF) dan Jabatan Perkhidmatan Awam (JPA) dan yakin perbincangan awal berkaitan isu itu sudah berlangsung.

Berdasarkan kenyataan YAB Perdana Menteri ini, Polis Diraja Malaysia (PDRM) sekali lagi dalam proses menyediakan kertas kajian cadangan Gaji Baharu melibatkan Pegawai Polis yang sedang berkhidmat terdiri daripada Kumpulan Pengurusan dan Profesional serta Kumpulan Pelaksana. Kajian ini di dalam peringkat akhir dan akan dibentangkan kepada YDH Ketua Polis Negara untuk mendapatkan pandangan dan persetujuan sebelum cadangan ini dimajukan sekali lagi kepada Kementerian Dalam Negeri (KDN) dan seterusnya ke Jabatan Perkhidmatan Awam (JPA) untuk pertimbangan.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : **LISAN**

DARIPADA : **TUAN CHA KEE CHIN [RASAH]**

TARIKH : **23 MAC 2022 (RABU)**

SOALAN

TUAN CHA KEE CHIN [KLANG] minta **MENTERI KESIHATAN** menyatakan apakah perbezaan daripada segi keberkesanan dan tempoh perlindungan untuk mereka yang mengambil dos penggalak jenis Pfizer dibandingkan dengan Sinovac, jika dos pertama dan kedua adalah jenis Sinovac. Apakah Kementerian akan membenarkan pengambilan vaksin selain Pfizer untuk kanak-kanak.

JAWAPAN

Tuan Yang di-Pertua,

1. Perlindungan ke atas individu yang menerima dos penggalak setelah menerima dos primer bermula sebaik sahaja dos penggalak tersebut diberikan.
2. Terdapat perbezaan daripada segi keberkesanan di kalangan penerima dos penggalak *heterologous* (Vaksin Pfizer) dan *homologous* (vaksin Sinovac) bagi penerima vaksin primer Sinovac. Bukti-bukti terkini yang diperolehi di peringkat global adalah konsisten dan menunjukkan bahawa penggunaan dos penggalak secara *heterologous* dapat menghasilkan tindak balas imun yang lebih berkesan daripada *homologous* bagi penerima vaksin primer Sinovac. Antara bukti- bukti saintifik tersebut adalah :

i. Kajian yang dijalankan bagi membandingkan tahap imuniti penerima dos penggalak *heterologous* dan *homologous* di kalangan penerima vaksin primer Sinovac.

- Hasil dapatan kajian di Hong Kong SAR mendapati kumpulan penerima vaksin primer sinovac yang diberikan dos penggalak Pfizer menunjukkan peningkatan tahap peneutralan antibodi terhadap varian Omicron selepas 3-5 minggu. Sebaliknya, kebanyakan penerima vaksin primer Sinovac yang menerima dos penggalak Sinovac secara homologous, tidak menunjukkan sebarang tindak balas peneutralan antibodi terhadap varian Omicron.
- Kajian lain yang dijalankan di Brazil, melaporkan bahawa penggunaan dos penggalak secara heterologous (dos penggalak yang digunakan adalah AstraZeneca, Pfizer atau Janssen) mencatatkan peningkatan tahap peneutralan antibodi yang ketara bagi kes varian Delta dan Omicron di mana sekurang-kurangnya 90% penerima menjadi seropositif. Bagi penggunaan dos penggalak Sinovac secara homologous menunjukkan tindak balas yang lebih rendah terhadap Omicron, di mana hanya 35% penerima menjadi seropositif.

ii. Kajian *Real World Evidence*

- Kajian Real-World yang dijalankan di Chile di kalangan 11.2 juta individu, tahap keberkesanan dos penggalak Sinovac homologous (menerima dua dos Sinovac sebelum ini) adalah 78.8%, manakala penerima dos penggalak Pfizer heterologous (menerima dua dos Sinovac sebelum ini) adalah 96.5%. Kajian ini turut melaporkan penggunaan dos penggalak AstraZeneca (menerima dua dos Sinovac sebelum ini) adalah 93.2% berkesan terhadap jangkitan bergejala COVID-19. Keberkesanan dos penggalak heterologous (Pfizer atau AstraZeneca) terbukti lebih tinggi terhadap kemasukan ke hospital untuk COVID-19, unit

rawatan rapi dan kematian berbanding dos penggalak secara *homologous*.

- Di Malaysia, *The Real-World Effectiveness of COVID-19 Vaccine under the Malaysian National COVID-19 Immunisation Program (RECoVaM)* telah membuat perbandingan di antara kadar jangkitan COVID-19 di kalangan penerima dos penggalak dengan penerima dua dos lengkap. Hasil kajian menunjukkan bahawa :
 - a. Kemungkinan untuk dijangkiti COVID-19 **menurun sekurang-kurangnya 90% bagi individu yang telah menerima dos penggalak berbanding dengan individu yang hanya menerima dua dos lengkap (vaksin primer).**
 - b. **Kajian juga mendapati penggunaan dos penggalak *heterologous* (vaksin Sinovac bagi dos primer diikuti oleh vaksin Pfizer bagi dos penggalak) memberikan perlindungan sebanyak 94% terhadap jangkitan COVID- 19 berbanding dengan penerima dos penggalak homologous (vaksin Sinovac bagi dos primer diikuti oleh vaksin Sinovac bagi dos penggalak) 92%.**

3. Tempoh perlindungan dos penggalak tidak hanya bergantung kepada **individu** namun turut bergantung kepada beberapa faktor lain termasuk data Epidemiologi di peringkat global dan dalam negara, kehadiran *variant of concerns* termasuk varian Omicron yang mudah merebak, kadar liputan vaksinasi di peringkat komuniti dan negara termasuk dos penggalak, pematuhan komuniti terhadap SOP serta langkah kesihatan awam. Situasi ini adalah dinamik dan adalah sukar untuk menjangkakan tempoh perlindungan tanpa disandar kepada fakta-fakta yang tepat serta mengambil kira semua faktor- faktor yang berkaitan dengan dos penggalak. KKM akan sentiasa memantau perkembangan terkini berkaitan tempoh perlindungan dos penggalak dari masa ke semasa.

4. Sebelum ini hanya vaksin Comirnaty formulasi kanak-kanak telah diluluskan bagi kanak-kanak berumur bawah 12 tahun. Walau bagaimanapun, pada 3 Mac 2022, PBKD telah memberikan kelulusan bersyarat bagi penggunaan vaksin CoronaVac Suspension for Injection COVID-19 Vaccine (Vero Cell), Inactivated keluaran Sinovac Life Sciences Co. Ltd., China dan Pharmaniaga Lifescience Sdn. Bhd., Malaysia kepada kanak-kanak berusia 5 hingga 11 tahun. Penilaian data yang melibatkan *immuno-bridging analysis* menunjukkan bahawa vaksin CoronaVac dapat menghasilkan tindak balas imun yang lebih tinggi pada golongan kanak-kanak berbanding dengan golongan remaja dan dewasa. Hasil kajian klinikal pula menunjukkan vaksin ini adalah selamat dengan regimen 2 dos di mana satu dos adalah 0.5ml dan dos kedua diberikan 28 hari selepas hari pertama.

5. Laporan AEFI daripada negara China yang melibatkan penggunaan 211 juta dos vaksin CoronaVac di kalangan kanak-kanak dan remaja juga menunjukkan bahawa vaksin ini adalah selamat dan kebanyakan kesan sampingan yang dilaporkan adalah bertahap ringan dan sederhana serta bersifat sementara. Setiap vaksin COVID-19 termasuk vaksin yang akan digunakan di kalangan kanak-kanak perlu melepasi penilaian ketat oleh Bahagian Regulatori Farmasi Negara (NPRA) serta mendapat kelulusan pendaftaran bersyarat daripada PBKD.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN STEVEN CHOONG SHIAU YOON
(TEBRAU)**

TARIKH : 23 MAC 2022 (RABU)

SOALAN

TUAN STEVEN CHOONG SHIAU YOON (TEBRAU) minta **MENTERI PERUMAHAN DAN KERAJAAN TEMPATAN** menyatakan tindakan efektif yang diambil bagi memastikan kedai yang menjual barang/keperluan mencukupi ditempatkan di kawasan yang terancang serta cara mengatasi terhadap warung-warung yang wujud dengan keadaan yang tidak terurus serta tiada kebersihan di semua kawasan PPR di bawah seliaan KPKT.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) sentiasa peka dan prihatin terhadap permasalahan yang dihadapi oleh penduduk Program Perumahan Rakyat (PPR) terutamanya dalam aspek kebersihan, keselamatan, kesihatan dan penjagaan alam sekitar. Ini adalah bagi memastikan persekitaran PPR berada dalam keadaan yang kondusif serta berdaya huni (livable) kepada kumpulan sasar, terutamanya golongan berpendapatan rendah.

Merujuk kepada pertanyaan Ahli Yang Berhormat berhubung tindakan efektif yang diambil bagi memastikan kedai yang menjual barang/keperluan mencukupi ditempatkan di kawasan yang terancang, KPKT sentiasa memastikan perancangan pembinaan PPR turut menyediakan **1 unit kedai bagi setiap 100 unit rumah**. Pembinaan kedai ini adalah termasuk kedai runcit, kedai makan dan juga kedai dobi yang menawarkan perkhidmatan asas untuk manfaat penduduk. Antara syarat-syarat permohonan penyewaan kedai PPR di bawah seliaan KPKT adalah seperti berikut:

- (i) keutamaan diberikan kepada penghuni PPR;
- (ii) perakuan tidak muflis;
- (iii) berdaftar dengan Suruhanjaya Syarikat Malaysia (SSM); dan
- (iv) mempunyai pengalaman dalam bidang perniagaan.

Dalam hubungan yang sama, pihak Kementerian juga menetapkan harga sewaan kedai di PPR pada kadar yang berpatutan **mengikut kadar yang telah ditetapkan oleh Jabatan Penilaian dan Perkhidmatan Harta (JPPH) negeri berkenaan**. Ini adalah bagi memastikan penyewa kedai runcit/kedai makan yang terdiri daripada penghuni PPR tersebut tidak terbeban dengan kos operasi yang tinggi. Sebagai contoh kadar

SOALAN NO: 44

sewaan yang dikenakan adalah serendah RM150.00 sebulan bagi setiap lot kedai/kedai makan di PPR Sentul Murni, Kuala Lumpur.

KPKT sentiasa memastikan hanya kedai/gerai makan yang disediakan sahaja beroperasi dan turut menerapkan elemen kawalan serta penguatkuasaan melalui ejen pengurusan bangunan yang dilantik bagi mengatasi wujudnya ruang-ruang kedai/gerai makan tanpa kebenaran di dalam kawasan PPR. Selain itu, terdapat perbincangan antara ejen pengurusan bangunan bersama penduduk dari semasa ke semasa berkaitan keperluan tambahan pewujudan ruang perniagaan di dalam kawasan PPR bagi membantu penduduk PPR menambah pendapatan sampingan.

Kesedaran dan kerjasama komuniti setempat di PPR dan kawasan sekitar juga adalah penting supaya dapat membendung kewujudan ruang-ruang kedai haram yang beroperasi di sekitar PPR. Bagi warung atau kedai haram yang dibina di luar kawasan PPR pula, KPKT melalui Jabatan Perumahan Negara (JPN) sentiasa bekerjasama dengan Pihak Berkuasa Tempatan (PBT) supaya warung/kedai ini dapat beroperasi di tempat yang sesuai dan mendapat kebenaran pihak berwajib.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB TUAN AHMAD FAHMI B. MOHAMED FADZIL
(LEMBAH PANTAI)**

TARIKH : 23 MAC 2022 (RABU)

SOALAN

TUAN AHMAD FAHMI BIN MOHAMED FADZIL (LEMBAH PANTAI) minta **MENTERI DALAM NEGERI** menyatakan secara terperinci proses permohonan, pemprosesan dan kelulusan bagi permohonan kewarganegaraan yang memerlukan tempoh tiga (3) hingga lima (5) tahun untuk mendapatkan sebarang keputusan.

JAWAPAN

Tuan Yang Di Pertua,

Untuk makluman Ahli Yang Berhormat, setiap permohonan kewarganegaraan yang diterima oleh Kementerian Dalam Negeri (KDN) melalui Jabatan Pendaftaran Negara (JPN) diproses dan diteliti dengan sewajarnya sebelum sesuatu keputusan dikeluarkan. Dalam mempertimbangkan permohonan kewarganegaraan Malaysia, beban untuk membuktikan kelayakan untuk dianugerahkan kewarganegaraan Malaysia ini pula adalah di bawah tanggungjawab setiap pemohon dan proses pertimbangan adalah tertakluk kepada syarat-syarat di bawah Bahagian III, Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen.

Penganugerahan kewarganegaraan Malaysia kepada individu bertaraf bukan warganegara merupakan anugerah tertinggi dan hak eksklusif Kerajaan Persekutuan yang tidak ditawarkan dan diberikan dengan sewenang-wenangnya. Fakta dan dokumen bukti yang dikemukakan oleh setiap pemohon akan diteliti mengikut giliran yang sewajarnya sebelum keputusan dikeluarkan. Sehubungan dengan itu, tiada tempoh tertentu yang ditetapkan bagi pengeluaran keputusan dan ia berbeza-beza mengikut keperluan kes.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN FONG KUI LUN [BUKIT BINTANG]

TARIKH : 23 MAC 2022 (RABU)

SOALAN

TUAN FONG KUI LUN minta **MENTERI KESIHATAN** sejauh mana ancaman kes sijil vaksin palsu telah berlaku dan menggodam sistem MySejahtera KKM.

JAWAPAN

Tuan Yang di-Pertua,

1. Masalah sijil digital palsu digital bagi individu yang telah divaksin adalah berpunca daripada penyalahgunaan sistem *Malaysian Vaccine Administration System* (MyVAS) oleh pengguna MYVAS yang berdaftar dan sistem MySejahtera tidak pernah digodam oleh mana-mana pihak.
2. Sijil vaksin COVID-19 Malaysia menggunakan teknologi *blockchain* melalui *Vaccine Management System* (VMS) yang telah diiktiraf oleh perbadanan antarabangsa. Setiap transaksi boleh diaudit untuk tujuan keselamatan atau penyalahgunaan.
3. Sijil digital vaksin COVID-19 dalam aplikasi MySejahtera hanya akan dipaparkan dalam aplikasi setelah Pusat Pemberian Vaksin (PPV) melengkapkan maklumat ke dalam sistem MyVAS oleh pegawai yang telah diberi tanggungjawab seperti pegawai perubatan dari institusi kesihatan dan perubatan dibawah pemantauan Cawangan Kawalan Amalan Perubatan Swasta (CKAPS).

4. Oleh yang demikian, sebarang sijil yang dikeluarkan melalui MySejahtera telah melalui beberapa proses verifikasi dan validasi melalui sistem MyVAS dan VMS yang mengandungi elemen keselamatan dan pemantauan serta jejak audit.
5. Pemegang taruh yang terlibat dalam program imunisasi COVID 19 kebangsaan (PICK) seperti Jabatan Kesihatan Negeri dan PHCorp mempunyai sistem pengauditan yang dilakukan dari masa ke semasa.
6. Berhubung dengan penyalahgunaan sistem MyVAS dan pengeluaran sijil palsu, Kementerian Kesihatan memandang serius tentang perkara ini dan akan mengambil tindakan yang tegas ke atas pihak yang bertanggungjawab. Untuk makluman Ahli Yang Berhormat, berdasarkan siasatan yang masih dijalankan dan semakan bersama-sama pihak PDRM didapati semua kes yang dikesan adalah melibatkan pelaksanaan vaksinasi berbayar yang dijalankan oleh pihak swasta (Private Purchase Vaccination).
7. Mengikut Akta Perubatan (pindaan) 2012 dan Peraturan-peraturan Perubatan (Pindaan) 2017, mana-mana pengamal perubatan yang membuat salah laku tertakluk kepada jenis kesalahan dan tertakluk kepada intipati kes, boleh dikenakan hukuman maksimum termasuklah di bawah Seksyen 30(1)(e) iaitu dibuang dari daftar Majlis Perubatan Malaysia. Setakat ini, terdapat tiga (3) laporan polis telah dibuat di negeri Johor, Terengganu serta Selangor berkenaan pemalsuan sijil vaksin dan siasatan sedang dijalankan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

TARIKH : 23 MAC 2022 (RABU)

SOALAN

TUAN NIK NAZMI BIN NIK AHMAD [SETIAWANGSA] minta **MENTERI SUMBER MANUSIA** menyatakan Program Jamin Kerja Keluarga Malaysia :

- a) bilangan majikan dan pekerja yang turut serta setakat ini; dan
- b) pecahan peratus gaji bawah RM1,500 dan RM1,500 ke atas yang diterima peserta Jamin Kerja .

JAWAPAN

Tuan Yang di-Pertua,

Dalam usaha merangsang pemulihan ekonomi dan meningkatkan mata pencarian, Kerajaan telah menyediakan inisiatif JaminKerja - Insentif Penggajian untuk menggalakkan majikan menyediakan peluang pekerjaan bagi membantu Keluarga Malaysia, terutamanya golongan rentan dan yang tidak aktif bekerja.

Permohonan bagi Program JaminKerja – Insentif Penggajian telah dibuka mulai 17 Januari 2022 dengan peruntukan 2 bilion ringgit dan sasaran 300 ribu orang. Program ini menyediakan insentif kewangan kepada para majikan yang membuat pengambilan pekerja baharu dalam

SOALAN NO: 47

kalangan kumpulan sasaran mulai 1 Januari 2022 dengan insentif maksima sehingga RM36,000 bagi setiap pekerja dalam tempoh satu tahun.

Di bawah inisiatif ini, majikan yang mengambil Keluarga Malaysia yang tidak aktif bekerja, Kerajaan akan memberikan insentif sebanyak 20 peratus daripada gaji bulanan bagi tempoh enam bulan pertama dan 30 peratus bagi enam bulan berikutnya tertakluk kepada pekerjaan bergaji 1,500 ringgit ke atas.

Selain itu, bagi menggalakkan majikan menyediakan peluang pekerjaan kepada kumpulan tumpuan seperti OKU, Orang Asli dan banduan pula, Kerajaan akan memberikan insentif sebanyak 30 peratus daripada gaji bulanan bagi tempoh enam bulan pertama dan 40 peratus bagi enam bulan berikutnya tertakluk kepada pekerjaan bergaji 1,200 ringgit ke atas. Bagi menggalakkan wanita kembali bekerja, insentif ini turut dipanjangkan kepada majikan yang menggaji golongan wanita tidak bekerja melebihi 365 hari, ibu tunggal dan suri rumah. Berdasarkan statistik Pertubuhan Keselamatan Sosial, setakat 16 Februari 2022, sebanyak 446 majikan telah memohon dan sebanyak 934 pekerja telah berdaftar bagi program insentif ini.

Daripada itu sebanyak 14 peratus pemohon di bawah gaji RM1,500 dan manakala 86 peratus pemohon gaji atas RM1,500 telah menerima insentif ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK MOHD. AZIS BIN JAMMAN
(SEPANGGAR)**

TARIKH : 23 MAC 2022 (RABU)

SOALAN

Minta **MENTERI BELIA DAN SUKAN** menyatakan berdasarkan jawapan yang diberikan Yang Berhormat Menteri pada 26 Oktober 2021, adakah Kementerian bercadang untuk membina fasiliti sukan permotoran dan velodrom di Sabah memandangkan tiada satu pun fasiliti sukan ini di Sabah mahupun Sarawak sama ada di peringkat negeri mahupun kebangsaan.

JAWAPAN

Tan Sri Yang Di-Pertua,

Untuk makluman Ahli Yang Berhormat, Kementerian Belia dan Sukan (KBS) sentiasa komited dalam memastikan pembangunan infrastruktur sukan dibina mengikut keperluan dan kesesuaian setempat. Yang Berhormat boleh mengemukakan cadangan rasmi untuk membangunkan kemudahan sukan permotoran dan velodrom ini di tapak yang sesuai untuk pertimbangan Kementerian ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : DATUK SERI DR. HAJI DZULKEFLY BIN AHMAD [KUALA SELANGOR]

TARIKH : 23 MAC 2022 (RABU)

SOALAN

DATUK SERI DR. HAJI DZULKEFLY BIN AHMAD minta **MENTERI KESIHATAN** implikasi kewangan bagi menyerap doktor kontrak sebagai jawatan tetap.

JAWAPAN:

Tuan Yang di-Pertua,

1. Mesyuarat Jemaah Menteri pada 19 Januari 2022 telah bersetuju supaya sebanyak 4,186 jawatan tetap tambahan diwujudkan di KKM pada tahun 2022 bagi tujuan melantik seramai 3,586 Pegawai Perubatan, 300 Pegawai Pergigian dan 300 Pegawai Farmasi.
2. Jemaah Menteri juga telah bersetuju agar sekurang-kurangnya 1,500 jawatan tetap Pegawai Perubatan, Pegawai Pergigian dan Pegawai Farmasi diwujudkan di KKM pada setiap tahun mulai tahun 2023 hingga 2025.
3. Justeru itu, implikasi kewangan bagi pelantikan tetap Pegawai Perubatan bagi tahun 2022 hingga 2025 adalah sebanyak RM1.96 billion yang melibatkan 7,486 orang.

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

**DARIPADA : TUAN CHARLES ANTHONY SANTIAGO
[KLANG]**

TARIKH : 23 MAC 2022 (RABU)

SOALAN

TUAN CHARLES ANTHONY SANTIAGO [KLANG] minta **MENTERI SUMBER MANUSIA** menyatakan kesediaan Kerajaan menerapkan pandangan Global Compact for Safe, Orderly and Regular Migration (GCM) yang disokong oleh Malaysia dalam UN General Assembly tahun 2018 bagi mengatasi buruh paksa dan melindungi pekerja migran.

JAWAPAN

Tuan Yang di-Pertua,

Bagi menangani isu buruh paksa, Kerajaan telah memperkasa aktiviti-aktiviti-aktiviti penguatkuasaan dan kesedaran mengenai isu ini. Aktiviti-aktiviti ini merupakan sebahagian daripada inisiatif penting untuk menjayakan Pelan Tindakan Anti Pemerdagangan Orang dan Pelan Tindakan berhubung Buruh Paksa yang telah dilancarkan.

Pelan tindakan yang tersebut telah mengambil kira banyak aspek termasuklah aspek kemanusiaan, pembangunan, hak asasi manusia dan lain-lain. Aspek-aspek ini juga diterapkan oleh GCM. Oleh yang demikian, Kementerian kini ingin menumpukan perhatian untuk menjayakan pelan tindakan tersebut bagi mencapai sasaran yang ditetapkan.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN FONG KUI LUN
[BUKIT BINTANG]**

TARIKH : 23 MAC 2022 (RABU)

SOALAN

TUAN FONG KUI LUN [BUKIT BINTANG] minta **MENTERI KESIHATAN** menyatakan sebab dan punca pandemik COVID-19 sukar dibendung sepenuhnya walaupun telah memakan masa lebih 2 tahun untuk memerangnya dan kini berterusan dengan varian baru yang entah bila akan berkesudahan dan apakah persiapan negara memerangnya.

JAWAPAN

Tuan Yang di-Pertua,

1. Trend peningkatan kes COVID-19 baharu melebihi angka 10,000 sehari dicatatkan bermula pada 6 Februari 2022 dengan merekodkan sebanyak 10,089 kes dan ianya masih berterusan sehingga kini. Walaupun peningkatan mendadak ini direkodkan, purata kematian harian mingguan disebabkan COVID-19 tidak menunjukkan peningkatan ketara berbanding sewaktu kemuncak kes yang dicatatkan pada bulan Ogos 2021 lalu.

2. Sebagai contoh, purata 13 kes kematian sehari dicatatkan pada Minggu Epidemiologi 5/2022 berbanding purata 345 kes kematian sehari pada kemuncak gelombang varian Delta dahulu, iaitu pada Minggu Epidemiologi 32/2021. Begitu juga dengan kes COVID-19 yang memerlukan bantuan pernafasan harian yang dicatatkan adalah rendah berbanding sewaktu kemuncak penularan varian Delta pada tahun lalu iaitu sebanyak 120 kes harian dicatatkan pada 15 Februari 2022

SOALAN NO : 51

manakala 934 kes dicatatkan pada 6 Ogos 2021. Kes kematian COVID-19 dan kes COVID-19 yang memerlukan bantuan alat pernafasan yang tidak menunjukkan peningkatan seiring dengan kenaikan kes harian yang direkodkan. Ini menunjukkan bahawa pemberian vaksin COVID-19 berkesan untuk melindungi individu yang dijangkiti daripada mendapat komplikasi susulan jangkitan yang dialami.

3. Salah satu punca peningkatan kes baharu COVID-19 adalah disebabkan oleh penularan jangkitan varian Omicron yang lebih mudah menular daripada varian-varian yang lain. Sehingga 11 Februari 2022, Institut Penyelidikan Perubatan (*Institute for Medical Research; IMR*), KKM telah mengenalpasti sebanyak 815 kes varian Omicron dari keseluruhan 7,566 kes *Variant of Concern* (VOC) yang dikenalpasti setakat ini. Berdasarkan aktiviti surveilans genomik yang dilaksanakan, didapati varian Omicron secara beransur-ansur mula mendominasi jangkitan COVID-19 yang dikesan pada ketika ini menggantikan varian Delta. Tambahan pula, kajian antarabangsa mendapati varian Omicron adalah lebih berkesan dalam menyebabkan jangkitan semula (*reinfection*). Sebagai contoh, suatu kajian di England mendapati risiko jangkitan semula bagi varian Omicron adalah 5.4 kali lebih tinggi dari Delta*.

4. KKM telah menjangkakan peningkatan kes COVID-19 susulan kes Omicron pertama yang dikesan di Malaysia sejak 3 Disember 2021. Situasi ini bukan sahaja berlaku di Malaysia, malah negara-negara lain juga menghadapi peningkatan kes mendadak disebabkan varian Omicron. Menyedari situasi peningkatan kes mendadak yang sama juga berlaku di Malaysia, KKM telah mempersiapkan beberapa langkah proaktif:

- (i) Memperkukuhkan pengurusan COVID-19 melalui pendigitalan pengurusan kesihatan. Ia dilaksanakan dengan menambahbaik pengurusan COVID-19 melalui pendekatan *FTTIS* (*Find, Test, Trace, Isolate and Support*) yang diautomasikan. Antara lain melalui pendekatan ini, individu yang menjalani ujian pengesanan COVID-19 sendiri boleh melaporkan keputusan ujian mereka ke dalam aplikasi MySejahtera – selain melakukan ujian tersebut di fasiliti kesihatan. Keputusan ujian akan segera

SOALAN NO : 51

dikemaskini dalam MySejahtera pengguna. Kes positif dan kontak rapat akan diberikan Perintah Pengawasan dan Pemerhatian (*Home Surveillance Order*, HSO) dan juga Pelepasan Perintah Pengawasan dan Pemerhatian (*Release Order*, RO) secara digital dan tidak perlu hadir secara fizikal di Pejabat Kesihatan Daerah mahupun COVID-19 *Assessment Centre* (CAC);

- (ii) Memastikan semua CAC yang beroperasi secara fizikal (iaitu di Klinik Kesihatan dan di komuniti) mahupun secara maya bersedia untuk menerima kedatangan/ panggilan pesakit yang tinggi untuk membuat penilaian terhadap pesakit yang disahkan positif jangkitan COVID-19. Fungsi CAC meliputi perkara-perkara berikut:
 - Mengenalpasti pesakit yang memenuhi kriteria untuk dipantau di rumah;
 - Menilai dan memantau perkembangan pesakit sepanjang tempoh pengasingan;
 - Mengenalpasti dan menyelaras pesakit yang perlu dirujuk Pusat Kuarantin dan Rawatan COVID-19 Berisiko Rendah (PKRC)/ hospital; dan
 - Menjalankan penilaian dan pelepasan (*release order*) kepada kes positif yang telah tamat tempoh pengasingan – bagi individu yang tidak menerima digital HSO.
- (iii) Memastikan sistem kesihatan di Malaysia tidak lumpuh dengan peningkatan kes secara mendadak, KKM telah mengadakan usahasama dengan fasiliti kesihatan swasta dalam pengurusan kes COVID-19. Hospital-hospital swasta telah bekerjasama dalam menyediakan katil bagi merawat kes COVID-19. Pengamal-pengamal perubatan swasta juga dilibatkan dalam pemantauan kes-kes positif yang diasingkan di rumah;
- (iv) Membangunkan *COVID-19 Clinical Care Pathway* bagi tujuan memulakan ubat antiviral terkini yang akan diberikan kepada pesakit COVID-19 berisiko tinggi pada peringkat lebih awal semasa mereka bergejala ringan bagi mencegah jangkitan menjadi lebih teruk. Rawatan antiviral ini akan meliputi pesakit di

SOALAN NO : 51

Klinik Kesihatan, CAC, PKRC dan juga hospital bagi pesakit yang dimasukkan ke wad. Rawatan akan dimulakan setelah bekalan ubat antiviral tersebut tersedia di Malaysia; dan

- (v) Mengaktifkan semula *National COVID-19 Rapid Response Task Force* (RRTF 2.0) bermula 7 Februari 2022 susulan peningkatan kes COVID-19 melebihi 10,000 kes sehari. Pasukan RRTF 2.0 ini ditubuhkan bagi mengelakkan krisis apabila sistem kesihatan di Malaysia semakin dibebani dengan lambakan kes COVID-19. Antara objektif utama penubuhan pasukan RRTF 2.0 adalah bagi:
- Menyelamatkan nyawa dengan memastikan akses ke Pusat Kuarantin dan Rawatan COVID-19 Berisiko Rendah (PKRC) dan hospital terjamin serta melakukan pemantauan kes positif COVID-19 melalui Pusat Penilaian COVID-19 secara maya (VCAC);
 - Memastikan akses kecemasan dan darurat tersedia apabila diperlukan, seperti menyediakan jumlah ambulans yang mencukupi dan tepat waktu melalui sistem pengurusan berpusat;
 - Memastikan kebajikan individu yang terkesan dengan jangkitan COVID-19 tidak terabai termasuk anak-anak kepada kes positif selain menitikberatkan kesihatan mental mereka; dan
 - Memastikan pengendalian dan penyampaian komunikasi strategik yang berkesan bagi mengurangkan serta meredakan kegusaran dalam kalangan masyarakat umum.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : DATUK DR. SHAHRUDDIN BIN MD.
SALLEH [SRI GADING]**

TARIKH : 23 MAC 2022 (RABU)

SOALAN

DATUK DR. SHAHRUDDIN BIN MD. SALLEH [SRI GADING] minta **MENTERI SUMBER MANUSIA** menyatakan apakah solusi Kementerian bagi mengelakkan gaji jurutera di Malaysia kekal dan semakin rendah.

JAWAPAN

Tuan Yang di-Pertua,

Penetapan gaji bagi bidang profesional seperti jurutera tertakluk kepada kuasa penawaran dan permintaan dalam pasaran buruh. Kadar gaji yang setimpal dengan taraf pendidikan, kemahiran dan pengalaman boleh dirundingkan dengan pihak majikan melalui kontrak perkhidmatan atau perundingan Perjanjian Kolektif bagi pekerja yang mempunyai kesatuan sekerja.

Kementerian menggalakkan majikan untuk membayar tambahan gaji kepada pekerja berdasarkan produktiviti selain bayaran gaji pokok. Pendekatan seperti melaksanakan Sistem Upah Yang Dikaitkan Dengan Produktiviti (*Productivity Linked Wage System* - PLWS) yang diperkenalkan oleh Kementerian sejak tahun 1996 bukan sahaja mampu meningkatkan pendapatan pekerja melalui peningkatan produktiviti, malah akan meningkatkan daya saing syarikat kerana dapat mengekalkan kos buruh yang kompetitif.

Selain itu, sektor-sektor yang berintensifkan buruh digalakkan beralih kepada penggunaan mekanisasi dan automasi bagi meningkatkan produktiviti seterusnya meningkatkan pendapatan jurutera. Kerajaan juga menggalakkan pelaburan asing yang bersifat teknologi tinggi yang boleh menyumbang kepada kadar gaji yang lebih tinggi kepada jurutera.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN AHMAD BIN HASSAN (PAPAR)

TARIKH : 23 MAC 2022 (RABU)

SOALAN

TUAN AHMAD BIN HASSAN (PAPAR) minta **MENTERI PERUMAHAN DAN KERAJAAN TEMPATAN** menyatakan usaha Kementerian dalam membantu Pihak Berkuasa Tempatan di Sabah menyelesaikan dan menguruskan isu sampah sarap yang menghantui Sabah sekian lama.

JAWAPAN

Tuan Yang di-Pertua,

Untuk makluman Ahli Yang Berhormat, Akta Pengurusan Sisa Pepejal dan Pembersihan Awam 2007 (Akta 672) telah berkuat kuasa di tujuh (7) buah negeri iaitu di negeri Johor, Melaka, Negeri Sembilan, Pahang, Perlis, Kedah, Wilayah Persekutuan Kuala Lumpur dan Putrajaya. Bagi negeri Sabah pula, pengurusan sisa pepejal dan perkhidmatan pembersihan awam masih dikendalikan oleh Pihak Berkuasa Tempatan (PBT).

Justeru, dalam memastikan perkhidmatan pengurusan sisa pepejal dilaksanakan secara berkesan dan mampan, Kementerian Perumahan dan Kerajaan Tempatan (KPKT) melalui Jabatan Pengurusan Sisa Pepejal Negara (JPSPN) turut membantu dalam menyediakan fasiliti pengurusan sisa pepejal kepada PBT di Sabah melalui permohonan PBT.

KPKT melalui JPSPN telah melaksanakan tiga (3) projek di negeri Sabah dengan jumlah keseluruhan adalah sebanyak RM132,009,610. Perincian bagi setiap projek adalah seperti berikut:

- (i) Projek Membina Tapak Pelupusan Sanitari di Bukit Gemok, Tawau yang telah siap dibina dengan kos pembinaan RM44,901,601. Projek ini telah diserahkan kepada Majlis Perbandaran Tawau pada 14 Februari 2022 untuk pengoperasian dan tapak pelupusan ini menerima sisa pepejal dari seluruh daerah Tawau;
- (ii) Projek Naik Taraf Tapak Pelupusan Sanitari Sisa Pepejal di Kayu Madang, Kota Kinabalu dengan kos pembinaan sebanyak RM40,000,000. Projek ini masih lagi dalam pembinaan dan dijangka siap sepenuhnya pada Julai 2023. Tapak pelupusan yang sedang dibina ini akan menerima sisa pepejal dari Kota Kinabalu, Penampang, Tuaran, Putatan dan Kota Belud; dan
- (iii) Projek Tapak Pelupusan Sanitari Pantai Barat Selatan dengan anggaran kos pembinaan sebanyak RM47,108,000. Tapak pelupusan ini akan menerima sisa pepejal dari Beaufort, Sipitang, Kuala Penyu, Papar, Membakut dan Menumbok. Projek ini masih lagi dalam peringkat pra-pelaksanaan dan dijangka akan ditender pada tahun 2023 setelah mendapat kelulusan Laporan Penilaian Kesan kepada Alam Sekeliling (EIA).

Kementerian pada masa ini sedang menunggu keputusan Kerajaan Negeri Sabah untuk mendapatkan persetujuan tapak baharu yang dicadangkan dan kos untuk pelaksanaan EIA di tapak baharu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

TARIKH : 23.03.2022 (RABU)

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan usaha Kementerian untuk mengawal kadar inflasi yang semakin meningkat terutamanya bagi barang-barang makanan dan keperluan asas. Bagaimanakah Kementerian ini mengadakan usaha sama dengan Kementerian-Kementerian lain terutamanya dengan Kementerian Pertanian dan Industri Makanan dari segi peningkatan produktiviti dan pengurangan kos pengeluaran dalam jangka pendek dan jangka panjang.

JAWAPAN

Tuan Yang di-Pertua,

Untuk makluman Yang Berhormat, kementerian ini telah mengadakan pelbagai kerjasama dengan Kementerian Pertanian dan Industri Makanan (MAFI) berkenaan dengan program-program untuk meningkatkan produktiviti dan pengurangan kos pengeluaran dalam jangka pendek dan jangka panjang. Mesyuarat Khas NACCOL mengenai Industri Pengeluaran Makanan Tahun 2022 telah diadakan pada 31 Januari 2022 dan telah memutuskan perkara seperti berikut:

- (1) **Subsidi kepada penternak ayam dan telur ayam** akan turut diberikan bagi membolehkan harga runcit ayam standard dijual pada harga RM8.90 daripada harga RM9.10. Manakala harga telur ayam dikekalkan sehingga SHMKM tamat pada awal Jun 2022 kelak. Satu Task Force yang diketuai oleh Kementerian Pertanian dan Industri Makanan (MAFI) telah ditubuhkan untuk memperincikan pelaksanaan inisiatif ini. Subsidi ini bukan sahaja membantu penternak untuk menampung kos pengeluaran yang semakin meningkat namun ia dijangka akan dapat menstabilkan harga jualan di setiap rantai bermula daripada peringkat pengeluaran lagi.
- (2) **Permit import ayam** juga telah digunakan sebagai satu lagi strategi bagi meningkatkan bekalan di dalam pasaran. Kerajaan percaya bahawa apabila bekalan mulai stabil, maka harga ayam di pasaran akan mula stabil. Pada asalnya, kelulusan ini hanya diberikan kepada pengimport dan keratan ayam sahaja. Namun Mesyuarat Khas NACCOL pada 31 Januari 2022 memutuskan untuk menambahbaik permit import ini dengan membenarkan pemain industri lain terutamanya pasaraya besar untuk mengimport ayam. Kelulusan import juga melibatkan ayam bulat dan bukannya keratan ayam sahaja.
- (3) **NACCOL juga menyokong agar penyelidikan yang dilaksanakan oleh Institut Penyelidikan dan Kemajuan Pertanian Malaysia (MARDI)** untuk menjadikan isi rong kelapa sawit bagi menggantikan

jagung dan soya sebagai makanan ayam; Penyelidikan sumber lain juga akan dipergiatkan. Ini adalah usaha jangka panjang bagi memastikan hasil kajian ini kelak akan memberi manfaat kepada industri pengeluaran makanan terutamanya industri penternakan ayam.

Selain daripada usaha-usaha ini, ada pelbagai usaha lagi yang melibatkan MAFI dan kementerian lain untuk memastikan harga barangan dapat distabilkan. Usaha-usaha ini adalah di peringkat rantai bekalan seterusnya. Inisiatif-inisiatif tersebut adalah seperti berikut:

- (1) **Koperasi yang terlibat dalam industri pertanian** akan turut memainkan peranan untuk menawarkan barangan asas tanpa melibatkan orang tengah untuk mengawal harga;
- (2) **Program Jualan Keluarga Malaysia (PJKM)** turut melibatkan agensi di bawah MAFI yang menjadi antara pembekal utama melalui agensinya seperti FAMA, NEKMAT dan NAFAS.
- (3) **Segar @ Mesra (Program Peladang Kepada Pengguna)** melibatkan sebanyak 51 lokasi PETRONAS. Program ini merupakan program yang dilaksanakan oleh stesen minyak PETRONAS terpilih dimana jualan barang keperluan seperti ayam beku, ikan beku serta sayuran terpilih dijual di premis-premis tersebut. Harga yang ditawarkan juga berpatutan memandangkan bekalan diperolehi terus daripada sumber dengan. Ini adalah kerjasama strategik yang dilaksanakan oleh KPDNHEP dan MAFI.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : DATO' SERI UTAMA HAJI MUKHRIZ BIN
TUN DR. MAHATHIR [JERLUN]**

TARIKH : 23 MAC 2022 (RABU)

SOALAN

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **MENTERI SUMBER MANUSIA** menyatakan apakah tindakan yang diambil terhadap syarikat-syarikat p-hailing yang melakukan demerit terhadap penghantar yang terpaksa berhenti menghantar barang ketika hujan lebat, perlu ke tandas, atau menunaikan solat. Adakah adil bagi penghantar jika mereka dianggap sebagai rakan kongsi kepada syarikat-syarikat p-hailing, dan bukan sebagai pekerja yang berhak ke atas kebajikan setaraf pekerjaan mereka.

JAWAPAN

Tuan Yang di-Pertua,

Kerajaan mengambil maklum mengenai aduan syarikat-syarikat p-hailing yang melakukan demerit terhadap penghantar yang terpaksa berhenti menghantar barang ketika hujan lebat, perlu ke tandas, atau menunaikan solat.

Walaupun pada masa ini golongan penghantar ini tidak ditakrifkan sebagai seorang pekerja di bawah Akta Kerja 1955, namun Jabatan Tenaga Kerja Semenanjung Malaysia telah mengambil inisiatif dengan mengadakan sesi perbincangan dengan pihak pengurusan syarikat, pekerja syarikat dan juga wakil Persatuan Penghantar P-Hailing Malaysia (PENGHANTAR) mengenai perkara ini dan meminta agar pihak syarikat meneliti prosedur penghantaran dan memastikan supaya golongan penghantar ini atau dengan izin, *rider p-hailing* tidak dikenakan tindakan demerit tersebut bagi menjaga kebajikan serta keharmonian hubungan kedua-dua pihak.

Dalam hal ini, Kementerian ini telah mencadangkan untuk memasukkan seksyen baharu dalam Rang Undang-Undang Kerja (Pindaan) 2021 mengenai kriteria bagi menentukan sama ada seseorang individu adalah pekerja dan majikan yang boleh diliputi di bawah Akta Kerja 1955 (Akta 265).

Peruntukan ini juga selari dengan perkembangan dunia pekerjaan yang mewujudkan hubungan pekerja-majikan secara terselindung atau diselindungi dengan terma-terma kontrak untuk perkhidmatan (*contract for service*) dan lantikan pekerja sebagai kontraktor bebas.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN OSCAR LING CHAI YEW
[SIBU]**

TARIKH : 23 MAC 2022 (RABU)

SOALAN

TUAN OSCAR LING CHAI YEW [SIBU] minta **MENTERI KESIHATAN** menyatakan mengapa projek pembangunan tempat letak kenderaan bertingkat di Hospital Sibu telah dibatalkan pada tahun lepas. Apakah cadangan alternatif oleh Kementerian untuk menangani masalah kekurangan tempat letak kereta di Hospital Sibu.

JAWAPAN

Tuan Yang di-Pertua,

1. Untuk makluman Ahli Yang Berhormat, pembinaan Tempat Letak Kenderaan (LTK) di Hospital Sibu, masih di peringkat perancangan. Sehingga kini tiada sebarang kelulusan atau peruntukan pembangunan yang diluluskan di bawah RMK12 oleh EPU, JPM bagi projek pembangunan Tempat Letak Kenderaan (TLK) bertingkat di Hospital Sibu.
2. Pada masa yang sama, bagi menangani masalah kekurangan tempat letak kereta di Hospital, KKM merancang beberapa inisiatif seperti:
 - a. pelaksanaan *outsourcing* TLK secara premis demis;
 - b. menggalakkan orang awam menggunakan perkhidmatan *e-hailing* dan memperkenalkan *valet parking*; dan
 - c. menaiktaraf TLK sedia ada di hospital secara berskala kecil melalui peruntukan pembangunan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

DARIPADA : TUAN M.KULASEGARAN [IPOH BARAT]

TARIKH : 23 MAC 2022 (SELASA)

SOALAN

TUAN M. KULASEGARAN [IPOH BARAT] minta **MENTERI SUMBER MANUSIA** menyatakan sama ada Kementerian dan TVET sudah bersedia dengan fenomena baru seperti "*MetaVerse*" atau tidak.

JAWAPAN

Tuan Yang di-Pertua,

Kementerian Sumber Manusia melalui Jabatan dan Agensi berkaitan TVET dibawahnya sentiasa peka dengan perubahan teknologi yang memerlukan pendekatan baharu dalam industri. “MetaVerse” adalah berkaitan dengan ciptaan dan teknologi yang mencipta dunia maya yang berjalan serentak dengan dunia sebenar di mana teknologi seperti Realiti Maya, Realiti Terimbuh, Pengaturcaraan Komputer, Pemodelan 3D dan Animasi merupakan antara teras dalam Revolusi Industri 4.0.

Bagi memenuhi keperluan ini, Jabatan Pembangunan Kemahiran telah membangunkan Standard Kemahiran Pekerjaan Kebangsaan dengan mengambil kira elemen teknologi baharu yang merangkumi 4IR, Teknologi Hijau, serta elemen-elemen terkini. **Sehingga 31 Januari 2022 sebanyak 2,046 Standard Kemahiran Pekerjaan Kebangsaan yang telah dibangunkan dan masih aktif.**

Kerajaan turut mempergiatkan inisiatif berkaitan pembangunan bakat berasaskan teknologi 4IR ini. Berdasarkan pemetaan teknologi berasaskan 4IR dan kesediaan sumber, Jabatan Tenaga Manusia akan membangunkan beberapa bidang baharu untuk ditawarkan di Institusi Latihan Jabatan Tenaga Manusia dan juga akan memperkenalkan program dalam bidang baharu yang turut merangkumi Realiti Terimbuh dan Realiti Maya.

Secara keseluruhannya, Kementerian bersedia untuk menghadapi perubahan teknologi termasuk “MetaVerse”. Kementerian juga yakin akan dapat melahirkan graduan teknikal yang dinamik, progresif, berketerampilan, berimej versatil dan *hands-on* bagi mewarnai landskap TVET yang profesional.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB TUAN RAMKARPAL SINGH A/L KARPAL
SINGH (BUKIT GELUGOR)**

TARIKH : 23 MAC 2022 (RABU)

SOALAN

TUAN RAMKARPAL SINGH A/L KARPAL SINGH (BUKIT GELUGOR) minta **MENTERI DALAM NEGERI** menyatakan berkenaan sebab-sebab Lalitha Kunaratnam dipanggil dan disiasat polis susulan pendedahannya berkenaan isu pemilikan saham oleh Tan Sri Azam Baki memandangkan ia akan memberikan tanggapan yang buruk dan akan menakutkan orang umum untuk memberikan apa-apa maklumat berkenaan sebarang salah laku melibatkan pegawai-pegawai kanan dalam Kerajaan.

JAWAPAN

Tuan Yang Di Pertua,

Untuk makluman Yang Berhormat, Lalitha Kunaratnam telah dipanggil oleh pihak PDRM bagi menjalankan siasatan susulan daripada laporan polis Presint 7/206/2022 bertarikh 7 Januari 2022 yang disiasat di bawah seksyen 500 Kanun Keseksaan dan Seksyen 233 Akta Komunikasi Dan Multimedia 1998. PDRM menggunakan kuasa di bawah seksyen 112 KPJ untuk memanggil Lalitha Kunaratham pada 3 Februari 2022 jam 2.30 petang bagi diambil keterangan di Bukit Aman. Tujuan keterangan Lalitha Kunaratham diambil adalah untuk membantu siasatan pihak polis susulan laporan polis tersebut. Selepas keterangan diambil, beliau telah dibenarkan untuk meninggalkan Bukit Aman bersama peguamnya iaitu Encik Mandeep Singh daripada Tetuan Mandeep Singh.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : PUAN TERESA KOK SUH SIM
[SEPUTEH]**

TARIKH : 23 MAC 2022 (RABU)

SOALAN

PUAN TERESA KOK SUH SIM minta **MENTERI KESIHATAN** menyatakan selepas pengumuman Menteri berkenaan marijuana perubatan bukan lagi diletakkan di bawah Akta Dadah Berbahaya, apakah Kementerian akan mengalihkan cannabis daripada Jadual Satu di bawah Akta Dadah Berbahaya dan letakkannya dalam Jadual yang lebih rendah demi memudahkan pengimportan produk cannabis untuk tujuan penyelidikan dan perubatan.

JAWAPAN

Tuan Yang di-Pertua,

1. Kementerian Kesihatan Malaysia (KKM) **tidak pernah** mengeluarkan kenyataan bahawa kanabis (marijuana) untuk tujuan perubatan tidak lagi diletakkan di bawah Akta Dadah Berbahaya 1952 [Akta 234]. Kanabis **masih dikawal** sebagai dadah berbahaya di bawah Akta 234. Namun Kementerian Kesihatan memaklumkan bahawa akta-akta sedia ada yang mengawal selia kanabis dan hasilnya di Malaysia iaitu Akta 234, Akta Racun 1952 [Akta 366] dan Akta Jualan Dadah 1952 [Akta 368] tidak menghalang pengimportan dan penggunaan keluaran yang mengandungi ekstrak kanabis bagi tujuan perubatan.
2. Suatu keluaran yang mengandungi ekstrak kanabis untuk digunakan bagi tujuan perubatan manusia boleh diimport, dijual, di bekal

dan digunakan di Malaysia sekiranya ia dilakukan dengan mematuhi keperluan undang-undang iaitu:

- (a) keluaran telah didaftarkan oleh Pihak Berkuasa Kawalan Dadah sepertimana yang ditetapkan di bawah Peraturan-Peraturan Kawalan Dadah dan Kosmetik 1984 yang dibuat di bawah Akta Jualan Dadah 1952;
- (b) pengimportan keluaran dilakukan oleh pengimport yang mempunyai lesen dan kebenaran import di bawah Akta Racun 1952, Akta Dadah Berbahaya 1952 dan Peraturan-Peraturan Kawalan Dadah dan Kosmetik 1984;
- (c) penjualan secara borong keluaran dilakukan oleh penjual yang mempunyai lesen di bawah Akta Racun 1952, Akta Dadah Berbahaya 1952 dan Peraturan-Peraturan Kawalan Dadah dan Kosmetik 1984; dan
- (d) penjualan atau pembekalan secara runcit keluaran untuk rawatan perubatan pesakit tertentu dilakukan oleh pengamal perubatan yang berdaftar di bawah Akta Perubatan 1971 [Akta 50] kepada pesakitnya atau ahli farmasi berdaftar yang mempunyai lesen Jenis A kepada individu tertentu atas preskripsi yang dikeluarkan oleh pengamal perubatan berdaftar.

3. Sekiranya terdapat pihak yang mempunyai bukti saintifik yang mencukupi untuk menggunakan keluaran yang mengandungi ekstrak kanabis bagi apa-apa tujuan perubatan, permohonan untuk mendaftarkan keluaran mengandungi ekstrak kanabis bagi tujuan perubatan tersebut boleh dikemukakan kepada Bahagian Regulatori Farmasi Negara (NPRA) selaku sekretariat kepada Pihak Berkuasa Kawalan Dadah (PBKD) untuk dinilai dan didaftarkan di bawah Peraturan-Peraturan Kawalan Dadah dan Kosmetik 1984 dan seterusnya dipasarkan di Malaysia.

4. Buat masa ini tiada keluaran yang mengandungi ekstrak kanabis untuk tujuan perubatan yang berdaftar di bawah Peraturan-Peraturan Kawalan Dadah dan Kosmetik 1984. Pihak PBKD pernah mendaftarkan

satu produk berasaskan kanabis iaitu Sativex pada tahun 2014. Namun begitu, atas permintaan pihak syarikat sendiri, pendaftaran produk ini telah dibatalkan pada tahun 2017. Justeru, KKM mengalu-alukan permohonan untuk menjalankan percubaan klinikal ke atas keluaran mengandungi ekstrak kanabis bagi apa-apa tujuan pengubatan di Malaysia tertakluk kepada pematuhan kepada undang-undang yang berkaitan.

5. Di samping itu, kanabis dan hasilnya adalah tertakluk kepada kawalan di bawah konvensyen antarabangsa iaitu di bawah Jadual I dalam *Single Convention on Narcotic Drugs, 1961*. Kawalan utama yang dikenakan ke atas bahan yang tersenarai dalam Jadual di bawah Konvensyen 1961 ialah di bawah Artikel 4(c) yang menyatakan bahawa bahan-bahan terkawal di bawah Konvensyen 1961 adalah dihadkan **hanya untuk tujuan perubatan dan saintifik** yang melibatkan pengeluaran, pembuatan, eksport, import, pengedaran, perdagangan, penggunaan dan pemilikan.

6. Malaysia merupakan negara ahli kepada konvensyen ini. Justeru, semua aktiviti yang bersangkutan dengan kanabis dan hasilnya perlu mematuhi keperluan di bawah konvensyen ini termasuklah menyenaraikan *Cannabis and cannabis resin and extracts and tinctures of cannabis* sebagai narkotik di bawah Akta Dadah Berbahaya 1952 di dalam negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN JUGAH ANAK MUYANG @
TAMBAT (LUBOK ANTU)**

TARIKH : 23 MAC 2022 (RABU)

SOALAN

TUAN JUGAH ANAK MUYANG @ TAMBAT (LUBOK ANTU) minta **MENTERI PEMBANGUNAN LUAR BANDAR** menyatakan apakah langkah yang bakal diambil oleh Kementerian bagi mengatasi masalah bekalan air yang sering melanda kawasan luar bandar terutama sekali bagi menampung keperluan yang semakin tinggi serta memastikan bekalan air bersih dapat disalurkan ke semua kawasan khususnya di luar bandar.

JAWAPAN

Tuan Yang di-Pertua,

Untuk makluman Yang Berhormat, Program Bekalan Air Luar Bandar (BALB) di bawah Kementerian Pembangunan Luar Bandar (KPLB) adalah bertujuan untuk membantu mempercepat liputan dan merapatkan jurang bekalan air bersih dan terawat ke kawasan luar bandar melalui penyambungan paip retikulasi dari paip utama Pihak Berkuasa Air Negeri (PBAN) ke rumah-rumah atau akaun baharu di kawasan luar bandar yang masih belum mendapat bekalan air bersih dan terawat. Selain itu, KPLB juga menyediakan program BALB Alternatif bagi kampung yang tidak ekonomi untuk penyambungan paip retikulasi.

Secara dasarnya, bagi kawasan yang belum mendapat liputan bekalan air bersih dan terawat, Yang Berhormat dipohon supaya mengemukakan kepada Unit Perancang Ekonomi Negeri (UPEN) Sarawak untuk disenaraikan di dalam senarai keutamaan negeri dan seterusnya dipanjangkan kepada Kementerian bagi pertimbangan selanjutnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

DARIPADA : PUAN TERESA KOK SUH SIM [SEPUTEH]

TARIKH : 23 MAC 2022 (RABU)

SOALAN

PUAN TERESA KOK SUH SIM [SEPUTEH] minta **MENTERI SUMBER MANUSIA** menyatakan jumlah pembantu rumah Indonesia yang berjaya menerima permit kerja melalui program “Maid Online” yang dilaksanakan sejak Januari 2018. Apakah isu yang menghalang penandatanganan MOU pembantu rumah di antara Malaysia dan Indonesia sejak tahun 2016.

JAWAPAN

Tuan Yang di-Pertua,

Seramai 38,121 pembantu rumah warganegara Indonesia telah berjaya menerima permit kerja melalui program “*System Maid Online*” yang dilaksanakan sejak Januari 2018 oleh Kementerian Dalam Negeri. Penggajian pekhidmat domestik dari Indonesia di Malaysia adalah jumlah yang terbesar selepas penggajian pekhidmat domestik dari negara Filipina iaitu seramai 59,605 (16.3%). (Sumber: My IMMs, Jabatan Imigresen Malaysia, 31 Januari 2022).

Pengambilan dan penggajian pekhidmat domestik Indonesia untuk bekerja di Malaysia dilakukan melalui beberapa siri Memorandum Persefahaman yang telah ditandatangani oleh Kerajaan Malaysia dengan Kerajaan Republik Indonesia sejak tahun 2006.

Rundingan bagi memuktamadkan Memorandum Persefahaman baharu bagi pengambilan dan penempatan Pekhidmat Domestik Indonesia pernah diadakan antara kedua-dua negara pada November 2017 dan November 2018. Walau bagaimana pun, kedua-dua pihak telah tidak mencapai kata sepakat untuk memuktamadkan Memorandum Persefahaman baharu berkenaan. Beberapa isu dasar yang menjadi kekangan bagi memuktamadkan Memorandum Persefahaman baharu ini adalah seperti berikut:

- (i) Mekanisme pengambilan melalui *One Channel System*,
- (ii) *One Maid One Task*; dan
- (iii) Gaji permulaan pembantu rumah.

Perundingan Memorandum Persefahaman antara Kerajaan Malaysia dengan Kerajaan Republik Indonesia berhubung pengambilan dan penempatan Pekhidmat Domestik Indonesia yang diketuai oleh Kementerian Sumber Manusia dan disertai oleh Kementerian Dalam Negeri telah berjalan lancar dan mencapai kata sepakat yang sewajarnya.

Memorandum Persefahaman Pekhidmat Domestik Indonesia telah dimuktamadkan oleh Kerajaan Malaysia dan Kerajaan Republik Indonesia semasa Mesyuarat *Technical Working Group* pada 8 hingga 11 Mac 2022 di Jakarta. Memorandum Persefahaman Pekhidmat Domestik Indonesia dijadualkan dimeterai di Jakarta pada 1 April 2022.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : PUAN ALICE LAU KIONG YIENG
[LANANG]**

TARIKH : 23 MAC 2022 (RABU)

SOALAN

PUAN ALICE LAU KIONG YIENG [LANANG] minta **MENTERI KESIHATAN** menyatakan bilangan kanak-kanak yang didiagnosis penyakit autisme setiap tahun dari 2010-2021 dan senaraikan statistik tahunan bagi penyakit autisme jika berbanding dengan diagnosis lain yang mempengaruhi kanak-kanak.

JAWAPAN

Tuan Yang di-Pertua,

1. *Prevalence* bagi penyakit Autism Spectrum Disorder (ASD) di Malaysia adalah antara 1 – 2 per 1,000 dalam kalangan umur antara 18 bulan dan 3 tahun (kajian KKM tahun 2005, kajian penggunaan senarai semak untuk saringan ASD menggunakan M-CHAT (*Modified –Checklist for Autism in Toddlers*). Kanak-kanak lelaki didapati 4 kali lebih ganda berkemungkinan untuk mendapat ASD daripada kanak-kanak perempuan.
2. Pada tahun 2010, bilangan kanak-kanak yang didiagnos penyakit *Autism spectrum disorder* (ASD) yang berumur 18 tahun dan ke bawah adalah seramai 99 orang dan bilangan ini semakin meningkat saban tahun dan pada tahun 2020, bilangannya adalah seramai 562 orang. Manakala bagi tahun 2021, bilangan kanak-kanak yang didiagnos

penyakit *Autism spectrum disorder* (ASD) ini adalah seramai 589 orang.

3. Berdasarkan data ini, sepanjang tempoh 10 tahun bermula tahun 2010 hingga 2021, didapati sebanyak 19.0% daripada kanak-kanak berumur 0-18 tahun didiagnos ASD berbanding dengan diagnosis lain dalam kategori pembelajaran.

4. Terdapat enam (6) sub kategori dibawah Kategori Pembelajaran, seperti yang dipaparkan di dalam Borang Permohonan Pendaftaran OKU, Tahun 2012 (BPPOKU Pindaan 1/2012).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN NURUL IZZAH BINTI ANWAR
[PERMATANG PAUH]**

TARIKH : 23 MAC 2022 (RABU)

SOALAN

Minta **MENTERI PEMBANGUNAN USAHAWAN DAN KOPERASI** menyatakan usaha Kerajaan merentasi Kementerian bagi memberi insentif kepada perusahaan mikro, kecil dan sederhana (PKS) serta perniagaan seperti pengekalan kadar elektrik bagi mengurangkan beban dalam usaha meningkatkan gaji minima.

JAWAPAN

Tuan Yang di-Pertua,

Kadar Gaji Minimum telah diperkenalkan oleh Kerajaan sejak tahun 2012 dan ditetapkan setiap 2 tahun sepertimana yang termaktub dalam Akta Perundingan Gaji Negara 2011 [Akta 732]. Kementerian Pembangunan Usahawan dan Koperasi (KUSKOP) sentiasa menyokong sebarang inisiatif kerajaan terutamanya Kementerian Sumber Manusia (KSM) dalam merundingkan kadar gaji minimum ke arah kesejahteraan dan faedah kepada pekerja dan majikan di negara ini.

KUSKOP mengambil maklum akan pelaksanaan Kadar Gaji Minimum RM1,500.00 mulai 1 Mei 2022, sepertimana yang telah diumumkan oleh YAB Perdana Menteri pada 19 Mac 2022. Kadar baharu ini hanya dilaksanakan kepada syarikat besar sahaja dan ditangguhkan kepada usahawan Perusahaan Mikro, Kecil dan Sederhana (PMKS).

Untuk makluman, KUSKOP telah memohon penangguhan pelaksanaan kadar gaji minimum kepada usahawan PMKS ini khususnya usahawan dalam kategori mikro yang terjejas teruk akibat pandemik COVID-19 dan bencana banjir baru-baru ini. Dalam hubungan ini, KUSKOP akan sentiasa bekerjasama dengan KSM untuk membantu PMKS untuk bangkit semula dan menjana ekonomi negara khususnya di dalam era pasca pandemik ini.

Selain itu, KUSKOP melalui agensi-agensinya turut menyediakan bantuan kepada perusahaan mikro, kecil dan sederhana (PMKS) dalam usaha mengurangkan beban PMKS seperti berikut:

SME CORPORATION MALAYSIA

Melalui SME Corp. Malaysia, antara program yang dilaksanakan adalah **Program Pembiayaan Pengukuhan PKS (*SME Revitalisation Financing - SMERF*)**. Program ini menyediakan pembiayaan pinjaman mudah kepada PMKS terutamanya dalam sektor-sektor yang terjejas dengan COVID-19 dengan kadar faedah 3% dan tanpa yuran pemprosesan. Sejak dilaksanakan pada tahun 2021 sehingga 31 Januari 2022, sejumlah 111 permohonan telah diluluskan dengan nilai keseluruhan pinjaman berjumlah RM20.4 juta.

Seterusnya, pelaksanaan **Program Dana Kecemasan PKS (*SME Emergency Fund – SMEEF*)**. Dana ini telah diwujudkan pada tahun 2012 dengan peruntukan berjumlah RM10 juta sebagai satu langkah proaktif oleh Kerajaan agar usahawan PMKS yang terjejas akibat bencana alam seperti banjir, ribut, kemarau, hakisan pantai dan tanah runtuh dapat beroperasi semula. Dana ini adalah satu-satunya dana khas yang sedia ada bagi membantu PKS dengan segera sekiranya berlaku bencana alam. Sehingga kini, sejumlah 995 PMKS dengan kelulusan berjumlah RM16.6 juta telah diberikan (878 PKS telah diluluskan bantuan geran, RM7.3 juta dan 117 PKS diluluskan pinjaman, RM9.4 juta).

Program Pembiayaan **Digital PMKS (*Digital Financing Initiative - DFI*)** pula merupakan skim pinjaman mudah yang dilaksanakan dengan

Rakan Pembiaya yang dilantik, yang mana ia menyediakan akses pembiayaan kepada PMKS sebagai penyelesaian jangka pendek melalui platform digital. Kadar faedah adalah sebanyak 2% dengan nilai pembiayaan minimum RM50,000 sehingga maksimum RM500,000. Bagi tahun 2021 sehingga Januari 2022, sejumlah 20 PMKS telah diluluskan pinjaman berjumlah RM4.7 juta.

PERNAS

Pernas telah melaksanakan program **RECURVE – Skim Pembiayaan Rangsangan Pasca COVID-19**. Program ini bertujuan untuk membantu usahawan francais yang terjejas akibat penularan wabak COVID-19 bagi membantu menampung kos operasi bulanan seperti gaji pekerja, sewa premis perniagaan dan utiliti usahawan selama 6 bulan. Program ini juga telah dikembangkan untuk membantu usahawan francais yang terkesan akibat musibah banjir dengan mengekalkan terma dan syarat sedia ada. Pembiayaan dari RM10 ribu sehingga RM500 ribu pada kadar keuntungan 3.5% dan 4.0% dengan tempoh pembiayaan sehingga 5 tahun disediakan.

Seterusnya, Pernas telah melaksanakan kemudahan penstrukturan dan penjadualan bayaran kepada usahawan francais yang terjejas akibat musibah banjir bagi meningkatkan aliran tunai syarikat dan mencegah perniagaan daripada gulung tikar.

TEKUN NASIONAL

TEKUN Nasional pula telah melancarkan program pembiayaan **Skim Pembiayaan Informal dan Mikro (SPIM)**. Usahawan akan menerima pembiayaan tanpa kadar keuntungan dan tempoh moratorium selama 12 bulan. Bagi tahun 2022, TEKUN telah diperuntukkan sebanyak RM200 juta untuk program SPIM. Sehingga 15 Februari 2022, TEKUN telah membantu seramai 816 usahawan dengan pembiayaan berjumlah RM7.4 juta. Melalui Bantuan Banjir Keluarga Malaysia, sejumlah RM50 juta lagi diperuntukkan untuk SPIM dengan pembiayaan maksimum sehingga RM10,000.

Selain itu, TEKUN juga telah diberikan tanggungjawab untuk

menyalurkan sejumlah RM50 juta kepada usahawan yang premis perniagaan mereka terjejas akibat banjir dengan geran *one-off* sebanyak RM3,000 setiap usahawan. Bantuan ini akan memberi manfaat kepada lebih 16,000 usahawan informal dan mikro.

BANK RAKYAT

Bank Rakyat menyediakan inisiatif bagi usahawan mikro yang terjejas akibat pandemik melalui pembiayaan **BRFlex-i** khusus kepada usahawan mikro, PKS, koperasi dan usahawan wanita yang merangkumi semua sektor perniagaan dengan nilai pembiayaan dari RM1,000 sehingga RM1 juta dan tempoh tangguhan ansuran (*grace period*) selama 9 bulan.

Selain itu, terdapat pembiayaan ***Targeted Relief and Recovery Facility (TRRF)***, sebuah pakej pembiayaan di bawah dana Bank Negara Malaysia (BNM) yang ditawarkan kepada usahawan PKS dan mikro dengan kelebihan 6 bulan moratorium.

Manakala, bagi usahawan mikro yang terjejas akibat bencana banjir, pembiayaan turut disediakan melalui ***Disaster Relief Fund (DRF)*** bagi meringankan beban kewangan PMKS dan membolehkan mereka meneruskan perniagaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI MOHD REDZUAN BIN
MD YUSOF (ALOR GAJAH)**

TARIKH : 23 MAC 2022 (RABU)

SOALAN

DATUK SERI MOHD REDZUAN BIN MD YUSOF (ALOR GAJAH) minta **MENTERI PEMBANGUNAN LUAR BANDAR** menyatakan adakah Kementerian bercadang untuk membina 'one-stop center' di kawasan kampung sebagai pusat ekonomi penduduk-penduduk di dalam menghasilkan barangan-barangan tempatan untuk dipasarkan.

JAWAPAN

Tuan Yang di-Pertua,

Untuk makluman Yang Berhormat, antara fungsi dan peranan Pusat Komuniti Desa (PKD) adalah sebagai pusat pengumpulan usahawan desa. Sehingga kini sebanyak 357 produk telah berjaya dikumpul dikeseluruhan 191 PKD diseluruh negara. Antara contoh-contoh produk luar bandar adalah termasuk produk kraftangan, makanan kering, makanan sejuk beku, herba, hasil pertanian, penjagaan kesihatan, minuman dan sabun. Secara umumnya, produk-produk tersebut dipasarkan sendiri oleh usahawan melalui platform seperti Facebook dan Instagram. Selain itu, sebahagian produk-produk ini juga telah dipasarkan secara dalam talian melalui program Desamall@KPLB. Oleh yang demikian, pihak Kementerian buat masa ini tidak mempunyai perancangan untuk membina 'one-stop center' tersebut dan dari semasa ke semasa akan mengoptimumkan penggunaan PKD bagi kemudahan masyarakat luar bandar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

DARIPADA : DATO SRI TIONG KING SING [BINTULU]

TARIKH : 23 MAC 2022 (RABU)

SOALAN

DATO SRI TIONG KING SING [BINTULU] minta **MENTERI SUMBER
MANUSIA** menyatakan:

- (a) Apakah maklum balas industri terhadap cadangan untuk menaikkan gaji minimum ke RM1,500 sebulan?
- (b) Apakah kesan jangkaan terhadap ekonomi negara jika gaji minimum RM1,500 sebulan dilaksanakan?

JAWAPAN

Tuan Yang di-Pertua,

- (a) Kerajaan mengambil maklum respon pihak industri/majikan yang telah disuarakan melalui beberapa kenyataan media berhubung cadangan pelaksanaan gaji minimum baharu. Pihak majikan bersuara bahawa ini bukan masa yang terbaik untuk mengkaji semula Perintah Gaji Minimum. Namun dalam masa yang sama, Kerajaan juga perlu menimbangkan kedudukan pekerja yang turut terjejas dengan COVID-19 dan peningkatan kos sara hidup.

Dalam hal ini, penetapan kadar gaji minimum ini dilaksanakan dengan menggunakan pendekatan seimbang (*balanced approach*) iaitu mengambil kira kepentingan pihak majikan, pekerja dan kerajaan bagi menjamin kelangsungan operasi syarikat serta memastikan pekerjaan pekerja dapat dikekalkan. Peningkatan kadar gaji minimum yang terlalu tinggi dan drastik boleh menjejaskan daya saing negara menyebabkan pasaran buruh negara akan berdepan dengan cabaran untuk mencipta pekerjaan baharu yang berkualiti dan berkemahiran tinggi.

YAB Perdana Menteri pada 19 Mac 2022 telah mengumumkan bahawa Perintah Gaji Minimum 2022 dengan kadar RM1,500.00 akan dikuatkuasakan mulai 1 Mei 2022. Pada ketika ini satu penelitian sedang dibuat berkaitan kaedah pelaksanaan Perintah Gaji Minimum 2022 ini.

Tuan Yang di-Pertua,

- (b) Selaras dengan keperluan Akta Majlis Perundangan Gaji Negara 2011 [Akta 732], Perintah Gaji Minimum hendaklah dikaji semula sekurang-kurangnya sekali dalam setiap dua tahun. Kajian semula Perintah Gaji Minimum dilaksanakan bagi mengemukakan syor kadar gaji minimum baharu kepada Kerajaan.

SOALAN NO : 65

Kerajaan yakin pembukaan semula sektor ekonomi secara berperingkat melalui fasa dalam Pelan Pemulihan Negara akan memberikan kesan positif. Pada masa ini kebanyakan perniagaan dilihat menunjukkan trend peningkatan. Keluaran Dalam Negara Kasar Malaysia mencatatkan peningkatan 3.6 peratus pada suku keempat 2021.

Peningkatan ini dapat dicapai dengan bantuan kewangan Kerajaan kepada pihak majikan bagi meneruskan operasi perniagaan serta mengekalkan pekerjaan pekerja. Berdasarkan unjuran dalam dokumen Bajet 2022, prestasi ekonomi dijangka akan berkembang pada kadar 5.5 hingga 6.5 peratus pada tahun 2022.

Kenaikan gaji minimum ini dijangka akan dapat menyumbang kepada pendapatan isi rumah yang lebih tinggi, meningkatkan sumbangan pampasan pekerja terhadap Keluaran Dalam Negara Kasar sebanyak 40 peratus serta mencapai sasaran gaji dan upah penengah bulanan sebanyak RM2,900 menjelang tahun 2025 sebagaimana dihasratkan dalam Rancangan Malaysia Kedua Belas. Kerajaan berharap pelaksanaan kadar gaji minimum baharu dapat memberi impak yang positif kepada negara.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB DATUK AZIZAH BINTI MOHD DUN
(BEAUFORT)**

TARIKH : 23 MAC 2022 (RABU)

SOALAN

**DATUK SERI PANGLIMA HAJAH AZIZAH BINTI DATUK SERI
PANGLIMA HAJI MOHD DUN (BEAUFORT)** minta **MENTERI DALAM
NEGERI** menyatakan setakat ini berapa jumlah kes tangkapan dadah di
Malaysia mengikut negeri.

JAWAPAN

Tuan Yang Di Pertua,

Dalam usaha membasmi najis dadah, PDRM dan agensi penguatkuasaan sentiasa komited dalam membanteras aktiviti pengedaran dan penyalahgunaan dadah. Berdasarkan statistik tangkapan di bawah Akta Dadah Berbahaya bagi tahun 2021, sebanyak 108,220 kes telah disiasat yang mana melibatkan seramai 129,604 tangkapan bagi seluruh negara. Berikut adalah jumlah tangkapan aktiviti pengedaran dan penyalahgunaan dadah terkini bagi tahun 2022 (Januari – Februari) mengikut negeri:

- i. Perlis sebanyak 450 tangkapan;
- ii. Kedah sebanyak 2,290 tangkapan;
- iii. Pulau Pinang sebanyak 2,268 tangkapan;
- iv. Perak sebanyak 2,2583 tangkapan;
- v. Selangor sebanyak 4,854 tangkapan;
- vi. Kuala Lumpur sebanyak 2,473 tangkapan;
- vii. Negeri Sembilan sebanyak 1,208 tangkapan;
- viii. Melaka sebanyak 865 tangkapan;
- ix. Johor sebanyak 2,999 tangkapan;
- x. Kelantan sebanyak 2,766 tangkapan;
- xi. Terengganu sebanyak 1,885 tangkapan;
- xii. Pahang sebanyak 2,566 tangkapan;
- xiii. Sarawak sebanyak 1,749 tangkapan; dan
- xiv. Sabah sebanyak 2,364 tangkapan.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI RICHARD RIOT ANAK
JAEM [SERIAN]**

TARIKH : 23 MAC 2022 (RABU)

SOALAN

DATO' SRI RICHARD RIOT ANAK JAEM [SERIAN] minta **MENTERI KESIHATAN** menyatakan adakah Kementerian bercadang untuk membina sebuah hospital baru di Serian.

JAWAPAN

Tuan Yang di-Pertua,

1. Hospital Serian merupakan salah sebuah hospital berpakar minor di Sarawak dan berkapasiti 84 buah katil. Hospital ini telah beroperasi sejak tahun 1977 dan turut berada dalam sebahagian daripada Kluster Sarawak Selatan dengan diketuai kepakarannya oleh Hospital Umum Sarawak.
2. Untuk makluman Ahli Yang Berhormat, buat masa ini, Hospital Serian masih boleh menampung keperluan penduduk setempat dan berdekatan. Kadar penggunaan katil (BOR) Hospital Serian juga masih rendah dan belum mencapai tahap 70% iaitu sebanyak 45.23% pada tahun 2017, 39.32% pada tahun 2018 dan 49.15% pada tahun 2019.
3. Walau bagaimanapun, Kementerian Kesihatan Malaysia akan mengkaji keperluan menaik taraf perkhidmatan dan fasiliti Hospital Serian dari semasa ke semasa. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : PUAN HAJAH FUZIAH BINTI SALLEH
[KUANTAN]**

TARIKH : 23 MAC 2022 (RABU)

SOALAN

PUAN HAJAH FUZIAH BINTI SALLEH [KUANTAN] minta **MENTERI SUMBER MANUSIA** menyatakan jumlah pengangguran terkini di setiap negeri mengikut jantina serta kelulusan masing-masing dan apakah tindakan segera pihak Kementerian bagi mengatasi perkara ini

JAWAPAN

Tuan Yang Di Pertua,

Berdasarkan laporan Survei Tenaga Buruh oleh Jabatan Perangkaan Malaysia, kadar pengangguran menurun kepada 4.3% pada suku tahun keempat 2021 berbanding suku tahun ketiga 2021 iaitu 4.7%.

Bagi kadar pengangguran mengikut jantina, kadar pengangguran lelaki menurun kepada 4.2% pada suku tahun keempat 2021 berbanding 4.5% pada suku tahun ketiga 2021. Sementara itu, kadar pengangguran bagi wanita menurun kepada 4.5% pada suku tahun keempat 2021 berbanding 5.0% pada suku tahun ketiga 2021.

Bagi kadar pengangguran mengikut negeri pada suku tahun keempat 2021, kadar pengangguran terendah dicatatkan oleh Wilayah Persekutuan Putrajaya iaitu 1.6%, diikuti Selangor iaitu 2.9%, Melaka sebanyak 3.1%, Negeri Sembilan sebanyak 3.1% dan Pulau Pinang sebanyak 3.2%.

Sabah masih mengekalkan kadar pengangguran tertinggi iaitu 9.0% pada suku tahun keempat 2021. Sementara itu, sebelas negeri mencatatkan kadar pengangguran yang lebih rendah pada suku tahun keempat 2021 berbanding suku tahun ketiga 2021.

Bagi meningkatkan kadar penyertaan tenaga buruh serta mengurangkan kadar pengangguran, Kerajaan telah mempergiatkan usaha mengadakan program berikut:

- i. **Program JaminKerja-Insentif Penggajian** yang dijangka akan memanfaatkan 300,000 pencari kerja dari seluruh negara. Program ini merupakan satu insentif kewangan yang diberikan kepada majikan yang membuat pengambilan baharu mulai 1 Januari 2022 dalam kalangan perantis, graduan, golongan mudah terjejas termasuk OKU, bekas tentera, bekas banduan, warga emas serta penganggur am.

Sehingga 4 Mac 2022 sebanyak 999 majikan melibatkan 2,757 pekerja telah memohon insentif penggajian di bawah program JaminKerja.

- ii. Sebagai kesinambungan kejayaan Program Perantisan pada tahun 2021, JaminKerja-Insentif Penggajian akan meneruskan program ini dengan pemberian insentif RM900 sebulan untuk tempoh enam bulan kepada majikan yang menggajikan golongan perantis lepasan sekolah dan graduan berumur 18 hingga 30 tahun dalam jawatan Eksekutif. Golongan Perantis ini perlu ditawarkan kontrak 6 bulan dengan bayaran gaji pemula berjumlah RM1,500. Berdasarkan statistik, jumlah pekerja yang telah mendapat manfaat daripada Program Perantisan JaminKerja-Insentif Penggajian setakat 4 Mac 2022 adalah seramai 163 orang.
- iii. Kerajaan turut meluaskan **Elaun Mencari Pekerjaan meliputi golongan yang tidak mencarum dengan PERKESO** termasuklah graduan baharu, lepasan sekolah dan pekerja sektor tidak formal. Pencari kerja perlu mendaftar dengan **MyFutureJobs** dan perlu menghadiri temuduga terbuka sekurang-kurangnya tiga kali dalam tempoh dua bulan. **Insentif Elaun Mencari Pekerjaan akan diberikan sebanyak RM300 sebulan.** Sekiranya pencari kerja kembali bekerja atau mendapat pekerjaan melalui MyFutureJobs, **jumlah insentif sebanyak RM400** akan turut diberikan. Setakat **4 Mac 2022**, seramai **127** pencari kerja **telah diluluskan permohonannya** bagi program perluasan elaun mencari pekerjaan **bagi kategori bukan pencarum**. Manakala sehingga 4 Mac 2022 pula, seramai 6,078 pencari kerja telah diluluskan permohonannya bagi program perluasan elaun mencari pekerjaan bagi kategori pencarum.

- iv. Penubuhan **HRD Corp Placement Centre** sejak April 2021 yang berperanan sebagai platform untuk memadankan pekerja dengan peluang pekerjaan yang tersedia oleh majikan. Sehingga Februari 2022, sebanyak **38,673 peluang pekerjaan tersedia** melalui platform ini di mana lebih **4,000 pekerja telah berjaya** mendapat pekerjaan. Daripada jumlah tersebut, sebanyak 60% (2,400 pekerja) adalah daripada golongan belia dan sebahagian besar mereka memperoleh gaji sebanyak RM2,000 dan ke atas.
- v. Kerajaan juga telah melancarkan **Inisiatif PENJANA HRDF** dengan memperkenalkan lima skim yang terdiri daripada **Place & Train, B40 Development, SME Development, Industrial Revolution 4.0 dan Gerak Insan Gemilang**. Skim-skim ini diwujudkan dengan tujuan untuk membantu rakyat termasuk golongan belia dan graduan dalam mendapat pekerjaan, pekerjaan sendiri dan menambah serta meningkatkan kemahiran mereka. Setakat **4 Mac 2022**, sebanyak **85,527 pelatih** telah mengikuti skim-skim yang melibatkan penempatan pekerjaan dan pekerjaan sendiri.
- vi. Usaha pemeriksaan ekosistem bakat diteruskan dengan program-program di bawah TalentCorp yang berfokus kepada pembangunan kebolehpasaran dan kebolehkerjaan bakat muda negara melalui melalui kerjasama merentasi kementerian, jabatan, agensi Kerajaan, pemain industri dan institusi pengajian tinggi awam/ swasta serta teknikal.
- vii. Antara inisiatif yang dilaksanakan adalah **Platform analitis penilaian psikometrik bersepadu, Program Latihan Industri Berstruktur, Young Employable Students, Kolaborasi Industri-Akademia, Program Pengekalan Bakat Tajaan Kerajaan, Program Intervensi Kebolehpasaran Graduan**.

- viii. Perbadanan Tabung Pembangunan Kemahiran bertanggungjawab untuk menguruskan Dana Latihan TVET berjumlah RM180juta yang dijangka akan memberi peluang kepada 12,000 orang pelatih untuk mengikuti latihan berdasarkan Standard Kemahiran Pekerjaan Kebangsaan yang telah dibangunkan oleh Jabatan Pembangunan Kemahiran.
- ix. Selain itu, Kerajaan meluluskan Peruntukan Pembangunan tahun 2022 iaitu Dana Pembiayaan i-MAHIR sebanyak RM2 juta yang akan melatih seramai 250 orang pelatih. Program Latihan kemahiran ini akan memperluas program mikro dan modular yang menyasarkan pelbagai peringkat kemahiran yg menggalakkan latihan tenaga kerja yang memenuhi keperluan semasa.
- x. Kerajaan juga melalui inisiatif Belanjawan Tahun 2022 juga telah meluluskan peruntukan Dana Pembiayaan PERKASA TVET 2022 sebanyak RM100 juta yang berkonsepkan "place and train" yang akan memanfaatkan 13,300 orang pelatih. Latihan kemahiran diberikan sama ada bagi tujuan peningkatan kemahiran dengan izin *upskilling* atau kemahiran semula dengan izin *reskilling* kepada pekerja untuk meningkatkan kebolehpasaran pekerja dan mencipta bakat tersedia masa hadapan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : PUAN VIVIAN WONG SHIR YEE (SANDAKAN)

TARIKH : 23 MAC 2022 (RABU)

SOALAN

PUAN VIVIAN WONG SHIR YEE (SANDAKAN) minta **MENTERI DALAM NEGERI** menyatakan apakah langkah yang diambil Kerajaan untuk mengatasi isu kesesakan melampau di Pusat Tahanan Sementara (PTS) Imigresen Sabah berikutan permintaan Indonesia dan Filipina untuk menangguhkan penghantaran pulang warganya yang ditahan di PTS itu kerana wabak COVID19.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Dalam Negeri telah mengambil alih pengurusan Pusat Tahanan Sementara daripada Majlis Keselamatan Negara mulai 1 Januari 2021 bagi menyeragamkan pengurusan semua pusat tahanan di seluruh negara sebagai depot imigresen.

Berdasarkan rekod Jabatan Imigresen Malaysia, jumlah terkini pendatang tanpa izin yang ditahan di empat buah depot imigresen di Negeri Sabah adalah seramai 6,628 orang iaitu melebihi kapasiti keseluruhan depot sebanyak 6,600 tahanan.

Kerajaan sentiasa peka dan merancang pelbagai strategi untuk mempergiatkan usaha pengusiran PATI di depot tahanan imigresen seluruh negara. Antara usaha yang sedang dilaksanakan adalah mempergiatkan urusan pengusiran secara berkala ke negara asal terutamanya dalam konteks pandemik COVID-19. Bagi memastikan urusan pengusiran ini dapat dijalankan secara teratur dan mematuhi prosedur operasi standard yang ditetapkan oleh negara asal, Kementerian Dalam Negeri melalui Jabatan Imigresen Malaysia sentiasa mengadakan libat urus dengan kedutaan-kedutaan yang berkaitan.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : DATO' SERI DR. WAN AZIZAH WAN ISMAIL [PANDAN]

TARIKH : 23 MAC 2022 (RABU)

SOALAN

DATO' SERI DR. WAN AZIZAH WAN ISMAIL [PANDAN] minta **MENTERI KESIHATAN** menyatakan apakah strategi Kementerian setelah Singapura telah mula meluluskan rawatan pil pertama untuk COVID-19.

JAWAPAN

Tuan Yang di-Pertua,

1. Sehingga 18 Mac 2022, terdapat enam (6) produk farmaseutikal untuk rawatan COVID-19 yang telah berdaftar dengan Pihak Berkuasa Kawalan Dadah (PBKD) seperti berikut:

No.	Nama produk	Bahan Aktif	Pemegang	Pengilang
(i)	RONAPREVE Solution for Injection or Infusion	Casirivimab dan Imdevimab	ROCHE (M) SDN. BHD.	F. Hoffman-La Roche Ltd, Switzerland
(ii)	Fabiflu 200mg Tablets	Favipiravir	Glenmark Pharmaceutical s (Malaysia) Sdn. Bhd.	Glenmark Pharmaceutic als Limited, India
(iii)	Olumiant 2mg	Baricitinib	Zuellig Pharma	Lilly Del

SOALAN NO : 70

	Film-Coated Tablets		Sdn. Bhd.	Caribe Inc, Puerto Rico
(iv)	Olumiant 4mg Film-Coated Tablets)	Baricitinib	Zuellig Pharma Sdn. Bhd.	Lilly Del Caribe Inc, Puerto Rico
(v)	PAXLOVID (PF-07321332 150mg Film-Coated Tablets and Ritonavir 100mg Film-Coated Tablets	PF-07321332 dan Ritonavir	Pfizer (Malaysia) Sdn. Bhd.	Pfizer Manufacturing Deutschland GmbH, Germany
(vi)	PAXLOVID (PF-07321332 150mg Film-Coated Tablets and Ritonavir 100mg Film-Coated Tablets	PF-07321332 dan Ritonavir	Pfizer (Malaysia) Sdn. Bhd.	Pfizer Ireland Pharmaceuticals (Ireland)

2. Selain dari produk yang tersenarai di atas, terdapat beberapa rawatan antiviral COVID-19 yang lain sedang dalam proses penilaian oleh Bahagian Regulatori Farmasi Negara (NPRA).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

TARIKH : 23 MAC 2022 (RABU)

SOALAN

TUAN HAJI WAN HASSAN BIN MOHD RAMLI [DUNGUN] minta **MENTERI SUMBER MANUSIA** menyatakan perancangan Kementerian bagi menambah bilangan pakar untuk sektor Big Data, Cloud Computing dan Cybersecurity di dalam negara.

JAWAPAN

Tuan Yang Di-Pertua,

Kementerian Sumber Manusia sentiasa peka terhadap perubahan teknologi yang sedang berlaku di dalam industri pada masa kini. Pewujudan bidang Data Raya (*Big Data*), Pengkomputeran Awan (*Cloud Computing*) dan Keselamatan Siber (*Cybersecurity*) adalah berkait dengan Gelombang Revolusi Industri 4.0.

Oleh yang demikian, Kementerian Sumber Manusia menerusi Jabatan Pembangunan Kemahiran, Jabatan Tenaga Manusia dan Kementerian Komunikasi dan Multimedia Malaysia menerusi CyberSecurity Malaysia telah mengambil tindakan sewajarnya bagi memastikan bakat-bakat penting tersebut tersedia.

Dalam usaha melahirkan pakar, Kementerian Sumber Manusia menerusi Jabatan Pembangunan Kemahiran telah membangunkan Standard Kemahiran Pekerjaan Kebangsaan dengan mengambil kira keperluan dan kompetensi yang perlu ada dalam bidang Revolusi Industri 4.0. Sehingga Januari 2022 sebanyak 42 Standard Kemahiran Pekerjaan Kebangsaan telah dibangunkan.

Di bawah RMKe-12, Pusat Latihan Pengajar dan Kemahiran Lanjutan di bawah Jabatan Pembangunan Kemahiran sedang melaksanakan dua Projek IR4.0 iaitu Latihan kepada Tenaga Pengajar atau Train of Trainers di bawah Dasar *Industry4WRD* dan Latihan Peningkatan Kemahiran Teknologi Baru Muncul (*New Emerging Technology*), Rentas Disiplin dan Kemahiran Sosial Masa Hadapan (*Cross Discipline & Future Social Skills*) kepada Pengajar TVET berteraskan IR4.0.

Ini adalah bagi memastikan pengajar TVET memperoleh kemahiran tinggi dan berkualiti dalam melaksanakan latihan. Projek ini memfokuskan kepada 12 bidang hasil daripada pemetaan Standard Kemahiran Pekerjaan Kebangsaan dengan kerjasama pihak industri.

Selain daripada itu, Kementerian Sumber Manusia menerusi Jabatan Tenaga Manusia turut aktif dalam pelaksanaan pengintegrasian sistem dan pembangunan aplikasi digital menggunakan kepakaran dalaman. Secara tidak langsung, para pelajar dapat didedahkan dengan teknologi baharu melalui kaedah pembelajaran berasaskan projek (*project based learning*) dan pembelajaran berasaskan kerja (*work based learning*).

Perolehan peralatan bagi pemodenan bengkel-bengkel di Institusi Latihan Jabatan Tenaga Manusia dalam RMKe-12 diteruskan bagi memastikan pelaksanaan latihan kemahiran dilaksanakan seiring dengan perkembangan teknologi semasa bagi memenuhi tahap kebolehpasaran graduan TVET sebagai tenaga kerja berkemahiran tinggi.

Silibus di Jabatan Tenaga Manusia telah diterapkan dengan elemen Data Raya (*Big Data*), Pengkomputeran Awan (*Cloud Computing*) dan Keselamatan Siber (*Cybersecurity*) dalam modul-modul yang berkaitan. Perluasan penawaran kursus dilakukan melalui program khusus yang menggabungkan teknologi konvensional dengan teknologi pendigitalan.

Lanjutan itu, Institut Latihan Perindustrian Kuala Langat akan dinaik taraf dan dijadikan pusat pembangunan bidang keselamatan siber yang menyasarkan seramai 170 orang pengajar dan 600 orang pelajar akan dilatih sehingga 2025.

Bagi menyokong pembangunan pakar dalam bidang keselamatan siber, Kementerian Komunikasi dan Multimedia Malaysia menerusi CyberSecurity Malaysia telah mengadakan pelbagai program latihan melalui kerjasama dengan institusi pengajian untuk menghasilkan pakar keselamatan siber dan bidang yang berkait.

Antara inisiatif Cybersecurity Malaysia adalah kolaborasi yang aktif bersama Jabatan Pembangunan Kemahiran sebagai *Industry Lead Body* dalam bidang Keselamatan Siber di mana tugas utamanya adalah dalam membangunkan Standard Kemahiran Pekerjaan Kebangsaan yang selari dengan keperluan semasa. Pembangunan Standard Kemahiran Pekerjaan Kebangsaan ini akan menghasilkan lebih ramai pekerja yang berkemahiran dalam bidang keselamatan siber.

Kolaborasi bersama Jabatan Pembangunan Kemahiran dan *Malaysian Board of Technologist* pula telah menghasilkan program Diploma Lanjutan melalui kaedah *Modular Professional Certification* (Keselamatan Siber) yang bertujuan untuk melahirkan golongan profesional keselamatan siber yang mempunyai pelbagai kemahiran selain mampu menangani ancaman siber terkini.

Seterusnya, pelbagai latihan bersifat kompetensi dan pensijilan profesional telah dilaksanakan setiap tahun di mana pesertanya terdiri daripada pegawai kerajaan dan swasta. Lebih daripada seribu peserta menghadiri latihan keselamatan siber anjuran CyberSecurity Malaysia setiap tahun.

Kolaborasi bersama Institut Pengajian Tinggi Awam dan Swasta telah dijalin untuk melahirkan siswazah yang berpengetahuan dan berkemahiran di dalam bidang keselamatan siber menerusi program seperti skim *Global Accredited Cybersecurity Education* atau Skim Pensijilan Global ACE. Pensijilan profesional keselamatan siber yang diperkenalkan kepada siswazah akan menjadi nilai tambah kepada mereka selain memperolehi sijil profesional.

Oleh itu, diharap usaha-usaha ini mampu melahirkan pakar dalam yang berkaitan selaras dengan perkembangan digitalisasi di Malaysia.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : TUAN SIM CHEE KEONG (BUKIT MERTA JAM)

TARIKH : 23 MAC 2022 (RABU)

SOALAN

TUAN SIM CHEE KEONG (BUKIT MERTA JAM) minta **MENTERI DALAM NEGERI** menyatakan status kes mendiang Adelina Lisao termasuk siasatan polis tentang kes penyeludupan manusia yang membawa Adelina Lisao masuk ke Malaysia.

JAWAPAN

Tuan Yang Di Pertua,

Berdasarkan Bukit Mertajam Repot 1882/2018, pihak polis telah menjalankan siasatan berkaitan kes ini di bawah Seksyen 302 Kanun Keseksaan dan seorang suspek wanita telah dituduh di Mahkamah. Kes berkenaan kini di peringkat Mahkamah Persekutuan untuk pengurusan kes pada 6 April 2022.

Berhubung dengan siasatan kes di bawah kesalahan penyeludupan manusia pula, pihak polis telah menjalankan siasatan di bawah Seksyen 13 Akta Anti Pemerdagangan Orang Dan Anti Penyeludupan Migran 2007. Seramai tiga (3) orang suspek telah dituduh masing-masing seorang (1) di bawah Seksyen 55B Akta Imigresen kerana menggaji tanpa permit yang sah dan dua (2) orang di bawah Seksyen 56 (1A) Akta Imigresen kerana membantu melakukan kesalahan di bawah Seksyen 55B Akta Imigresen. Bagi kesalahan Seksyen 55B Akta Imigresen, Mahkamah telah memutuskan kes dilepaskan tanpa dibebaskan (*Discharge Not Amounting To Acquittal*, DNAA) sementara menunggu keputusan kes Seksyen 302 Kanun Keseksaan yang berkaitan. Manakala dua (2) orang yang dituduh di bawah Seksyen 56(1A) Akta Imigresen telah mengaku salah dan telah membayar denda.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB PUAN ALICE LAU KIONG YIENG (LANANG)

TARIKH : 23 MAC 2022 (RABU)

SOALAN

PUAN ALICE LAU KIONG YIENG (LANANG) minta **MENTERI DALAM NEGERI** menyatakan jumlah mangsa sindiket penipuan tawaran kerja luar negara di Sibu dan Sarawak dari tahun 2012-2022 dan apakah usaha yang telah dan akan diambil oleh Kerajaan untuk membantu mangsa sindiket tersebut serta usaha untuk mengelakkan rakyat terus menjadi mangsa sindiket penipuan tawaran kerja luar kerja lagi.

JAWAPAN

Tuan Yang Di Pertua,

Kementerian Dalam Negeri (KDN) memandang serius berhubung kes-kes yang melibatkan jenayah penipuan bagi kes tipu tawaran kerja luar negara. Jumlah kes yang dilaporkan di seluruh kontinjen Sarawak dari tahun 2010 hingga 15 Februari 2022 mencatatkan kes sebanyak 29 kes dengan jumlah kerugian sebanyak RM80,574.00. Bagi daerah Sibu sahaja, kes penipuan tawaran kerja luar negara adalah sebanyak sembilan (9) kes dengan jumlah kerugian bernilai RM42,524.00 dalam tempoh tersebut.

PDRM sentiasa berusaha untuk mengekang jenayah penipuan tawaran kerja luar negara ini. Sepanjang tempoh 2010 hingga 15 Februari 2022, secara keseluruhannya, pihak polis telah berjaya membuat tangkapan seramai 22 orang dan 70 pertuduhan telah dilaksanakan di mahkamah. Berdasarkan statistik, bagi daerah Sibu sebanyak dua (2) tangkapan telah dibuat dan sebanyak 56 pertuduhan telah dijalankan di mahkamah. Antara usaha yang telah dipergiatkan oleh PDRM bagi membendung kes penipuan tawaran kerja luar negara ini termasuklah:

1. Mengadakan hebahan kepada masyarakat mengenai modus operandi jenayah penipuan tawaran kerja luar negara melalui media cetak, media sosial dan media elektronik;
2. Menjalankan ceramah, taklimat dan sesi dialog kepada kakitangan kerajaan, syarikat swasta dan NGO-NGO secara berkala. Sesi ini turut dijalankan secara atas talian melalui medium facebook, televisyen dan radio;
3. Mewujudkan CCID Scam Respond Center di talian 0326101559 atau 0326101599 di mana orang ramai boleh membuat panggilan untuk mendapatkan maklumat dan menyemak kesahihan sesuatu tawaran pekerjaan yang ditawarkan sebelum membuat apa-apa transaksi yang

meragukan. Talian ini beroperasi dari jam 0900 pagi hingga 1000 malam pada setiap hari;

4. Mewujudkan platform akaun Facebook “Cyber Crime Alert Royal Malaysia Police” untuk memberikan pendedahan kepada masyarakat mengenai sindiket penipuan tawaran kerja luar negara ini. Satu portal juga telah dibangunkan oleh PDRM bagi memudahkan orang awam untuk mendapatkan maklumat dan menyemak kesahihan sesuatu tawaran pekerjaan yang ditawarkan Portal tersebut boleh dicapai melalui pautan <http://ccid.rmp.gov.my/semakmule> dan ianya boleh dimuatnaik dengan menggunakan telefon mudah alih; dan
5. Mengadakan Kempen Pencegahan Jenayah Komersil bagi memastikan masyarakat didedahkan segala ilmu pengetahuan berkaitan jenayah komersil. Tujuan kempen ini diadakan adalah bagi meningkatkan kesedaran kepada orang ramai mengenai sindiket penipuan tawaran kerja luar negara yang menunjukkan peningkatan kes pada tahap yang membimbangkan dan seterusnya mengelakkan orang ramai daripada menjadi mangsa kepada jenayah tersebut. Tema yang dipilih bagi kempen ini adalah Kesedaran Jenayah Komersil Kesejahteraan Komuniti dan slogan “Be Alert Stay Smart”.

Selain itu, adalah diharapkan juga kerjasama dari kementerian dan agensi yang berkaitan dengan tenaga kerja dan pekerjaan untuk sama-sama berusaha meningkatkan kesedaran mereka yang berada dalam pasaran kerja mengenai penipuan tawaran kerja ini.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK MOHAMAD ABDUH BIN
NIK ABDUL AZIZ [BACHOK]**

TARIKH : 23 MAC 2022 (RABU)

SOALAN

TUAN NIK MOHAMAD ABDUH BIN NIK ABDUL AZIZ [BACHOK] minta **MENTERI KESIHATAN** menyatakan kemajuan penyambungan pembinaan Hospital Bachok untuk keselesaan rakyat Bachok yang tergendala disebabkan beberapa masalah membabitkan kontraktor.

JAWAPAN

Tuan Yang di-Pertua,

1. Untuk makluman Ahli Yang Berhormat, Projek Pembinaan Hospital Bachok, Kelantan telah diluluskan di bawah *Rolling Plan* 3 (RP-3), Rancangan Malaysia Kesepuluh (RMKe-10). Projek ini melibatkan pembinaan sebuah blok bangunan baharu dengan kapasiti 76 katil.
2. Projek ini telah bermula pada 27 September 2016 dengan tarikh siap asal pada 23 September 2019. Walau bagaimanapun, kontraktor asal projek ini telah ditamatkan kerana prestasi kemajuan projek tidak memuaskan dan hanya mencapai 74.17% sahaja berbanding jadual 100% pada 29 Januari 2021.
3. Kontraktor penyiap telah dilantik pada 14 Oktober 2021 bagi menyiapkan baki kerja. Kemajuan fizikal sebenar bagi baki kerja sehingga 31 Januari 2022 adalah sebanyak 2.82% berbanding jadual sebanyak 0.98% dan dijadualkan siap pada 27 Oktober 2023. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

DARIPADA : DATO' NGEH KOO HAM [BERUAS]

TARIKH : 23 MAC 2022 (RABU)

SOALAN

DATO' NGEH KOO HAM [BERUAS] minta **MENTERI SUMBER MANUSIA** menyatakan keputusan Kerajaan mengenai kemasukan pekerja asing ke Malaysia dan nyatakan dengan terperinci prosedur yang perlu diikuti oleh rakyat Malaysia yang ingin menggaji pekerja asing.

JAWAPAN

Tuan Yang di-Pertua,

Keputusan untuk membawa masuk pekerja warga asing ke Malaysia ini adalah berikutan desakan majikan daripada pelbagai sektor. Menyedari hal ini, Jemaah Menteri pada 7 April 2021 telah bersetuju dengan permohonan membawa masuk pekerja asing, tertakluk dengan syarat-syarat dan *Standard Operation Procedure* ketat bagi membendung penularan wabak COVID-19.

Proses permohonan bagi pengambilan pekerja asing ini telah dibuka bermula pada 15 Februari 2022 untuk permohonan pengambilan pekerja asing bagi semua sektor yang dibenarkan. Setiap permohonan pengambilan pekerja asing perlu membuat pengiklanan kekosongan jawatan yang berkenaan di portal *MYFutureJobs* terlebih dahulu. Ini membolehkan kekosongan tersebut ditawarkan terlebih dahulu kepada pekerja tempatan dalam tempoh 30 hari.

Di samping itu, majikan juga dikehendaki membuat permohonan pengambilan secara dalam talian menggunakan sistem baharu iaitu *Foreign Workers Centralized Management System* dan setiap permohonan memerlukan majikan memuatnaik dokumen-dokumen wajib berdasarkan sektor.

Setelah itu, pihak PERKESO akan membuat pengesyoran berdasarkan status pengiklanan majikan. Manakala, Pejabat Tenaga Kerja akan membuat semakan permohonan daripada majikan dalam tempoh yang ditetapkan dan mengemukakan syor kuota kepada Jabatan Tenaga Kerja.

Syor tersebut dibuat penelitian berdasarkan laporan daripada Pejabat Tenaga Kerja. Sekiranya berjaya, majikan akan mendapat notifikasi untuk menghadiri sesi temuduga di *One Stop Centre*, Kementerian Sumber Manusia.

Keputusan temuduga di *One Stop Centre* tersebut akan diterima pada hari yang sama dan pihak Agensi Kawal Selia yang terlibat akan memberi syor kuota berdasarkan sesi temuduga dan ulasan Jabatan Tenaga Kerja Semenanjung Malaysia. Seterusnya, majikan akan membuat pembayaran levi di Jabatan Imigresen Malaysia atau Pejabat Imigresen Malaysia dalam 30 hari. Kegagalan majikan membuat pembayaran levi dalam tempoh tersebut, kuota yang diluluskan akan terbatal.

Setelah itu, Kerajaan akan mengeluarkan surat kelulusan khas bagi penggajian pekerja asing bagi proses permohonan eVDR dan kelulusan Visa Dengan Rujukan. Akhirnya, kemasukan pekerja asing ke Malaysia akan tiba dengan mematuhi SOP yang telah ditetapkan oleh Kerajaan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB PUAN TEO NIE CHING (KULAI)

TARIKH : 23 MAC 2022 (RABU)

SOALAN

PUAN TEO NIE CHING (KULAI) minta **MENTERI DALAM NEGERI** menyatakan polisi semasa untuk pasangan warga Malaysia yang bukan warga negara untuk belajar di IPT. Apakah sebab mereka diminta untuk memohon Visa Pelajar walaupun mereka sudah memiliki Long Term Social Visit Pass.

JAWAPAN

Tuan Yang Di Pertua,

Untuk makluman, Pas Lawatan (Sosial) Jangka Panjang adalah satu kemudahan yang dikeluarkan oleh Jabatan Imigresen Malaysia (JIM) kepada pasangan warganegara asing yang berkahwin dengan warganegara Malaysia dan tinggal menetap di dalam Negara untuk suatu tempoh tertentu.

Manakala selaras dengan Peraturan 13 Peraturan - Peraturan Imigresen 1963, warganegara asing yang ingin berada di negara ini bagi tujuan belajar hendaklah memiliki Pas Pelajar.

Sehubungan itu, warganegara asing yang memegang kemudahan Pas Lawatan Sosial Jangka Panjang hendaklah menukar kepada Pas Pelajar untuk memenuhi syarat keberadaan di negara ini sebagai pelajar asing.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

DARIPADA : DATO' NGEH KOO HAM [BERUAS]

TARIKH : 22 MAC 2022 (RABU)

SOALAN

DATO' NGEH KOO HAM [BERUAS] minta **MENTERI SUMBER MANUSIA** menyatakan mengapa Kerajaan menghantar wakil-wakil yang tidak mempunyai kuasa untuk membuat komitmen bagi pihak Kerajaan Malaysia dalam perjumpaan dengan pihak Kerajaan Indonesia berkenaan dengan Perjanjian Persefahaman (Memorandum of Understanding) bagi membawa masuk pembantu rumah dan pekerja asing yang lain hinggakan pihak Kerajaan Indonesia meragui komitmen kita untuk melindungi warga Indonesia yang masuk bekerja di Malaysia.

JAWAPAN

Tuan Yang di-Pertua,

Pegawai awam yang mempunyai keupayaan intelektual, kepakaran yang tinggi, berpengalaman luas serta menjadi sumber rujukan dalam dan luar Kementerian layak diiktiraf sebagai wakil-wakil Kementerian dalam membuat rundingan bagi Memorandum Persefahaman untuk membawa masuk pembantu rumah dan pekerja asing.

Dalam hal ini, wakil-wakil Kementerian ini menjadi ahli perunding bagi Malaysia dalam memastikan semua kepentingan negara berkenaan Memorandum Persefahaman ini diberi perhatian yang sewajarnya. Memorandum Persefahaman merangkumi perbahagian aspek berkaitan dua negara seperti perundangan perburuhan, hal ehwal keselamatan, hak-

hak pihak yang terlibat bagi mengekalkan keharmonian antara dua negara.

Rundingan bagi memuktamadkan Memorandum Persefahaman baharu bagi pengambilan dan penempatan Pekhidmat Domestik Indonesia pernah diadakan antara kedua-dua negara pada November 2017 dan November 2018. Walau bagaimana pun, kedua-dua pihak telah tidak mencapai kata sepakat untuk memuktamadkan Memorandum Persefahaman baharu berkenaan. Beberapa isu dasar yang menjadi kekangan bagi memuktamadkan Memorandum Persefahaman baharu ini adalah seperti berikut:

- (i) Mekanisme pengambilan melalui *One Channel System*,
- (ii) *One Maid One Task*; dan
- (iii) Gaji permulaan pembantu rumah.

Perundingan Memorandum Persefahaman antara Kerajaan Malaysia dengan Kerajaan Republik Indonesia berhubung pengambilan dan penempatan Pekhidmat Domestik Indonesia yang diketuai oleh Kementerian Sumber Manusia dan disertai oleh Kementerian Dalam Negeri telah berjalan lancar dan mencapai kata sepakat yang sewajarnya.

Memorandum Persefahaman Pekhidmat Domestik Indonesia telah dimuktamadkan oleh Kerajaan Malaysia dan Kerajaan Republik Indonesia semasa Mesyuarat *Technical Working Group* pada 8 hingga 11 Mac 2022 di Jakarta. Memorandum Persefahaman Pekhidmat Domestik Indonesia dijadualkan dimeterai di Jakarta pada 1 April 2022.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : PUAN RUBIAH BINTI HAJI WANG
(KOTA SAMARAHAN)**

TARIKH : 23.3.2022 (RABU)

SOALAN

PUAN RUBIAH BINTI HAJI WANG (KOTA SAMARAHAN) minta **MENTERI PEMBANGUNAN LUAR BANDAR** menyatakan jumlah peruntukan yang telah dibelanjakan bagi kerja-kerja bina baru atau naik taraf jalan-jalan perhubungan desa dan ameniti sosial terutamanya di Kota Samarahan.

JAWAPAN

Tuan Yang Di-Pertua,

Untuk makluman Yang Berhormat, pada tahun 2021 sebanyak 28 projek Jalan Perhubungan Desa (JPD) berjumlah RM8juta dan 9 projek Program Ameniti Sosial (PAMS) berjumlah RM0.7juta telah dilaksanakan di kawasan Kota Samarahan.

Pada tahun 2022, sebanyak RM115juta telah diperuntukkan bagi pelaksanaan projek JPD dan sebanyak RM6juta diperuntukkan bagi pelaksanaan projek PAMS di Wilayah Sarawak.

Yang Berhormat juga boleh mengemukakan permohonan mengikut keutamaan bagi tujuan siasatan dan anggaran kos. Sekiranya menepati skop dan terdapat keperluan mendesak, permohonan tersebut akan diberi pertimbangan sewajarnya tertakluk kepada peruntukan yang diluluskan kepada KPLB.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DR. KELVIN YII LEE WUEN
[BANDAR KUCHING]**

TARIKH : 23 MAC 2022 (RABU)

SOALAN

DR. KELVIN YII LEE WUEN [BANDAR KUCHING] minta **MENTERI KESIHATAN** menyatakan pelan Kementerian untuk memastikan bekalan RTK Self-test Kit COVID-19 adalah mencukupi untuk seluruh negara dan juga memastikan harganya tidak melonjak terutamanya pada musim Omicron ini.

JAWAPAN

Tuan Yang di-Pertua,

1. Keputusan untuk memberikan kelulusan bersyarat bagi pengimportan dan pengedaran kit ujian pantas antigen COVID-19 (ujian sendiri) untuk kegunaan orang awam telah dibuat dalam Mesyuarat Khas Anggota Pihak Berkuasa Peranti Perubatan (PBPP), Kementerian Kesihatan Malaysia (KKM) pada 14 Julai 2021. Keputusan ini dibuat setelah mengambil kira kepentingan kesihatan dan keselamatan awam. Antara syarat penting bagi pengimportan dan pengedaran kit ujian pantas antigen COVID-19 (ujian sendiri) ialah kit tersebut hanya boleh dijual di farmasi komuniti berlesen dan fasiliti kesihatan yang dibenarkan sahaja. Syarat-syarat ini diwujudkan bagi tujuan menyediakan mekanisme kawalan yang sewajarnya untuk mengurangkan isu-isu berkaitan kesilapan penggunaan dan pelupusan, isu-isu pasca pasaran, penjejakan (*traceability*) serta penjualan kit ujian palsu.

2. Bagi meningkatkan akses kit ujian sendiri ini kepada orang ramai, Mesyuarat Khas Anggota Pihak Berkuasa Peranti Perubatan pada 13 Oktober 2021 telah bersetuju supaya kit ujian pantas antigen COVID-19 (ujian sendiri) yang memperolehi kelulusan bersyarat dari Pihak Berkuasa Peranti Perubatan (MDA) boleh dijual di PPR yang lain. Mesyuarat Khas Anggota juga bersetuju kelulusan dan kawalan bagi perluasan penjualan kit ujian pantas antigen COVID-19 (ujian sendiri) ini dilaksanakan oleh Kementerian Perdagangan Dalam Negeri dan Hal Ehwal Pengguna.

3. Bermula 18 Oktober 2021, Jawatankuasa Penilaian Penjualan Kit Ujian Pantas Antigen COVID-19 (Ujian Sendiri) di Premis Perniagaan Runcit selain Farmasi Komuniti Berlesen dan Fasiliti Kesihatan telah meluluskan 8,084 premis perniagaan di seluruh negara untuk menjual Kit Ujian Pantas Antigen COVID-19. Semua kit yang diluluskan adalah dibekalkan oleh 80 syarikat yang telah mendapatkan kelulusan MDA.

4. Bagi mengawal harga kit ujian pantas antigen COVID-19 (ujian sendiri) tidak melonjak, Kementerian telah menetapkan harga maksimum bagi borong RM16.00 seunit dan runcit RM19.90 seunit. Penetapan harga maksimum telah diwartakan dan berkuatkuasa pada 5 September 2021 melalui P.U (A) 348 Perintah Kawalan Harga Dan Antipencatutan (Penentuan Harga Maksimum) (No.7) 2021. Melalui pewartaan, harga RTK Self-test Kit di pasaran adalah terkawal. Premis perniagaan runcit juga telah berjaya menurunkan harga kit ujian pantas antigen COVID-19 daripada harga syiling runcit iaitu RM19.90 ke harga serendah RM4.90.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN LARRY SOON @ LARRY SNG WEI
SHIEN (JULAU)**

TARIKH : 23 MAC 2022 (RABU)

SOALAN

TUAN LARRY SOON @ LARRY SNG WEI SHIEN (JULAU) minta **MENTERI PEMBANGUNAN LUAR BANDAR** menyatakan bilakah pihak Kementerian bercadang untuk menyambung semula pembinaan Jalan Nanga Bulu ke Rantau Limau di kawasan Parlimen Julau bagi projek di bawah fasa 2 yang telah lama tertangguh bagi memastikan penduduk setempat dapat akses untuk menggunakan jalan tersebut.

JAWAPAN

Tuan Yang di-Pertua,

Sepertimana Yang Berhormat sedia maklum, projek Membina Jalan Entabai/Rantau Limau, Julau, Sarawak (Fasa 1) sepanjang 9.5km telah siap dibina pada tahun 2018 oleh Jabatan Kerja Raya Sarawak di bawah peruntukan jalan luar bandar, KPLB.

Manakala, projek Menaiktaraf Jalan Entabai/ Rantau Limau, Julau, Sarawak (Fasa 2), telah dimohon oleh Kementerian ini dalam RP-2, RMKe-12, Tahun 2022. Skop projek Fasa 2 ini adalah menaiktaraf jalan tanah/ berbatu sedia ada sepanjang 9km kepada jalan berturap dengan spesifikasi JKR Standard R1. Bagaimanapun, projek ini tidak tersenarai sebagai projek lulus di bawah Bajet 2022.

Justeru itu, Kementerian ini akan mengangkat semula permohonan projek ini untuk dipertimbangkan semula dalam RP-3, RMKe-12, Tahun 2023.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN OSCAR LING CHAI YEW [SIBU]

TARIKH : 23 MAC 2022 (RABU)

SOALAN

TUAN OSCAR LING CHAI YEW minta **MENTERI KESIHATAN** menyatakan berdasarkan polisi Kerajaan yang membuka sempadan negara kita pada 1 Mac, apakah langkah-langkah yang akan dilaksanakan oleh Kerajaan untuk mengelakkan pelancong membawa masuk penyakit COVID-19.

JAWAPAN

Tuan Yang di-Pertua,

1. Sepertimana yang telah diumumkan oleh YAB Perdana Menteri pada 8 Mac 2022, Malaysia akan memasuki ke fasa 'Peralihan ke Endemik' pada 1 April 2022 yang mana sempadan negara juga akan mula dibuka bermula pada tarikh tersebut.
2. Keputusan pembukaan semula sempadan negara dibuat berpandukan data dan fakta sains yang terkini berkaitan COVID-19, tahap kesiapsiagaan fasiliti kesihatan dalam negara serta kadar vaksinasi penduduk di Malaysia di samping turut membanding model pembukaan sempadan dengan negara lain. Pada masa yang sama, ia perlu mengambil kira keselesaan pengembara tanpa merumitkan urusan perjalanan tersebut.
3. Justeru, bagi memastikan pembukaan sempadan negara dilaksanakan dengan selamat, Kementerian Kesihatan telah dan akan terus

melaksanakan pendekatan berikut:

- (i) melaksanakan Sistem Amaran dan Tindakan (*Heightened Alert System*; HAS) yang memberikan indikasi awal mengenai peningkatan kes COVID-19 dan pengurusan wabak secara bersasar dengan menggunakan matriks yang telah dikenalpasti;
 - (ii) Mengukuhkan aktiviti diagnostik dan surveilans yang memberikan fokus kepada kapasiti serta keupayaan untuk menjalankan ujian pengesanan menerusi *National Testing Strategy* (NTS) bagi memperkasakan rakyat untuk menjadikan ujian COVID-19 sebagai kebiasaan baharu dan melaporkan keputusan ujian sendiri melalui aplikasi MySejahtera supaya kes baharu dapat dikesan lebih awal dan seterusnya aktiviti kawalan serta pencegahan dapat dilaksanakan dengan kadar yang segera;
 - (iii) Memperkasa pelaksanaan TRIIS yang meliputi komponen *Test* (ujian sendiri), *Report* (lapor menerusi MySejahtera), *Isolate* (kuarantin atau isolasi), *Inform* (memaklumkan kepada kontak rapat jika ujian didapati positif) dan *Seek* (dapatkan rawatan segera); dan
 - (iv) Mengurangkan morbiditi dan mortaliti (kematian) yang berkaitan dengan COVID-19 dengan memastikan pengurusan kes COVID-19 diperkukuhkan melalui pendekatan digitalisasi yang disediakan melalui aplikasi MySejahtera, meliputi pelbagai aspek penting iaitu Automated FTTIS (*Find, Test, Trace, Isolate and Support*).
4. Selain itu, Kementerian Kesihatan juga telah mengemaskini prosedur pengujian dan kuarantin kepada pengembara yang tiba di Malaysia melalui udara bermula pada 1 April 2022. Manakala bagi pengembara yang tiba menerusi Pintu Masuk Antarabangsa darat, suatu pengumuman mengenainya akan dibuat dalam masa terdekat.
5. Bagi menyokong fasa 'Peralihan ke Endemik', Kerajaan akan

memperkenalkan satu SOP dengan 9 garis panduan (1 SOP + 9 GP). Perkara ini sedang diselaraskan oleh Majlis Keselamatan Negara (MKN) dan akan diumumkan tidak lama lagi.

6. Bagi memastikan Malaysia sentiasa bersedia menghadapi kehadiran varian baharu, Kerajaan akan terus memperkasakan pelaksanaan ujian penjujukan genom (*Whole Genome Sequencing* - WGS) menerusi konsortium KKM-MOSTI-KPT serta melaksanakan penyumberluaran WGS kepada makmal-makmal swasta.

7. Selain itu, Kementerian Kesihatan juga akan memastikan kesiapsiagaan sistem kesihatan ditingkatkan dengan:

- (i) usahasama dengan fasiliti kesihatan swasta dalam pengurusan kes COVID-19 bagi tujuan rawatan dan pemantauan kes-kes positif yang diasingkan di rumah;
- (ii) membangunkan *COVID-19 Clinical Care Pathway* bagi tujuan memperkenalkan ubat antiviral terkini yang akan diberikan kepada pesakit COVID-19 berisiko tinggi pada peringkat lebih awal semasa mereka bergejala ringan bagi mencegah jangkitan menjadi lebih teruk; serta
- (iii) memastikan akses kecemasan dan darurat tersedia seperti menyediakan jumlah ambulans yang mencukupi dan tiba pada waktu yang ditetapkan melalui sistem pengurusan berpusat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : TUAN SIM CHEE KEONG (BUKIT MERTA JAM)

TARIKH : 23 MAC 2022 (RABU)

SOALAN

TUAN SIM CHEE KEONG (BUKIT MERTA JAM) minta **PERDANA MENTERI KEMENTERIAN DALAM NEGERI** menyatakan adakah Kerajaan bercadang menghentikan penggunaan outrider kepada ahli-ahli pentadbiran daripada Perdana Menteri kepada Menteri Kabinet dan Timbalan Menteri.

JAWAPAN

Tuan Yang Di Pertua,

Penyediaan *outrider* kepada Anggota Pentadbiran adalah berdasarkan kelayakan yang telah ditetapkan dan pelaksanaan tugas adalah mengikut prosedur operasi tetap (SOP) Polis Diraja Malaysia (PDRM).

Mengikut peraturan dan undang-undang sedia ada orang kenamaan berikut adalah layak mendapat khidmat pengiring polis (*outrider*):

- i. Seri Paduka Baginda Raja Yang Di-Pertuan Agong;
- ii. Seri Paduka Baginda Raja Permaisuri Agong;
- iii. Duli Yang Maha Mulia Sultan-Sultan;
- iv. Duli Yang Maha Mulia Sultanah-Sultanah;
- v. Tuan Yang Terutama (TYT) dan Isteri;
- vi. Tengku Mahkota / Raja Muda;
- vii. YAB Perdana Menteri dan isteri;

- viii. YAB Timbalan Perdana Menteri dan isteri,
- ix. YB Menteri;
- x. YB Timbalan Menteri yang dilantik mewakili YAB Perdana Menteri dalam mana-mana acara rasmi Kerajaan; dan
- xi. Mantan YAB Perdana Menteri.

Penyediaan *outrider* dan pasukan iring kawal rapat dari PDRM turut berperanan memastikan orang kenamaan yang diiring berada dalam keadaan selamat semasa dalam perjalanan dari satu destinasi ke satu destinasi lain dan mengelak sebarang ancaman yang boleh mengancam keselamatan orang kenamaan berkenaan.

Justeru itu, demi memastikan orang kenamaan seperti soalan Yang Berhormat yang merangkumi YAB Perdana Menteri, YB Menteri-Menteri Kanan dan YB Menteri, suka dinyatakan di sini bahawa Kerajaan berhasrat meneruskan SOP ini demi memastikan keselamatan orang kenamaan berkenaan semasa dalam perjalanan dari satu destinasi ke satu destinasi lain serta mengelak sebarang ancaman terhadap orang kenamaan yang diiring.